

## Mexiakame xapayari Te'aitamete

### *'Aruniyaxi ti'aitame kemitiyeimikikai*

<sup>1</sup> Merikitsi Rawiri ti'aitame waikawa kani'ukiratsitikaitiniri, pikaheuxikakai tsepa waikawa memika'ikaritiwakai yaxeikia katineuhaitikaitini.

<sup>2</sup> 'Ayumieme 'iparewiwamete mipai mekatenitahiawe: «Xeime 'uka 'iimari yuxewime tepikuwauni para matsi'iwiyaniki, meta 'a'aurie mutihupuniki mimatsi'utixiriyaniki».

<sup>3</sup> Hiki miki mekaniukakine naitserie 'ixaher-itsixi wahetsia 'uka mekuwautiweti witsimi'ane, mekanitaxeiya 'Awitsahaki Tsunemi kiekariyarit-sie kiekame, miki ti'aitame mekani'atiirieni.

<sup>4</sup> Miki 'uka yemeki witsipitiyuxexeiyakai, ti'aitame pi'iwiyakai meta 'api'epiniriwakai tita mireuyehiakai, peru ti'aitame miki hatsuaku pika'ikumayia.

<sup>5</sup> Merikitsi 'Aruniyaxi Rawiri nu'aya Kakiti matia memeyexei, kaniuyukuha'aritanian mipai 'utaiti: «Ti'aitame nepayani». 'Ayumieme yuwaikawame kaniwarukuxeirieni kuyaxi. Kaxetate kuyaxa miemete meta kawayutsixi kaniwarukuxeirieni meta huta tewiyari heimana tamamata kuyaxi 'ihiwemete.

<sup>6</sup> 'Aruniyaxi pitemaikitikai 'aixia pitiyuxexeiyakai yaki puyumaikai 'Awitsaruni 'utia mieme pihikitikai. Paapaya Rawiri hatsuaku pika'ita'imaiyaxi kemitiyurienekai 'Aruniyaxi.

7 'Ayumieme 'Aruniyaxi Kuhawi Tsariwiya nu'aya matia mekatenikuxatakaitini 'awie meta mawari wewiwame hamatia 'Awiyataxi, mikita mekaniparewieni.

8 'Ikita 'Aruniyaxi memika'uparewi mepihikitikai mawari wewiwame Tsaruki meta Wenahiyaxi Kuyara nu'aya, Natani Kakaiyari niukameya, Tsimi meta Xeki meta Rawiri kuyaximama memikamama.

9 Hiki 'Aruniyaxi 'Enixukeri haixayari 'aurie katiniutimawa, Tsukereti 'aiyari manukatsie, mana tsikerutsixi memiwaiyatika, tuurutsixi meta muxatsi mekaniwarutimawa. Yu'iwama kaniwaruta'inieni ti'aitame niwemama memi'iwamamatikaiki meta yunaime paratsiyuta te'uximayatamete, Kura kwieyaritsie miemete,

10 peru Natani Kakaiyari niukameya pika'uta'ini, Wenahiyaxi meta ti'aitame kuyaximama memikamama, meta yu'iwa Tsarumuni pika'uta'ini.

11 'Ayumieme Natani Tsarumuni maamaya Wetitsawe, mipai katiniuta'iwawiya: «¿Mipai petimateri, 'Aruniyaxi Kakiti nu'aya ti'aitame mayuyeitiaxime, tati'aitawame Rawiri 'atsikatimaikaku?

12 Xika pehauyuwikweitsitiamikini meta 'aniwe Tsarumuni pehauwikweitsitiamikini, keneneupitia mipai nemimatitaxatianiki:

13 Kenemie ti'aitame Rawiri hetsia, mipai ketinetahiawi: “¿Tami ne mati'uximayatsiriwame mipai pepinetiuhiritia, kename neniwe Tsarumuni ti'aitame 'ayanikekai 'a'utima? ¿Kepautiti hiki 'Aruniyaxi ti'aitame pihiki?”

14 Mexi 'eki perekuxatani Rawiri hamatia neta nepautahani para neta yaxeikia nemireitahiaweki».

15 Merikite Wetitsawe kaneutahani ti'aitame muyehupu. Mikiri waikawa mi'ukiratsitikaiki 'Awitsahaki pi'iwiyakai Tsunemi kiekame.

16 Wetitsawe kepauka muwa munua kaniukatunumakeni hixiena. Hiki ti'aitame mipai katinita'iwawiya:

—¿Ketitaki nematiparewieni?

17 Hiki Wetitsawe mipai katinita'eiya:

—Neti'aitiwame yapepinetiutahiawixi ne mati'uximayatsiriwame, Yawé mi'akakaiyari matsi'eniekaku kename neniwe Tsarumuni ti'aitame 'ayanikekai 'a'utima.

18 Peru hiki matsi 'Aruniyaxi pita ti'aitame payuyeitiaxime, 'eki 'atsipekatimaikaku yuri ti'aitame pemihiki.

19 Mikiri mawari kanewewieni turutsixi, tsikerutsixi meta muxatsi kaniwarekwini yumiireme. Hiki kaniwaruta'inieni yunaime ti'aitame 'aniwema, mawari wewiwame 'Awiyataxi meta Kuhawi kuyaxi tiwa'aitiwame. Peru Tsarumuni pika'uta'ini 'aixia mimati'uximayatsirie.

20 Hiki neti'aitiwame meta ti'aitame, yunaiti 'ixaheritsixi mekanita'ikwewani yapemita'iniki, kemi'ane mitita'aita 'a'utima 'a'uwenitsie mayerini.

21 Mexika 'eki yapekatayiweti pe'umini, matsi kwitiwa 'Aruniyaxi pitatsikwini ne meta neniwe Tsarumuni matia 'axateyuruwamete wahepai.

22 Mexi 'akuxi Wetitsawe tikuxatakai ti'aitame hamatia, Natani Kakaiyari niukameya kaninuani.

23 Ti'aitame katinetimani kepauka munua. Hiki Natani hixiena 'utihiximakeka,

24 mipai Rawiri katiniutahiawe:

—Neti'aitiwame. ¿Eki mipai petiuta'ai kename 'Aruniyaxi 'anukakeni 'a'utima?

25 Mipai nekamatina'iwawiyani yanetimaiti miki mawari mewewiki yumireme, turutsixi, muxatsi meta tsikerutsixi memiwaiyatika. Meta yunaime 'aniwema kaniwaruta'inieni, kuyaxi tewa'aitiwamete, meta mawari wewiwamete 'Awiyataxi mana miki yunaiti mekatenekwaka mekane'ieka, mipai mete'uhiwati hixiena: “Ti'aitame 'Aruniyaxi yuheyemeki keti'aitani”.

26 Peru ne pikanetsi'uta'ini 'ahetsiemieme nemiti'uximaya, yaxeikia mawari wewiwame Tsaruki meta Wenahiyaxi Kuyara nu'aya meta Tsarumuni pika'uta'ini 'aixia mimati'uximayatsirie.

27 ¿Kamitsi 'eki mipai petiuta'ai, tame mate'uximayatsiriwamete yapekatarahiaweti, kemi'ane 'a'utima 'a'uwenitsie mayeriniekai?

*Rawiri Tsarumuni ti'aitame kemirayeitia*

*(1Te 1:28-53 - 1Kem 29:21-25)*

28 Merikitsi mipai tiu'enaka, ti'aitame Rawiri mipai katiniuta'aita:

—Xekenewata'ini Wetitsawe.

Miki kaneutayani ti'aitame hixie kaniutakeni.

29 Hiki ti'aitame mipai katinitahiawe:

—Yuriki Yawé hixie mipai nekanaineni, minetsi'uxinaxi naime 'uximatiarika hepaitsita,

30 hiki nekaneye'atiamiki kenemimatiutahiawixi Yawé 'ixaheritsixi takakaiyari hixie. Hiki yanepitiyurieni ne kenemimatiutahiawixi,

'aniwe Tsarumuni ti'aitame payani ne'utima, nehetsiemieme pitita'aita.

<sup>31</sup> Hiki Wetitsawe ti'aitame hixie 'utihiximakeka, mipai kaniutayini:

—Neti'aitiwame meta ti'aitame Rawiri 'aheye-meki peke'ayeyurini.

<sup>32</sup> 'Ana Rawiri mipai katiniuta'aita:

—Xekenewata'ini mawari wewiwame Tsaruki, meta Natani Kakaiyari niukameya metatsiere Wenahiyaxi Kuyara nu'aya.

Hiki kepauka miki yuhaikati memu'axia ti'aitame hixie,

<sup>33</sup> ti'aitame mipai katiniwarutahiawe:

—Xekeniwara'inieti paratsiyuta memite'uximaya, neniwe Tsarumuni xekenanutiyetsa nemuratsie, hiki xekenanuwitiki Kikuni haixayari matiniere paiti,

<sup>34</sup> muwa mawari wewiwame Tsaruki meta Natani Kakaiyari niukameya hatseiti witsimu'ia memeikawirieniki, 'Ixaheri kwieyaritsie ti'aitame mayaniki. Hiki 'ana 'awa kuxinetayari xekene-tahitsi meta xekenetihiwani mipai xe'utiyuati: “Ti'aitame Tsarumuni yuheyemeki keti'aitani”.

<sup>35</sup> Hiki mipai xeteheyurieme, xekenaku-nuitia Tsarumuni ne'uwenitsie mayeriniki nehetsiemieme mitita'aitaki. Kariki ne nekanenayexeiya miki mihikitiniki 'Ixaheri kwieyaritsie mitita'aita meta Kura kwieyaritsie.

<sup>36</sup> Wenahiyaxi Kuyara nu'aya mipai katinita'eiya:

—Mipai keti'iyini. Mipaita Yawé kehaineni ti'aitame kakaiyarieya hikiti.

37 Ti'aitame Yawé 'ahamatia kemitiuyeikakai, mipaita Tsarumuni hamatia ketiuyeikani, ketimariwemeki pemit'i'aitakai Rawiri ti'aitame, matsi waikawa Tsarumuni mariwemeki ketiuta'aita.

38 Tsaruki mawari wewiwame, Natani Kakaiyari niukameya meta Wenahiyaxi Kuyara nu'aya, meta kereteutsixi, pereteutsixi, Tsarumuni mekananutiyeni Rawiri ti'aitame murayatsie, meta me'ihiti 'auriena mekaneu-tiwetikateitini kepauka Kikuni haixayari hepa kiatsata memukahukai.

39 Meheta'axiaka mawari wewiwame Tsaruki hatseiti 'awata miyema kanewatihana 'ixuriki tukiyarita Kakaiyari hetsiemieme muyepatsieta meiyehanakai, hiki Tsarumuni kaniukawirieni mu'uyatsie. Meta 'awa mekaniutahitsieni, hiki yunaiti teiteri mipai mekateniuhiwa: «Ti'aitame Tsarumuni yuheyemeki keti'aitani».

40 Mipai tiuyiku, yunaiti mekanekine 'utimana, pirikixaki mete'ukayuitiwati meta me'utihiwati karima temawierikaki. Kwinimieme yemeki pitiyu'eniirikikai wahiware, kwie 'iariti puwatayuanekai.

41 Hiki 'Aruniyaxi meta yu'inierima yunaiti metekwati mekatenitahayewarimekaitiniri kepauka yuariya memu'eni. Kuhawi 'awa yuariyaya 'u'enieka, mipai kaniutayini:

—¿Ketitayari kuta kwinimieme metehihiwa kiekaritsie?

42 Kuhawi 'akuxi tikuxatakaku Kunatani kaninuani, mawari wewiwame 'Awiyataxi nu'aya.

'Aruniyaxi mipai katinitahiawe:

—Keniwataye'a. 'Eki tewi 'aixia pemituika'iyari pepihiki, peuyewetse pemi'enierieka, xiari niuki 'aixia 'anuyineme pepukutuane.

<sup>43</sup> Hiki Kunatani mipai 'Aruniyaxi katiniutahiawe:

—Neuxei mipai pika'ane. Rawiri tati'aitiwame, Tsarumuni kananukakeni miti'aitametiniki.

<sup>44</sup> Metatsiere kaniwaruta'aitiani Tsaruki mawari wewiwame, Natani Kakaiyari niukameya meta Wenahiyaxi Kuyara nu'aya metatsiere kereteutsixi, pereteutsixi, Tsarumuni memanutiyeniki ti'aitame murayatsie.

<sup>45</sup> Tsaruki Natani matia ti'aitame mayaniki hatseiti witsimu'ia mekaneikawirieni Kikuni paiti. Muwa paiti mekaneitsutiani teiteri me'utihiwati temawierikaki meta kiekaritsie yaxeikia mepeyuxerie. 'Ayumieme miki hiwari kana'eniirikini.

<sup>46</sup> Metatsiere 'ari Tsarumuni ti'aitame 'uwenieyatsie kanayerini,

<sup>47</sup> meta paratsiyuta te'uximayatamete tati'aitiwame Rawiri mekaneiwairitiatiwekaitini miyamitiuyuriki. Mipai paiti matsi mekateneikihawekaitini Kakaiyari Tsarumuni matsi waikawa mariweme kehayeitiani keyuri Rawiri, meta matsi mariwemek ketiuta'aita keyuri Rawiri. Hiki ti'aitame Rawiri mipai rahawariwati yu'utatsie 'akaiti kananakatutsire

<sup>48</sup> hiki mipai kanetayini: “'Aixia kerahawariwani Yawé 'ixaheritsixi takakaiyari, hiki minetsi'upitia nemixeyaki ne'utima mitita'aita, ne'uwenitsie 'akaime”.

<sup>49</sup> Hiki mipai mete'u'enanaka, yunaiti 'Aruniyaxi 'inierimama me'anuku'uka

mekaneutayeixiani waikawa memamati.

<sup>50</sup> 'Aruniyaxi, waikawa Tsarumuni makati, 'ixuriki tukiari manuwe kaneuyuta'una, mawari wewiwame 'awateyatsie katinawiyakaitini.

<sup>51</sup> Hiki yapauka ti'aitame Tsarumuni mipai pitiutaxatari:

—Ti'aitame, 'Aruniyaxi kamenimakaka, 'ixuriki tukiari manuwe mawari wewiwame 'awateyatsie katinawiyani. Mipai 'utaiti: “Hiki kwitiwa mipai kehetayini ti'aitame Tsarumuni kename ne kanetsimieni ti'uximayatsiriwame”.

<sup>52</sup> Hiki Tsarumuni mipai kaniutayini:

—Xika yuhemeki heitserie 'a'uyeikani, ni'atsipikaranuyeyani, peru xika tixaiti tiuyurieni 'uxa'atini, kanimieriemiki.

<sup>53</sup> Hiki ti'aitame Tsarumuni katiniutani'ani miwitikiemeki. Kepauka 'Aruniyaxi munua, kaniutihiximakeni ti'aitame Tsarumuni hixie, hiki miki kanitani'ani yukie miyemeki.

## 2

*Rawiri yuniwe 'imatiriekā kemitiuhiritia*  
(1Te 2:10-12 - 1Kem 29:26-28)

<sup>1</sup> Hiki Rawiri kanimiximekaitini, 'ayumieme yuniwe Tsarumuni mipai katiniuhiritiani:

<sup>2</sup> «Teyunaiti yaxeikia miya pitatsiheutakwewie, neri 'etsiwa xeikia peuyewetse nemiminiki. Kene'atirikariyani, pepikaheumaka 'uki muka'iyari kenehikitini.

<sup>3</sup> Yawé 'akakaiyari 'aitsikayatsie yaketinekamieni huyeya keneuweiiani meta Muiitsexi naime 'iniari niukiyaritsie kemiraka'utia. Mipai 'ana tsepa kepemitiyuriene



'aixia pepitiukaxexeiyani meta tsepa hakewa pemetia,

<sup>4</sup> Yawé, kaneye'atiamiki 'ipai keminetiutahiawixi: "Xika 'anuiwarima 'aixia mete'u'uwani, xika yu'iyariki yametekahuni, mipai 'anuiwarima xeikia mepanuti'uweni 'ixaheritsixi metewa'aitiati".

<sup>5</sup> »'Eki pepitimate, kemitiuyuri Kuhawi Tsariwiya nu'aya, miki kuyaxa miyianeni hepai pitiuyuri kayuwati 'umakakutiti, 'Awinexi Nexi nu'aya meta 'Amatsaha Ketexi nu'aya, miki yuhutame puwarukwi kuyaxi tewa'aitiwamete 'ixaheritsixi, mipai miki yuhetsie pirahia.

<sup>6</sup> 'Ayumieme, ketinemaiweni, 'apikareutewini 'ena 'uyeikati, pepika'ihayewani kayuwati hex-eiyati muminiki.

<sup>7</sup> Matsi 'aixia ketiniwaxeiyani Waxitsirahi niwemama Karaha kiekame, miki 'amexatsie keniwapitiaka 'ahamatia memitekwaniki, mikitsi neheima mekanutanuani kepauka 'a'iwa minetsi'uweiyakai 'Awitsaruni.

<sup>8</sup> »Yaxeikiata nepimatsiyetuirie Tsimi Kera nu'aya, Wenikamini xiyarieya Wakurini kiekame, waikawa 'axapinetiutihawixi Makanahini ne'umiekaku. Kaniyuritinita kepauka Kurutani hatuxameyaritsie minetsihekunakixi, ne Yawé hixie mipai nekatineitahiawe kename neka'imienikekai.

<sup>9</sup> 'Ayumiemeru 'eki pepikareiyehiwiriekai. 'Eki matsi waikawa pepitimaiwe, 'ekiri kepemiyurieneni, tsepa mi'ukiratsiri keneuta'aita mimierieniki».

<sup>10</sup> Hiki Rawiri kaniumini, kaniukateukieni yukiekaritsie hepaina mititewatsie yu'ukiyarima

wahamatia.

<sup>11</sup> Hewuruni kiekariyaritsie piti'aitametikai 'atahuta wiyari, Kerutsareme hetsieta xeitewiyari heimana tamamata heimana haika wiyari, naimekiri pitiuta'aitaxi huta tewiyari wiyari, 'Ixaheri kwieyaritsie.

<sup>12</sup> 'Utimana mitiuta'aitaxi nu'aya kanayani Tsarumuni, hiki miki tirikaiyemek katiniuta'aita.

*Tsarumuni tirikaiyemeki kemitiuta'ai*

<sup>13</sup> Hiki 'Aruniyaxi Kakiti nu'aya petia Wetitsawe Tsarumuni maamaya hetsia, Wetitsawe mipai katinita'iwawiya:

—¿Petinua pekanetsi'aye'unieti?

'Aruniyaxi mipai katinita'eiya:

—Huu,

<sup>14</sup> tixaiti nepirayexeiya nepimatitaxatiani.

Wetitsawe mipai katinitahiawe:

—Kenetineutaxatia.

<sup>15</sup> 'Aruniyaxi mipai kaniutayini:

—Kamitsi 'eki pekatinimaika, nepita ti'aitame nekanayanikekaitini, yunaiti 'ixaheritsixi mipai mekateniku'eriwakaitini. Peru hikiri nemuta pita katiniunakitsitiani, Yawé kemitinake katiniuyini.

<sup>16</sup> 'Aixiatsi kani'aneni, peru tixaiti nepimatitawawirieni, perutsi pekatinaye'atiamiki.

Wetitsawe mipai katinitahiawe:

—¿Kekuta petayini?

<sup>17</sup> 'Aruniyaxi mipai katinitahiawe:

—Ximixi, 'eki mipai ketinetahiawi ti'aitame Tsarumuni, kenetsi'uwititiani 'Awitsahaki Tsunemi kiekame, 'eki yapereitahiaweyu pimatsi'anuenieni.

18 Wetitsawe mipai katinita'eiya:

—'Aixia kani'aneni, nepireitaxatiani ti'aitame kepemaine.

19 Hiki Wetitsawe kaneyani ti'aitame Tsarumuni hetsia, mipai mititaxatianiki 'Aruniyaxi hetsiemieme. Ti'aitame kananukukeni mitahiaweki yuwarutsi hixie kananakatutsire, hiki 'itahiaweka kanayerini yu'uwenitsie, kanita'aitata tawari xeime 'uweni mana mayeriniki maamaya, hiki tserietana kaniutiyerini.

20 Wetitsawe mipai katinitahiawe:

—Ximixi 'etsiwa nepimatitawawirienikeyu, peru yemeki yaketinekaye'a.

Tsarumuni mipai yumaama katiniuta'eiya:

—Yakeneutayiki tita pemitixata, nemaama 'aku, 'eki tixatikiki nepikamatita'imaiya.

21 Maamaya mipai kaniutayini:

—Keneupitia 'a'iwa 'Aruniyaxi 'Awitsahaki Tsunemi kiekame mitiwitiniiki.

22 Hiki ti'aitame yumaama mipai katiniutahiawe:

—Peru neuxei titayari penetiwawirie 'Awitsahaki 'Aruniyaxi nemiwititianiiki? Miki kaninematsikatini, miki wa'ati mawari wewiwame 'Awiyataxi tiparewie meta Kuhawi Tsariwiya nu'aya. Miki 'uweni nemihanitianiiki pekanetinihiaweni.

23 Mipai 'utayika, ti'aitame Tsarumuni mipai kaniutayini Yawé hixie: «Kakaiyari kenetsi'u'uximatiani kanetsinenimayati, xika 'Aruniyaxi neka'umieni miya mutayiki.

24 Yawé pinetsi'upitia tirikaiyemeki nepaapa 'uwenieyatsie nemayeriniki, kemainekai yapitiuyuri, nenuiwarimata te'aitamete mepakine. 'Ayumieme yuriki Kakaiyari mayeniereki mipai nepaine hiki kwitiwa 'Aruniyaxi pimini».

25 Hiki kwitiwa, ti'aitame Tsarumuni Wenahiyaxi Kuyara nu'aya kaniuta'aitiani 'Aruniyaxi mimieniki.

26 Meta mawari wewiwame 'Awiyataxi, ti'aitame mipai katinitahiawe: «Kenemie 'akwiepa paiti 'Anatuti. Pemimierieni 'aixia kani'aneni, peru hiki pikatixai nepikamatsimieni, 'eki nepaapa Rawiri matia pepukatei kepauka mitiuka'eniwakaitsie, meta hixiena tiratu kakuniyari peputikwei Yawé naimekimiyiwe tipiinieya».

27 Tsarumuni 'Awiyataxi 'uta'imaiyaku Yawé hetsiemieme mawari wewiwame mikahikitiniki, 'ana mipai piraye'a Yawé kemutayi Tsiru kiekari-yaritsie 'Eri nuiwarimama wahepaitsita.

28 Kuhawi 'Aruniyaxi piparewiekai, tsepa 'Awitsaruni ka'uparewi, miki mipai tiu'enaka kename 'Aruniyaxi hemikairi miki kaneyani, 'ixuriki tukiyari Yawé hetsiemieme manuwe peyuta'unaxi, mawari wewiwame 'awateyatsie kanikawiekaitini.

29 Kepauka mipai mitiutamari Tsarumuni kename Kuhawi 'uyuta'unakai 'ixuriki tukiyari manuwe, meta kename mawari wewiwame 'aurie heutiwekai, ti'aitame Wenahiyaxi Kuyara nu'aya kaniuta'aitiani, Kuhawi mimieniki.

30 Wenahiyaxi kaneyani Yawé tukieya manuwe,  
Kuhawi mipai katiniutahiawe:

—Keniwayeye'a ti'aitame mipai paine.

Kuhawi mipai katinita'eiya:

—Hawaiki. Matsi 'uwa nepimini.

Hiki Wenahiyaxi heyaka ti'aitame  
katiniutaxatiani kemutayi Kuhawi.

31 Hiki ti'aitame mipai kaniutayini:

—Kamitsi ketinaye'atia kemaine, kenemi'a  
meta kenekateuki. Mipai petiyurieyu nepaapa  
meta nehetsiemieme meta netiiriyama wahetsie  
pepiranuyeitiani Kuhawi 'atsimekateyuriekame  
kemitwarukwi meripaiti.

32 Yawé Kuhawi 'apirakapitiani miyaki  
'atsimekate'u'iyarime miwarukwiki, nepaapa 'at-  
sikatimaikaku, miki Kuhawi 'Awinexi kaniumieni  
Nexi nu'aya, kuyaxi tiwa'aitiwametikaku 'Ixaheri  
kwieyaritsie, yaxeikata 'Amatsaha Ketexi nu'aya  
kaniumieni, kuyaxi tiwa'aitiwametikaku Kura  
kwieyaritsie. Mipai yuhutame katiniwarukwini  
'ixiparaki teiteri 'aixia memite'u'iyarikai  
heitseriemeki yamemitekahukai keyuri Kuhawi.

33 Kuhawi hetsie kerahiiani miki  
memukwi'iwxiki metatsiere nuiwarimama  
wahetsie. 'Apita Yawé kayuwati kewapitiaka  
Rawiri meta nuiwarimama meta wa'uweni.

34 Hiki Wenahiyaxi Kuyara nu'aya heyaka  
Kuhawi kanemieni meta katiniuta'aita  
mikateukieniki kiiya mati'utsie paiti  
makumawetsie.

<sup>35</sup> Hiki Tsarumuni Wenahiyaxi Kuyara nu'aya kuyaxi tiwa'aitiwame kanayeitiani Kuhawi hetsiemieme. Meta mawari wewiwamete wa'ukiyari Tsaruki kanayeitiani 'Awiyataxi hetsiemieme.

<sup>36</sup> Merikite Tsimi tiutani'airieka, mipai katinitahiaawe:

—Kii keneu'atawewiri Kerutsareme muwa kenayekani. Xaitsie pepikaheyeikani,

<sup>37</sup> kepauka pemayeyani meta kepauka Kiruni 'akiyaritsie pemuyani, pekanimieriemiki. Peru tame tahetsie pikarahiyani.

<sup>38</sup> Tsimi mipai ti'aitame katiniutahiaawe:

—Kamitsi mipai nekatiniyurimiki, ne nemumati'uximayaitsiriekaki 'anekani-uyeikani ti'aitame, mipai nekatinikayeimiki kepeminera'aitiwa.

Tsimi Kerutsareme kiekariyaritsie kaniukateitini muixa.

<sup>39</sup> Matsi haika wiyari 'anuyeyaku, yuhutati te'i'uximayatsiriwamete mekaniyuta'una Kahati kiekariyaritsie paiti, 'Akihitsi mira'aitakaitsie Mahaka nu'aya. Kepauka Tsimi mitiutamari kename Kahati paiti mehe'uwa te'i'uximayatsiriwamete,

<sup>40</sup> 'ana yupuxu 'anutixiratiaka kaneyani wareuwaumieka meta tawari miwa'atianiki.

<sup>41</sup> Kepauka Tsarumuni mitiutamari kename Tsimi Kerutsareme yeyaka Kahati paiti heyakai meta kename 'akunuakai,

<sup>42</sup> hiki titani'airieka mipai katinitahiaawe:

—Ne yanepimatiutahiawixi yapemitayiniki Yawé hixie, ne mipai nepimarayehitia: “Kepauka pemayeyani tsepa hakewa, pekanimieriemiki”.

'Ekita yapeputayi kename yapetikayanikekai yapera'eriwakai.

<sup>43</sup> ¿Kamitsi ketitayari yapekatikatia yape'utayika Yawé hetsiemieme, meta titayari yapekatikatia kenemainekai?

<sup>44</sup> Metatsiere ti'aitame mipai Tsimi katiniutahiawe:

—'Eki pepirakumate kepemitikwinitia nepaapa Rawiri, hikiri Yawé hetsiena pitanuani ke'axapemituyuriki.

<sup>45</sup> Matsi ne 'aixia nepi'itiarieka, meta Rawiri 'uwenieya yuheyemeki 'apuweni nuiwarimama wahetsiemieme meta 'aixia pitiumieni Yawé hixie.

<sup>46</sup> Hiki yapauka ti'aitame, Wenahiyaxi Kuyara nu'aya mimieniki kanita'aitiani. 'Ana Wenahiyaxi Tsimi kaniumieni. Mipai tiuyiku Tsarumuni xeikia ti'aitati kanayani.

### 3

*Tsarumuni kemitita'iwau mitimaiweniki  
(1Te 3:4-15 - 2Kem 1:2-13)*

<sup>1</sup> Merikitsi Tsarumuni, 'ekipitutanaka ti'aitame Parahuni matia tiratu mekaniuwewieni memiyuparewiekaki nu'aya 'utiwitika, hiki Tsarumuni 'uka Rawiri kiekariena paiti kani'atiani, 'ana 'akuxi yuparatsiyu puwewienekai, meta Yawé tukieya metatsiere Kerutsareme kuraruyari 'amatayewa.

<sup>2</sup> Mana 'akuxi mikatawewiyawekaiki tuki Yawé hetsiemieme, teiteri xeikia mepitemawatiwekai tukite 'etsipepemeta.

<sup>3</sup> Tsarumuni Yawé kaninaki'eriekaitini, metatsiere kemiti'aitiakai paapaya Rawiri

yakatinikamiekaitini. Peru mikita yaxeikia kaneta'axekaitini hakewa memitehetimawakai tukite 'etsipepemeta, mititimawaki meta 'ikwa putitaiyakai.

<sup>4</sup> Tuki 'etsimupe waikawa mimatiwakai Kawahuni rakutewakaku kaniuwekaitini, mana kaneta'axekaitini Tsarumuni timawamiti. Heiwa mana xeimiriari mawari taiyariari kaniuwewieni,

<sup>5</sup> hiki mana kutsukaku Yawé heinitsitana kani-uuyehkiata mipai katinitaxatiani:

—Kenetineutawawiri tita mimatinake nemimatiminiki.

<sup>6</sup> Hiki Tsarumuni mipai katinita'eiya:

—'Ekitsi waikawa pekaninaki'eriekaitini mati'uximayatsiriwame Rawiri, nepaapa, miki 'aniuyeikakaitini yatikamieti naimetsie kepemitihiiritia 'aixia 'anemeki 'ahetsie tiwiyati, 'iyarieya niheitseriekaitini. Hikita yaxeikia tepineniere kepemitinaki'erie Rawiri nu'ayatime pemanayexeiki 'uwenieyatsie mayeriniki.

<sup>7</sup> »Yawé nekakaiyari, hiki 'eki ti'aitame pepinetsi'ayeitia nepaapa Rawiri het-siemieme. Peru ne matsi 'akuxi nepitemaiki, 'atsinepikatimate kenemitiyurieneni.

<sup>8</sup> Peru 'ena pekanenihiani ne ti'a'uximayatsiriwame teiteri memiyumiire wahixie pemiwaranayexei, teiteri memikayu'iniatsinia.

<sup>9</sup> Ne nepimatsiwawirie mati'uximayatsiriwame nehikititi nemitimaiweniki nemiyiweniki nemitiwata'aitaniki 'ateiterima, para nemitimaikaki ketita 'aixia miti'ane meta tita 'axamiti'ane. Mexika katixaitini



pekanetsi'uparewieni, xewiti pikayiwe  
mitiwaruta'aitiani 'iki teiteri memiyumiire».

<sup>10</sup> Yawé pinakixi Tsarumuni miki  
mititawawiriki.

<sup>11</sup> 'Ayumieme mipai Yawé katinitahiawe:

—Miki peminetiutawawiriki, pemitimaiweniki  
heitserie pemiti'aitaniki, matsi pita tukari  
miireme pemika'utawau, xikutiriya 'ahet-  
siemieme pemika'utawau, yatini memikwiniki  
memimatsi'aye'unie pemika'utawau,

<sup>12</sup> nekametiniyetuiriemiki peminetiutawawiri,  
'iyari timaiweme nekamenimimiki, meta  
pekatiniimaikamiki tita 'aixia miti'ane meta tita  
'axamiti'ane. Xewiti mipai 'aneti pikatinuiwawe  
meta xewiti mipai pikayini 'arike.

<sup>13</sup> Metatsiere tsepa pemikanetiutawawiri  
nepimatiyetuirieni, waikawa pemirexeiyaniki,  
pemimariweniki xewiti ti'aitame 'ahapai  
pika'aneni pe'uyeikakaku.

<sup>14</sup> Xika yapetikamieni naime ne'aitsikatetsie,  
'apaapa mitikamiekai hepai Rawiri, tukari  
waikawa nepimatsipitiani.

<sup>15</sup> Merikite kepauka Tsarumuni manutanierixi  
yakatinetimani kehapai mitiuheini, hiki  
kanakunuani Kerutsareme. Mana nuaka  
tiratu kakuniyari manuka kaneyani hiki  
mawari taiyariyari kaniuwewieni meta kename  
meyuxewi mawariyari. Metatsiere 'ixiarari  
kaniuwewieni yunaime 'iparewiwamete  
wahetsiemieme.

*Tsarumuni kemitimaiwekai ti'aitati*

16 Merikitsi yapaimexia tukari 'anukayaku, yuhutati 'ukari tuminiki memiyumayinia mekaniu'axiani ti'aitame hetsia.

17 Xewiti miki mipai katinitahiawe:

—Neuxei ti'aitame, 'iki 'ukaratsi teyunaiti 'uxeikia tepayetei xeikiyarita, miki nehamatia 'ayekaiku ne nepetiniwexi,

18 hiki haika tukari 'anukayaku mikita petiniwexi. Xewiti muwa pika'ayekatei, matsi tame xeikia teyuhutati.

19 Merikite xeitakaritsie 'iki nu'aya kanemini hetsiena mahuiki warutsieya.

20 Peru miki tikari hixiapa kananukukeni, mexi nekutsukai neniwe 'utikweka, yuhamatia kanikateni, yuniweta mimiki ne'aurie kanititeni.

21 Kepauka nemanukuke ne'itsitsitiani neniwe, nemixei pimikikai, 'arike 'ukahekiareku kwi nemune'iwiya miki neniwe pikahikitikai, ke'aneme nemutiniwekai.

22 Hiki xewitita mipai kaniutayini:

—Hawaiki pikayuri. Nunutsi kemi'ane mayeniere kanineniwetini, kemi'ane mimiki kani'aniwetini.

'Ukaratsi matiari mitiutaxataxi mipai katinitahiawe:

—Pekatiniku'itawani. Nunutsi mimiki 'eki kani'aniwetini, kemi'ane mayeniere kanineniwetini.

Miki mipai mekateniyukihawekaitini ti'aitame hixie.

23 Hiki ti'aitame mipai katiniwarutahiawe:

—Xewiti mipai mutaine: “Nunutsi kemi'ane mayeniere kanineniwetini, kemi'ane mimiki kani'aniwetini”. Xewitita mipai tiutaine:

“Pikayuri. Nunutsi mimiki kani'aniwetini, mayeniere kanineniwetini”».

<sup>24</sup> Hiki mipai katiniuta'aita:

—'Ixi para xekenentakwe'iri.

Kepauka memi'atiri,

<sup>25</sup> mipai kaniutayini:

—Hixiapa xekeniwawitekiri nunutsi mayeniere, xekeneyetui ri hixiapa 'akame 'iki, 'iyata xeime.

<sup>26</sup> Yuri mimaamaya waikawa yuhiweriet i yuniweki mipai ti'aitame katiniutahiawe:

—Neuxei waikawa nepimatsiwawirie, ti'aitame. Pepika'ikumemiwani, miki keneyetui ri nunutsi mayeniere.

Peru xewitita mipai kaniutayini:

—Hixiapa ke'uwigekieni, nehetsiemieme mikahikitiniki meta 'ahetsiemieme.

<sup>27</sup> Hiki ti'aitame mipai katiniuta'aita:

—Hawaiki xepika'ikumemiwani. Xekeneyetui ri nunutsi matiari mutaniu, miki yemeki kanimaa-mayatini.

<sup>28</sup> Yunaiti mekatenetimani 'ixaheritsixi teiteriyari, kemitiwarunitsiri miki 'ukari, mariweme menayeitiakaitini, metemaiti Kakaiyari mitimaiweniki mipitiakaiki heitserie hipame muwapitiakaki.

## 4

### *Tsarumuni parewiwamete mira'aitatsie*

<sup>1</sup> Tsarumuni ti'aitame kanayani naitsarie 'Ixa-heri kwieyaritsie.

<sup>2</sup> 'Iki mepihikitikai memiparewiekai:

Mawari wewiwame mexiakame: 'Atsariyaxi  
Tsaruki nu'aya.

<sup>3</sup> Memite'aka'utiwa te'ininiatamete ti'aitametsie  
mieme mepihikitikai: 'Erikurepi meta  
'Ahiyaxi, miki Tsitsa mepiniwemamatikai.

Kemitiuyi ti'utiwame: Kutsapati 'Akiruri nu'aya  
pihikitikai.

<sup>4</sup> Kuyaxi wa'ukiyari: Wenahiyaxi Kuyara  
nu'aya.

Mawari wewiwamete: Tsaruki meta 'Awiya-  
taxi.

<sup>5</sup> Kuwexinaruritsixi wa'ukiyari: 'Atsariyaxi  
Natani nu'aya.

Tsarumuni 'ixatsitiwame meta mawari wewi-  
wame: Tsawuri pihikitikai Natani nu'aya.

<sup>6</sup> Paratsiyu mihiritiariakai: 'Akitsaxi.

Wairiyarika memite'uximaya wahepaitsita  
mihiritiariakai: 'Arunirani 'Awura nu'aya.

<sup>7</sup> Tsarumuni piwarexeiyakai kuwexinaruritsixi  
tamamata heimana yuhutame naitsarie 'Ixaheri  
kwieyaritsie. Yuxexuiti xeiwiyaritsie miki xeimet-  
seri ti'aitame meta 'iparewiwamete mekateni-  
warutamikwakaitini.

<sup>8</sup> 'Iki mepihiki kememitetetewakai:

Kuxi nu'aya pihiritiariakai 'Epirahini kwieyarit-  
sie muhiritiyatsie.

<sup>9</sup> Rekaxi nu'aya pihiritiariakai Makatsi hetsie,  
Tsariwini hetsie, Weti-Tsemetsi hetsie meta  
'Eruni-Weti-Kanani hetsie.

<sup>10</sup> Ketseri nu'aya pihiritiariakai 'Aruwuti (meta  
Tsuku kiekariyari meta naiti Hepexi kiekatari  
wakwie).

- 11 'Awinarawi nu'aya pihiritiariiekai Ruxi hiriari, (Awinarawi nu'aya 'iyaya Tapati Tsarumuni nu'aya pihikitikai).
- 12 Wanaha 'Akiruri nu'aya pihiritiariiekai Tanaki hetsie meta Mekirutsie, metatsiere naitserie Wetsehani, (meta kiekari Tsaretani 'aurie, Ketsireri hetia, Wetsehani ye'ati 'atsita 'Aweri-Mekura paiti, 'akuxi matsi Kumehani paiti).
- 13 Kewexi nu'aya, Xamuti Karaha kwieyaritsie, (Yahixi kiekariteya Manatsexi nu'aya Karaha kwieyaritsie miemete, pihiritiariiekai metatsiere 'Axikuwi Watsani kwieyaritsie, meta haika tewiyari kiekari 'amiyeyeu yukuraru hexeyame wurunitseki reunatikaima).
- 14 'Akinarawi 'Iru nu'aya pihiritiariiekai Makanahini kiekariyari.
- 15 'Akimatsi pihiritiariiekai Nepitahari kwieyari ('Akimatsi Watsemati pawitikikai, Tsarumuni niweya).
- 16 Wanaha Hutsahi nu'aya pihiritiariiekai 'Atsexi kwieyari meta 'Aruti kiekariyari.
- 17 Kutsapati Paruhaki nu'aya pihiritiariiekai 'It-sakaxi kwieyari.
- 18 Tsimi 'Eraha nu'aya pihiritiariiekai Wenikamini kwieyaritsie miemek.
- 19 Kewexi 'Urihi nu'aya pihiritiariiekai Karaha kwieyaritsie (miki Tsikuni pukwiewatikai, 'Amuxeutsixi tiwa'aitiwame, metatsiere 'Uhuki, Watsani kwieyaritsie ti'aitame).

Kura kwieyaritsie pikuwexinaruritikai yuxe-witi xeikia.

*Kemiti parewiyakai Tsarumuni*

20 Kura kwieyaritsie meta 'Ixa-heri kwieyaritsie memitamakai yemeki kwinimieme mekaniyupamekaitini, haramara tetsita xiekari mieme hepai, mana waikawa 'ikwai nixuawekaitini meta miti'iwa metatsiere temawierika.

21 Tsarumuni piti'aitakai yunaime hipati te'aitamete wahetsie 'Eupirate hatuxameyari manuyeka memitama meta pirtsiteutsixi wakwietsie paiti, yaxeikia 'Ekipitu kwieyari manuye'atika paiti. Kepauka Tsarumuni 'amuyeikakai miki nuiwarite yunaiti mepite'iyetuiwakai kemitiwawawirieai.

22 Keyamemiteheuehiakai 'ikwaite xeitukaritsie timieme Tsarumuni, 'ataxewi miriyari heimana 'ataxewi tsienituyari (6.600) kiruyari harina 'aixia mi'ane, meta tamamata heimana haika miriyari heimana huta tsienituyari (13.200) kiruyari harina yaki mi'ane.

23 Tamamata tuurutsixi memiwaiyatiarietika, meta xeitewiyari yeuta memitekwatiwe, meta xeitsienituyari muxatsi, yaxeikia maxatsi, meta hipati maxatsi yiki memi'anene meta wakanari memiwaiyatiarietika.

24 Tsarumuni naitserie te'aitamete pitiwa'aitiwametikai 'Eupirate hatuxameyari manuyeka 'anataiye tau makayuyuipe hepatsie memitamakai Tipitsa 'itsutiati 'atsita Kahatsa paiti, yu'iyariki kayuwati mepu'uwakai naiti kwieya manuye'atikatsie.

25 Kepauka Tsarumuni miti'aitametikai, yunaiti Kura kwieyaritsie kiekatari yaxeikia 'Ixa-heri kwieyaritsie kiekatari, Rani meta Weritsewa

paiti meye'atikaiti, 'aixia 'anemeki mepu'uwakai yu'etipiwaritia meta yu'iteiritsata.

<sup>26</sup> Tsarumuni puwarexeiyakai tamamata heimana huta miriyari kawayutsixi, meta nauka miriyari kuraru memuyenatika kawayutsixi kaxetate memutihapana kuyaxa mieme.

<sup>27</sup> Kuwexinaruritsixi yuxexuiti xeimetseritsie ti'aitame Tsarumuni meta 'iparewiwame-temama mepitewa'atiriwakai 'ikwaite, miki menihiritiariiekaitini memitewamikwaniki tixaiti mikareuyewekaki wahetsiemieme.

<sup>28</sup> Metatsiere tsewara mepi'atiwakai meta miaxa Tsamuruni kawayutsiximama kuyaxa miemete meta te'ikatariwamete wahetsiemieme.

*Tsarumuni kemitimaiwekai*

<sup>29</sup> Kakaiyari Tsarumuni kaniupitiani 'aixia miti'ane meta 'axamiti'ane mitimaikaki meta mitimaiweniki yemeki 'anutiyakameki, kemitiuyemaikai pimirekai xiekari haramara tetsita mieme hepai.

<sup>30</sup> Miki matsi piwara'iwaxi timaiweti yunaime temaiwawemete tau manatineika hepa kiekatari meta 'Ekipitu kiekatari.

<sup>31</sup> Mipai pitiiyi, kwinimieme timaiweti patia xewiti mikayiwe hepai: kemikatimaiwekai 'Etani 'etsirahi tewiyari, kemikatimaiwekai Hemani, meta Karikuri metatsiere Raxira, Makuri niwemama memihikitikai. 'Ayumieme Tsarumuni putamariwaxi naitserie wa'aurie nuiwarite mamanetikateitsie.

<sup>32</sup> Miki peka'utia haika miriyari temaiwawemete waniukiyari meta kwikari xeimiriyari heimana 'auxiwime niawariyari.

33 Miki kiyexi hepaitsita pitiutahekiataxi, kariuxa Riwanu miemetsie 'itsutiati nana kurarutsie miwiwieretsie paiti 'akame. Yaxeikiata yeutari wahetsie pitiuta'ikitaxi, meta memiteheuwitika wahetsie, meta kwiepa yuhukama memiteku'uwatsie, yaxeikiata tsapari wahepaitsita.

34 Yunaiti te'aitamete kwiepa memitama memitehetima Tsarumuni kemitimaiwekai, yuni'arima mepiwareni'awakai memi'enieniki kemitikuxataakai.

## 5

### *Tuki hetsiemieme kememite'ukuha'aritaxi (1Te 5:1-16 - 2Kem 2:1-18)*

1 Merikitsi Hiramiti miti'aitametikai Tiru kwieyaritsie miki 'aixia mepiteyuxeiyakai Rawiri matia, hiki kepauka miretima kename nu'aya Tsarumuni 'anayexeiyariekai 'itimana ti'aitame 'ayeitiarie, 'ayumieme yuparewiwamete peini'airi memeitawairitianiki.

2 Hiki Tsarumuni kaneini'airienita niuki, mipai rehiaweti:

3 «'Eki pepirakumate nepaapa Rawiri pika'uyiwekaxia mitawewieniki yukakaiyari Yawé tukieya, muwa temeyexeiyaniki, waikawa kuyaxa miwewienekaiki kepaukake Yawé miparewi miwara'iwxaxi memeye'uniekai.

4 Hikiri Yawé nekakaiyari pinetsi'upitia kayuwati nemexeiyaniki naitсарie mitiuyehanetsie, hiki nepikawarexeiya meminetsi'aye'unie meta 'uximatiarika pumawe.



5 'Ayumieme nepitawewieni tuki Yawé nekakaiyari hetsiemieme, nepaapa Rawiri mipai mirahiawekaiki: «'Aniwe kemi'ane 'a'utima ti'aitame nemayeitiani, kanitawewimiki tuki nehetsiemieme».

6 »Hiki 'ayumieme ketineta'aita kariuxa metixitekieniki Riwanu hiriyaritsie mieme. Te'uximayatamete nehetsia miemete 'ahetsia miemete wahamatia mepiteta'uximayata, ne nepimatipitiani 'ahetsia miemete kememiteta'iwa kepemitayini. 'Eki pepitimate xewiti 'ena pumawe kiyexi heutaxiteweti Tsiruniyutsixi kememiteheitaxitewawe».

7 Kepauka Hiramī Tsarumuni niukieya mu'eni, waikawa puyutemawiekai, mipai kaniutayini: «'Aixia kerahiawariwani hiki Yawé, Rawiri mupitiaki xeime yuniwe mayexeyaki waikawa timaiweme mitiwata'aitianiki miki nuiwari mumariwe».

8 Hiki Hiramī Tsarumuni kaneni'airieni 'iki niuki:

«'Aniuki nepu'eni ketita peminerawawiriwa. Ne nepimatsiyetuirieni kariuxa meta huku kepaimepeme pemeuyehiwa.

9 Te'uximayatamete nehetsia miemete mepitituanī Riwanu hiriyaritsie mepekatini haramara tetsita mepikatetiani, muwa miki mepitihiani wewerime mepitiwewieni, mepenuhautsitiani hakewa paiti 'eki pemeiyehiwa, muwa mepitixina xeme xemiti'iniki. 'Ekita 'ikwaiki xeikia pepinetsiparewieni netsiparewiwamete wahetsiemieme».

10 Hiki Hiramī pituirienekai kepaimepeme Tsarumuni kariuxa meta huku meuyehiakai,

11 meta Tsarumuni xeiwiyari 'anuyeyeikakaku Hirami 'ikwai p̄tiyetuiriwakai, hamatiana memite'uximaya wahetsiememe, 'ipai tipaimeme: xeitewiyari miriyari 'ikayari tiriku puxuri wahetsie, meta xeitewiyari miriyari merirayari huriwa hatseitiyari.

12 Yawé yuniuki paye'atia Tsarumuni mitimaiweniki kaniupitiani. Hirami Tsarumuni matia tiratu mepuwewi, yunaiti kayuwati meniyuxeiyakaitini.

13 Tsarumuni wairiyarika memite'uximaya katiniwaruta'aitiani xeitewiyari heimana tamamata miriyari naitsarie 'Ixaheri kwieyaritsie.

14 Miki puwareni'awakai Riwanu paiti, peru tamamata miriyari xeikia p̄wareni'awakai, huta metseri yukie mepuka'uxipiwekai. Wairiyarika memite'uximaya p̄hiritiariakai 'Arunirani.

15 Tsarumuni puwarexeiyakai hiritsepai haika tewiyari heimana tamamata miriyari teiteri tetexi tikimete, meta nauka tewiyari miriyari tetexi tsunamete.

16 Meta mana mepu'uwakai haika miriyari heimana haika tsienituyari meyupaimeti te'uximayatamete tewa'aitiwamete.

17 Tuki tenariyari mayaniki, ti'aitame p̄tiuta'ai tetexi 'anenet̄i mitixixianiki 'aixia mi'anene.

18 Te'uximayatamete Tsarumuni hetsia miemete meta Hirami hetsia miemete metatsiere Kewari kiekatari, miki yunaiti mexa mekaniutiharuanita meta tetexi mekaniutixixieni tuki mitawewiyaniki.

## 6

*Tsarumuni tuki kemitiutawewi*  
*(1Te 6:1-29 - 2Kem 3:1-14)*

<sup>1</sup> Merikitsi Tsarumuni Yawé tukieya kaniutsutiani, naurieka wiyaritsie ti'aitati 'Ixaheri kwieyaritsie, hutarieka metseritsie, *Tsiwi* mititewakai. Nauka tsienituyari heimana nauka tewiyari wiyari panuyemiekaiki kepauka 'Ekipitu kwieyaritsie memayeki.

<sup>2</sup> Tuki Tsarumuni mitawewi Yawé hetsiemieme xeitewiyari heimana 'atahuta meturuyari pitewikai, 'atanauka meturuyari 'atayeuti, tamamata heimana haika meturuyari heutitewati.

<sup>3</sup> Tuki hixie kii meukumiakai kitenietsie 'atanauka meturuyari pitewikai tuki hixie 'ukukaiti, nauka meturuyari heimana 'imeriyu 'atayeuti.

<sup>4</sup> Meta Tsarumuni katiniuta'aita tukitsie wapai maxawariexianiki herie 'ahayeyeume taitanata 'etsihayeyeume.

<sup>5</sup> Kii 'ixumeriyari warita kanewewietiyani kii yuheima 'a'ukame.

<sup>6</sup> Kii mukananati huta meturuyaritsie 'etsiwa 'anutiyati patayeukai, hixiapa miemeta huta meturuyari 'imeriyutsie 'etsiwa 'anutiyati patayeukai, waheima miemeteta haika meturuyaritsie 'etsiwa 'anutiyati patayeukai. Tsarumuni tuki waritatsie 'ixumeriyari ya'ayutixirietikaime puta'aitakai kii mawewieretiyani kiyexiyari 'ixumeritsie paiti kaheu'uweme.

7 Kepauka tuki mutawewiyatsie tetexi xixiyatikaimeki xeikia kaniutawewiyani, 'ayumieme kepauka mutawewiya tixaiti pikatiu'enierie tsunarika yuariyari, nitixaiti tima.

8 Kii tuki warita mawewieretiya kitenieyari tuki tserieta hixiapa kii mukanatitsie pawewiyakai, 'imimii pexeyakai wakututunime hixiapa paiti manutiyeyikiniki meta hairiekatsie paiti.

9 Tsarumuni tuki kaniunini, kanenuyekitiiani pikaxi 'anuyetuaka meta mexa 'e'atayeyeume kariuxa kiyeyari.

10 Tuki kemitewikai naitsarie kaneiti-wewiexiani kii yuheima 'a'ukame, xexuiti kii huta meturuyari heimana xetewiyari heimana 'auxiwi tsenitimeturuyari peutitetewakai, pikaxi-yarite tuki 'ixumeriyaritsie peutaxirietikatei kariuxa kiyexiyari pihikitikai.

11 Hik iYawé Tsarumuni mipai katiniutahiawe:

12 «Hikiri tuki pemiwewieneki mipai nepimarahiawe, xika naime 'iniri niukiyaritsie yapetikamieni, naime 'aitsika xika pehaye'atiaka, ne nepeye'atiani kenemutayi nepimatsiparewieni 'apaapa Rawiri kenemitiutahiawixi.

13 Ne 'ana 'ixaheritsixi wahamatia nepukani meta hatsuaku nepikawaku'eirieni neteiriima 'ix-aheritsixi».

14 Kepauka Tsarumuni tuki 'ixumeriyari muni,

15 taitanata kanewakumana kariuxa kiyeyari mexayari, kwiepa tsutime witsikatiniwewieni pikaxi manuyehetsie 'uti'atikaime, meta huku kiyeyari mexayari kaniuyemana kwiepa.

16 Tukita 'upaiti, mutanieretsie paiti, Waikawa Muyepatsie mayanitsie 'aixia kaniwakuyurieni,

'atanauka meturuyari kaniuyeyeukaitini kariuxa mexayari kaniwakumana kwiepa tsutime pikaxi manuyehetsie 'uti'atikaime.

<sup>17</sup> Tukita 'amuyeyeukai, Waikawa Muyepatsie hixie piti'aneikai, miki tamamata heimama 'atahaika meturuyari pitewikai.

<sup>18</sup> Tuki taita kaniwakumana kariuxa mexayari reuku'utikaime, kixauri 'ikiyari meta tuturi 'anutayepietikaiti ha'utikaime. Pikahahekikiakai tetexi 'etsiwa tima, naiti kariuxa kiyeyari muwakinikaiki.

<sup>19</sup> Tsarumuni Waikawa Muyepatsie 'aixia kaniukuyurieni muwa meutatekieniki tiratu kakuniyari Yawé hetsia mieme.

<sup>20</sup> Waikawa muyepatsie, miki tuki mutanieretsie katini'anekaitini, puyeyeukai 'atanauka meturuyari heutatewati meta 'atanauka meturuyari 'atayeuti meta 'atanauka meturuyari heutitewati, huru mihikiaki puwakuwiri, meta mawari taiyame kariuxaki miwewiyakai huru pikawiri.

<sup>21</sup> Metatsiere, Tsarumuni tuki taita naime huru mihikia puwakuwiri, meta Waikawa Muyepatsiet-sie huru puwakuwiri, miki hixieta huru karenayari putawitia.

<sup>22</sup> Miyatititsiari, tuki taita naime huru puwakuwiri, meta mawari taiyame putawiri waikawa muyepatsie hixie muwekai.

<sup>23</sup> Tsarumuni kaniwaruta'aita memitiwewiyaniki yuhutati Kakaiyari teitametemama huriwu kiyeyariki waikawa muyepatsieta memaye'uniki, miki yuxexuiti nauka meturuyari heimana 'imeriyu meputikai.

24 Yuxewiti yu'anate tatseratikaiti nauka meturuyari heimana 'imeriyu piyeukai, xexuiti 'anate huta meturuyari heimana xeitewiyari heimana 'auxiwi tsenitimeturuyari piyeyeukai miyatiti.

25 Hutarieka mieme Kakaiyari teitame yaxeikia piyeukai nauka meturuyari heimana 'imeriyu, yunaiti yuhutati yaxeikia mepinenekai yaxeikia me'aneneti.

26 Yuxexuiti Kakaiyari teitametemama nauka meturuyari heimana 'imeriyu meputikai.

27 Tsarumuni Kakaiyari teitametemama Waikawa Muyepatsietsie kaniwareuta'uitiani hixiapatsie yu'anate metatseratikaime. Yuxexuiti xeime 'anayariki tuki 'ixumeriyaritsie mepeuta'a'axekai, tapakita mepuyuwiyakai tuki hixiapa.

28 Hiki meta Tsarumuni huru kaniwarukawirieni Kakaiyari teitametemama.

29 Tuki taita mewakunekame, mutanieretsie meta 'enahura, kaniwaraku'utiani Kakaiyari teitametemama meta taki hepai 'aneneme metatsiere tuturi 'anutayepietikaime.

30 Meta, huru puyewiri tukita muyeweritsie, mutanieretsie meta manayenieretsie.

31 Waikawa Muyepatsietsie kitenieyaritsie, Tsarumuni 'itupari hutame putiwewi huriwu kiyeyariki, kitenie manuyeka meta kiyexi muka'u 'auxiwime 'etsikinayari pexeiyakai.

32 Miki huta 'itupariyaritsie huriwu kiyeyari mihikitikai, mana Kakaiyari teitamete puwara'utiaxia meta taki 'ikiyari metatsiere tuturi 'anutayepietikaime, meta miki naime huru kanikawirieni.

<sup>33</sup> Metatsiere tukita meutahanitsie mieme kite-nie nauka 'etsikinayari pexeyakai, kiyexi muka'u huriwu kiyeyari pihikitikai.

<sup>34</sup> Meta hutame 'itupari putiwewi huku kiyeyariki, xexuiti 'itupari puhuhutakai 'uyutatunati.

<sup>35</sup> Miki hetsieta piwara'utiaxia Kakaiyari teitametemama meta taki 'ikiyari metatsiere tuturi 'anutayepietikaime, meta mikitsiere huru kanitiwirieni.

<sup>36</sup> Tuki hixie kwitiwa takwa mukumakai kuraruyari hetsiemieme kaniutawewieni haikati tetexi yuheima 'ayahikekaku manata kariuxa kiyeyari kananuyetuarikekaitini heimana.

<sup>37</sup> Kepauka Yawé tukieya mutsutiarie nauka wiyari piti'aitakai Tsarumuni, hutarieka metseriyaritsie.

<sup>38</sup> Miki tuki pinirie, tamamata heimana xewi wiyari ti'aitakaku, 'atahaika metseriyari 'umiekaku, yemeki kehapai memite'iwewieniekakai mipai mete'uximayati. Miyatiti Tsarumuni tuki 'atahuta wiyari pini.

## 7

### *Tsarumuni yuparatsiyu kemitiutawewi*

<sup>1</sup> Metatsiere Tsarumuni yuparatsiyu kaniutawewieni, miki tamamata heimana haika wiyari kaninini.

<sup>2</sup> Pitawewi meta paratsiyu «Riwanu Makukariuxaya» mititewa, huta tewiyari heimana 'auxiwi meturuyari payetewikai, xetewiyari heimana huta meturuyari heimana 'imeriyu 'atayeuti meta tamamata heimana haika meturuyari heimana

'imeriyu heutitewati. Nauka xurukuyari kariuxa kiyeyari 'ukawetikaiti 'apapati pituikakai pikaxite manuyehetei, mikita pikariuxatikai.

<sup>3</sup> Panukakitsiekai kariuxa kiyeyariki huta tewiyari heimana 'auxiwi mukawetika hetsie manakawitsie.

<sup>4</sup> Nenieremete putiwewiya, haika xurukuyari hahakakati yuxexuti mepanuyutaxeiyatikatei.

<sup>5</sup> Naitsarie kitenie mireutahakitiretsie tenimeyari pexeyatikatei 'uta'itsikinatikaime yaxeikia heutatetewame, hahakati peuwikai yuxexuti mepanuyutaxeiyatikatei.

<sup>6</sup> Tsarumuni meta kii kaniutawewieni 'etipiweme, miki mipai pitewikai xetewiyari heimana huta meturuyari heimana 'imeriyu meta tamamata heimana haika meturuyari heimana 'imeriyu 'atayeuti. Hixienata puwekai hepaina 'aneti, 'anukakitiarieti.

<sup>7</sup> Xeimeta kii putawewi 'uwenieya muwayekenitsie, mitiwatixanetiariwanitsie mieme. Miki kiita kaniwakumana kariuxa mexayariki, naitsarie memuye'uwanitsie meta heimana.

<sup>8</sup> Tsarumuni kiiya yuxaita 'akaniuwekaitini xeime kuraruyarita hepaina tiyuxexeyati. Parahuni niweya mutiwiti hetsiemieme, Tsarumuni kanita'aitsirieni paratsiyuya hepaina tiyuxexeyame.

<sup>9</sup> Tenaritsie tsutiti meta heimana paiti tetexi matatei, tuki warie tsutiti meta takwa 'amakuyewatsie paiti 'uyeniereti, tetexi 'aixia mi'aneneki pitiutiwewiya tsatsaiyatikaiti naitsata hautixitekietikaiti 'iniaritikaiti.

<sup>10</sup> Tsutimeyari tetexi 'aneneti pu'itiarie yemeki



'aixia mi'anene, hipati nauka meturuyari reuyeta punenekai hipatita haika meturuyari reuyeta punenekai.

<sup>11</sup> Heimanata mieme yaxeikia tetexi pu'itiarie 'aixia mi'anene, xitekietikaiti tinanaketi, yaxeikia kariuxa pikaxiyari.

<sup>12</sup> Takwa 'amakuyewa kuraruyari piwewiyakai haikati tetexi yuheima 'ayahiketikaiti manata kariuxa kiyeyari kananuyetuarikekaitini heimana meta yaxeikia pi'aneikai Yawé tukieya kitenie kii meukumiakai hixie takwa mukumakai kuraruyari.

*Piinite tukita timieme*

*(1Te 7:23-26, 38-51 - 2Kem 4:2-6, 10, 5:1)*

<sup>13</sup> Hiki ti'aitame Tsarumuni katiniutani'ani Hiram miwitikiemieki Tiru kiekariyaritsie paiti,

<sup>14</sup> miki wiura punu'ayatikai Nepitahari xiyarieya, 'ukiyarieya Tiru pikiekametikai miki piti'uximayatawekai wurunitseki. Hiram yemeki pirakumaikai wurunitseki, 'ayumieme miki ti'aitame Tsarumuni hetsia kaninuani, hiki tita mitiuta'aitarie naime katiniutiwewieni.

<sup>15</sup> Hiram hutame tuxiyu kaniutiwewieni xexeurawime wurunitse tepiyariki, 'atahaika meturuyari pititikai meta 'aiwaritatsie 'auxiwi meturuyari heimana 'imeriyu pupapakai.

<sup>16</sup> Meta hutame tuxiyu mu'uteya kaniutiwewieni witsitiyuxexeyame miki wurunitseki piwewiyatikatei, huta meturuyari heimana xeitewiyari heimana 'auxiwi tsenitimeturuyari putitikai.

17 Herie pikawerekai karena wipiyari hepai 'aneti, hiki xexuiti 'atahuta wipiyari pexeiyatikatei.

18 Xexuime tuxiyu mu'uteyatsie penukuyatsaxia huta xurukuyari kiranara manitsana hepai mi'anene, yuwiyakame wipi matia.

19 Tuxiyu mu'uteyatsie 'atsutsena tuturiyari hepai 'aneneme panuyatsakai xeimeturuyari heimana nauka tewiyari tsenitimeturuyari pinenekai.

20 Yaxeikia peixeiyatikatei tuturi 'amanakupatsie kiranara manitsana hepai mi'anene, huta tsienituyari paime karena wipiyari hetia 'anakutetikaime.

21 Kepauka Hiram mutini tuki kitenie kanika'uitiani, hiki kanititeriwa tuki tserieta mutiwekai Kakini katiniteriwa meta 'utatana mutiwekai Wuhatsi katiniteriwa.

22 Miki tuxiyu putinirie kepauka mu'uteya tuturi hepai mi'anene manuyatsarie.

23 Meta katsu haa makatuare kaniutawewieni tepia kwaxiyariekameki 'eyeukame xikiraiyeme, nauka meturuyari heimana 'imeriyu 'anutatewame, huta meturuyari heimana xeitewiyari heimana 'auxiwi tsenitimeturuyari hautitewame. Meta tamamata heimana haika meturuyari heimana 'imeriyu yeukame.

24 Tenimeyaritia petayatsaxi huta xurukuyari kixauri 'ikiyari, huta tewiyari heimana tamamata tsenitimeturuyaritsie tamamata pakayaxikekai, miki naiti katsu kixaurite puyuxewiriyakai.

25 Katsu 'emiyeewa tamamata heimana huta turutsixi wurunitseki memiwewiyatika wahetsie

puyemakai hetiana mepeutakikitsakai, yuhaikati tuurutsixi tayeta mepeutinenierekai, yuhaikatita tau makayuyuipeke hepatsie, yuhaikatita tatsutia hepatsie, meta yuhaikatita tau manatineika hepatsie.

<sup>26</sup> Katsu haa makamare 'atahaika tsenitimeturuyari pitsuikai, meta tenimeyari ye'i tenimeyari hepai kani'anekaitini meta tuturi mitaxutuixime hepai pitiyuxexeiyakai. Mikitsie huta tewiyari heimana nauka miriyari rituruyari pirakanakekai.

<sup>27</sup> Metatsiere Hiram tamamata kaxetate 'etsipepeme kaniutiwewieni wurunitse tepiyariki, xeimeturuyari heimana nauka tewiyari tsenitimeturuyari pitikai, meta mipaita yaxeikia 'atayeyeti, meta xeimeturuyari heimana xeitewiyari heimana tamamata heimana 'auxiwi tsenitimeturuyari 'utitikame.

<sup>28</sup> 'Etsatana naitsata wurunitse tepiyari 'etsitsutsuiti kaneutimanekaitini.

<sup>29</sup> Mikitsie mepawewiyatikatei mayetsi, tuurutsixi meta Kaka iyari teitametemama, meta miki wayeta meta wahetia tenimeyaritsie pata'utikatei xawari.

<sup>30</sup> Xexuiti kaxeta xikirawime naukame panuyemanaikai wurunitse tepiyari, meta hetsiena muyemane manuyehe wurunitse tepiyari pihikitikai, maimawame yuhetia peixei yakai tepia kwaxiyarietikaime naukame mituikatika.

<sup>31</sup> Katsu tsimiyewa manuyemaretsie puwatixawakai, hetianata huta tewiyari heimana 'auxiwi tsenitimeturuyari heukatewakaku xikiraiyeti mana puyemakai haika tewiyari heimana

'atahuta tsenitimeturuyari 'anutatewati, miki hetari muwakaxawa pihikitikai mautimane hetia miti'utika, muta'itsikinatika pikaxikirawikai.

<sup>32</sup> Mixikirawi kimana mukuyeikani meutimane hetia puyemanekai, mixikirawi hetsiena muyemane puyuxewiriyakai naiti kaxeta matia, naiti 'ikateya mixikirawi haika tewiyari heimana 'atahuta tsenitimeturuyari piyeyeukai,

<sup>33</sup> miki naiti wurunitse kwaniyariekameki piwewiyakai. Kaxeta 'ikateya hepai pi'anenekai, manuyehe, mixikirawi, mixikirawitsie miye'u meta hixiapa meutetika.

<sup>34</sup> Xexuiti muta'itsikinatikatsie peixeyatikatei wiwiereme para mikuyuitianiki, miki wiwiereme kaxeta matia piyuxewiriyakai.

<sup>35</sup> Kaxeta kemayetewi yutenimeyari pexeyakai wapaiti xeitewiyari heimana huta tsenitimeturuyari 'atayeume. Tepia 'itsikina mukaheitika meta meutimane 'etsimitsutsui piyuxewiriyakai wapaiti mitiuyepine matia.

<sup>36</sup> Hirami 'etsikina tepia mukaheitikatsie meta mautimanetikatsie piwara'utiaxia Kakaiyari teitametemama, mayetsi, taki meta wa'aurie tuturi meta xawari hakewa mireukunanakekai.

<sup>37</sup> Mipaita katiniwewieni naime tamamata kaxetayari, naiti miki 'auxeikia katiniutiwewiyani yaxeikia pi'anenekai yaxeikia pipapakai.

<sup>38</sup> Hirami yaxeikiata katsu 'itsimiyeyeu kaniutiwewieni, xexuime kaxeta hetsiemieme. Xexuiti katsu xeimeturuyari heimana nauka tewiyari tsenitimeturuyari piyeyeukai, 'atahaika tsienituyari heimana nauka tewiyari rituruyari pirakanakekai haa.

39 'Auxiwime tuki tserieta kaniti'uitiani meta 'utatanatsie yaxeikia paimeme puti'uitia. Katsu 'emiyewa haa mayema tuki 'itsikinayaritsie tseri-etana hurawa kaniutakeni.

40 Yaxeikiata katiniutiwewieni, xarite, tepia 'amititi manuxite, meta xakirite xuriya kwekwewiwame. Hiki Hiramī naime mipai katiniutinini, Yawé tukieyata timieme mirayaniki Tsarumuni kemitita'aitiakai, tatsiari:

41 hutame wurunitse tuxiyuyari,  
hutame tuxiyu mu'uteya tuturi hepai tiyuxex-eiyame,

meta wurunitse wipiyari muhuta tuxiyu mu'uteya hetsiemieme,

42 nauka tsienituyari kiranara xikiti hepai mi'anene 'ikiyari, huta xurukuyari manukutetikatei xexuime wipitsie,

43 tamamata kaxetate meta tamamata katsu yaki miyeyeu maimawame kaxetate hetsiemieme,

44 katsu 'emiyewa haa makamare meta tuurut-sixi tamamata heimana huta memituika,

45 xarite, tepia 'amititi manuxite meta xakirite xuriya kwekwewiwame.

Hiramī 'iki miyamitipaimē Tsarumuni mitiutiwewiri Yawé tukieya hetsie timieme mirayaniki naiti wurunitse tepiyariki mixawatiki pitiwewiyatikatei.

46 Ti'aitame katiniuta'aita Kurutani mayeweritsie mititiwewiyaniki kwieta 'iniarita mititixeriyarieniki, Tsukuti mirakutewatsie meta Tsaretani wahixiapa.

47 Piinite wurunitseki mītiutiwewiya  
 pītimīrekai 'ayumieme Tsarumuni  
 pīka'itī'iniataxi kemīrahetekai, 'ayumieme  
 naiti wurunitse kemīrahetekai pīka'uyiwekaxia  
 mī'iniataki.

48 Metatsiere Tsarumuni katiniuta'aita  
 hipameta piinite Yawé tukieyata timieme:

'ikwa matitaiyariwa huruki mīwewiya,  
 meta mexa huruki mīwewiya paa manamarike  
 Yawé hetsiemieme,

49 kixeme 'uitiwamete huru mīhikiaki  
 muwewiyatika Waikawa Muyepatsie hixie  
 pīti'ukai, 'auxiwiti tserietana pīti'ukai,  
 'auxiwitita 'utatana,  
 tuturi huruki mīwewiyatika, kixemete, meta  
 kīmeme titikime, mikita naiti huru mīhikiaki  
 pītiwewiyatikatei,

50 tekixite, tixikamete, xakirite xuriya  
 kwekwewiwame, xari 'eminena meta 'ikwa  
 taiyame 'etsimipepe,  
 meta huru tepiayari 'itupari mīwiyatika  
 Waikawa Muyepatsietsie 'itupariyari, meta  
 Muyepatsietsie 'itupariyari hetsiemieme.

51 Hiki kepauka mītiutinīrie naiti ti'aitame  
 Tsarumuni mītiuta'aitakai Yawé tukieya  
 hetsie timieme, 'ana Tsarumuni pītiuta'aitaxi  
 mīti'atiariēniki huru, pīrata, meta piinite  
 paapaya Rawiri Yawé mītiyetuiriekai, hiki  
 katiniuti'uta Yawé tukita waikawa mīraye'atika  
 mītiuyepinetsie.

## 8

*Kakuni tiratu 'iniariyari kemirekweiya tukita  
(1Te 8:1-21 - 2Kem 5:2-6:11)*

<sup>1</sup> Hiki ti'aitame Tsarumuni katiniwarutani'airieni 'ukirawetsixi 'ixaheritsixi meta yunaima nuiwarite wa'ukiyarima, meta 'ixaheritsixi wapaapama, hixiena memiyukuxeirieniki Kerutsareme, kakuni tiratu 'iniariyari Yawé hetsiemieme memanukweniki, Rawiri kiekariena memiyekweniki, Tsiyuni mirakutewatiti, tukita memeitateniki.

<sup>2</sup> Hiki 'etanimi metseriyaritsie, 'atahutarieka metseriyari 'ixiarariyaritsie, 'ana yunaiti 'ixaheritsixi mekaniuyukuxeirieni ti'aitame Tsarumuni hixie.

<sup>3</sup> Kepauka memu'axia yunaiti 'ukirawetsixi 'ixaheritsixi, hiki mawari wewiwamete kakuni tiratu 'iniariyari mekaniutikweni.

<sup>4</sup> Rewitsixi mewaparewiekaku, kakuni tiratu 'iniariyari Yawé hetsiemieme mekanekweni, meta tinaima 'ixuriki tukiyarita mitiyepikai mitipatsietika mekatenetini.

<sup>5</sup> Ti'aitame Tsarumuni meta hamatiana memu'uwakai 'ixaheritsixi memiyuxeiriekai mana tiratu kakuniyari hixie mekaniwarutimawa muxatsi meta tuurutsixi meyumireme miwaruti'iniata pikayiwekai.

<sup>6</sup> Hiki mawari wewiwamete mekaneikweni kakuni tiratu 'iniariyari Yawé tukita mutanieretsie, Waikawa Muyepatsietsie, muwa Kakaiyari teitametemama wa'ana hetia mekaniteni.

<sup>7</sup> Miki Kakaiyari teitametemama yu'anate metaweratikaiti mutanieretsie, kakuni

mepanukanakai meta kiyexi kimana  
mikukweiyane.

<sup>8</sup> Kiyexi 'ikwekweweme 'apitikai kitsimeyarite  
Muyepatsie paiti puyuhekiakai Waikawa  
Muyepatsie hixie, takwa paiti pikayuhekiakai,  
hiki 'akuxi yaxeikia pire'ane.

<sup>9</sup> Miki kakunitsie tetexi hutati piyemanekai  
Muitsexi mana meikamanaxi Huré  
mirakutewatsie, Yawé tiratu muwewitsie  
'ixaheritsixi wahamatia 'Ekipitu me'ayekineku.

<sup>10</sup> Kepauka mawari wewiwamete memiwayeki  
Muyepatsietsie, muwa haiwitiri kaniutahine  
Yawé tukieyata.

<sup>11</sup> Miki hai mutahinixiki, mawari wewiwamete  
mepika'iyiwekaxia tawari memiteta'uximayataki,  
Yawé xawatiriyaya mumariwe muwa  
mihinekaiki.

<sup>12</sup> Hiki Tsarumuni mipai kaniutayini:

«Yawé, 'eki mipai peputayi kename  
haiwitiritsie pe'uyeikani muyiwitsie,

<sup>13</sup> ne matsi tuki yemeki mimariwe  
nepimatsi'utawewiri, muwa pemayekaniki  
'aheyemeki».

<sup>14</sup> Hiki Tsarumuni 'akaniutakeni Kakaiyari  
tawawirienike 'aixia miwayurieniki yunaime  
'ixaheritsixi mana memiti'ukai,

<sup>15</sup> mipai kaniutayini:

«'Aixia ke'itiarieka Yawé 'ixaheritsixi  
takakaiyari, miki hiki yutirikariyaki piraye'atia  
nepaapa Rawiri kemitiutahiawixi mipai 'utaiti:

<sup>16</sup> “Kepauka paititi 'Ekipitu nemiwarayewiti  
neteiterima 'ixaheritsixi, ne xeime kiekari  
nepika'anayexei 'Ixaheri nuiwarimama watsata



mana nemitawewiyarieniki tuki hakewa nemayekaniki, matsi Rawiri pita nepanayexei nete'iterima 'ixaheritsixi mitiwata'aitianiki”.

<sup>17</sup> »Merikite, nepaapa Rawiri waikawa piyuwairiyakai mitawewieniki tuki Yawé hetsiemieme, 'ixaheritsixi takakaiyari,

<sup>18</sup> peru Yawé mipai pititahiawixi: “Nehapaitsita 'aixia pi'ane pemi'awairiyaki tuki nehetsiemieme pemiwewimikiki.

<sup>19</sup> Peru, 'eki pepikahikitini peminetsitawewirieni, 'aniwe pita 'ahetsie miyeyani pitiyurieni, miki tuki pitawewieni nehetsiemieme”.

<sup>20</sup> »Hikiri Yawé katinaye'atiani kemutayi: Yemeki kemutayikai, hiki ne nekananukakeni nepaapa Rawiri 'utima nemitita'aitaki 'Ixaheri kwieyaritsie meta tuki nekaniutawewieni Yawé hetsiemieme, 'ixaheritsixi takakaiyari.

<sup>21</sup> Muwa kakuni hakewa meutahuni nepukuha'aritia, tiratu 'iniariyari mexeiya Yawé meripaiti ta'ukiyarima wahamatia miwewi kepauka 'Ekipitu miwarayewiti».

### *Tsarumuni kemitiuyutanenewi*

*(1Te 8:22-53 - 2Kem 6:12-40)*

<sup>22</sup> Hiki meta, Tsarumuni mawari taiyame Yawé hetsiemieme hixie kaniutakeni, hiki yunaime 'ixaheritsixi memiyuxeiriekai wahixie, yumamate teiki kanetseraxiani muyuawitsie,

<sup>23</sup> mipai 'utaiti:

«Yawé, 'ixaheritsixi takakaiyari, xewitita Kakaiyari 'apika'uyeika 'ahapai 'aneti taheima muyuawitsie meta 'ena kwiepa, 'ekitsi 'atiratu pekanaye'atiwani meta

pekaniwanenimayaka yuheyemeki kemi'ane memimate'uximayatsirie meta yu'iyariki memimatsi'uweiya.

24 Yapepitiuyuri 'ari nepaapa Rawiri mat-siparewiwame kepemitiutahiawixi, 'iki tukaritsie 'atirikariyaki pepiraye'atia kepemititahiawixi 'aniukiki.

25 »Hikita, Yawé, 'ixaheritsixi takakaiyari, yaxeikiata kenaye'atia kepemititahiawixi nepaapa Rawiri, kepauka 'ipai pemititahiawixi: "Xika 'aniwema 'aixia metekahuni meta xika menetsi'uweiyani 'ahapai, yuheyemeki mepihikitini 'anuiwari hetsiemiemete te'aitamete 'Ixaheri kwieyaritsie nehixie me'u'uwati".

26 'Ixaheritsixi takakaiyari, hiki kenaye'atia miki kepemititahiawixi nepaapa Rawiri mati'uximayatsiriwame.

27 »Perutsi ɔtiyiwekuta, nekakaiyari, 'eki kwiepa pemukani? Matsi muyuawititi, tsepa kemeutitewa, mana pepikatinake, matsi 'iki tuki nemutawewi 'etsipupe.

28 Peru, Yawé nekakaiyari, nenenewieri keneu'eni meta waikawa kenemimatiwawirie ne matsiparewiwame. Keneu'eni nehiwari meta nenenewieri hiki nemiyetua 'ahixie.

29 Kenexeiyani tukariki tikariki 'iki tuki, hakewa mimatsihenakixi muwa pemayekaniki, pemi'eniekaki ne ti'a'uximayatsiriwame nenenewieri 'ena nemiyetuaya.

30 Keneneu'eni waikawa kenemimatiwawirie ne ti'a'uximayatsiriwame meta 'ateiterima 'ixaheritsixi kepauka memiyunenewie 'uwa. Ke-

tane'enieka muyuawitsie paiti, hakewa 'eki pe-meyeika, ketaneu'eni meta ketatineuyehiwiri.

31 »Xika xewiti 'axatiuyurieni yu'iwa hepaitsita, xika 'utani'arieni 'ena 'atuki manuwe mawari taiyame hixie yamitayiniki,

32 'eki keneu'eni muyuawitsie paiti meta kemitiheitserie ketineuyuri te'a'uximayatsiriwamete wahetsie. 'Uximatiarika keneupitia kemi'ane 'axamitiuyuri yemeki kemireuyewetse hetsiena mieme, kemi'aneta 'axamikatuyuri keneuxina heitserie 'amuyeikaki.

33 »Kepauka 'ateiterima 'ixaheritsixi memiwaraye'unie memiwaraiwa 'ahepaitsita 'axamemite'uyuriki, xika kwitiwata mehan-uaxiani 'ahetsia mariweme mematsi'ayeitiani, xika meyutanenewieni waikawameki 'ena tuki manuwe,

34 'eki keniwaru'eni taheima muyuawitsie paiti meta ketiniwareuyehiwiri 'ateiterima 'ixaheritsixi ke'axamemite'uyuri meta keniwarakunuitia 'iki kwieyaritsie wa'ukiyarima pemiwayetuiritsie.

35 »Kepauka 'ateiterima 'axamemiteyurieni 'ahepaitsita, xikata 'eki pewaruhiweritiani xika muyuawitsie pereunani mikakawiyeki, xikata miki kwitiwa meyutanenewieni 'ena meta mariweme mematsi'ayeitiani meta ke'axamemite'uyuri mete'uhayewa,

36 'eki keniwaru'eni muyuawitsie paiti meta ketiniwareuyehiwiri ke'axamemite'uyuri mate'uximayatsiriwamete, 'ateirima 'ixaheritsixi. Keniwaruwitiximeni huye 'aixia mi'ane memuweiyani meta wiyeri kenani'a 'iki

kwieyaritsie, mīti'apiini, 'ekitsi pekaniwaye-tuirieni 'ateiterima mītiwahetsiememetiniki.

<sup>37</sup> »Kepauka 'iki kwieyaritsie mihaakaxatini, kwiniya muxuaweni, mika'ukawiwiyeni, yatini kepauka waxa kwiniyayari mitaweni, yatini 'utsikari xika me'utixuawere, yatini memitatsi'aye'unie xeime takiekari warie xika mehatetikani, meta tsepa tita 'uximatiarika mitinua yatini kwiniya,

<sup>38</sup> xika kwitiwata yuxexuiti 'ixaheritsixi, yametehetimame yikimāna ke'axamemite'uyuri, xika yumamate 'iki tuki hepa mehatatseraxiani, meyunenewietī meta waikawameki mematsi-wawirietī,

<sup>39</sup> 'eki keniwaru'eni muyuawitsie paiti, hakewa pemeyeika, meta ketiniwareuyehiwiri. Yakeniwaruyuri yuxexuiti kememite'u'uwakai, 'ekitsi pekatinimaika, 'eki xeikia tewi 'iyarieya pekanimaika.

<sup>40</sup> Mipai miki yunaiti 'eki mepimatsimakaxeni mexi 'ena kwiepa me'u'uwani meripaiti ta'ukiyarima pemīwayetuiritsie.

<sup>41</sup> »Yaxeikiata 'ateewa kiekame 'ateiterima 'ixaheritsixi wahetsia mikamieme, peru metsihemarietī kepemitiyuriene meyetia 'ateewa paiti xeime kwieyaritsie.

<sup>42</sup> (Mipai pitiyini, teiteri mepitetamarieni kepemītitewa meta 'atirikariya kepemīranakani'awa meta kepemītitirikaiye). Kepauka miki 'ateewa kiekame munuani meta muyutanenewieni 'ena 'iki tuki manuwe,

<sup>43</sup> 'eki keneu'eni muyuawitsie paiti, hakewa pemeyeika, yaketineupitia ketita

mimatitawawirieni. Mipai yunaiti teiteri kwiepa memitama mepimatsihetimani meta 'ateiterima 'ixaheritsixi wahepai, 'eki mepimatsimakaxeni meta mipai mepitehetimani kename 'iki tuki nemitawewita 'eki pehahawariwa.

<sup>44</sup> »Yawé, kepauka pemiwarayewitini 'ateiterima memiwaraye'unie memiwakwiyuki, tsepa hakewa, xika nenewieri mematsipitiaka meta xika kiekari pemenayexei hepa mehataneniereni, tuki nemitawewi 'ahetsiemieme hepa,

<sup>45</sup> 'eki keneu'eni muyuawitsie paiti wanenewieri meta waikawameki ke-memimatewawirie, hiki kememite'anuyehu wahatsie keneutanua.

<sup>46</sup> »Merikite xewiti tewi 'amika'uyeikaki 'axamiti'ane hetsiena mitiumawe, xika 'ateiterima 'axamete'uyurieni 'ahepaitsita, xika 'eki pewaruyehaka pewayetuan miwaraye'unie hetsia miwaranuhapaniki xeime kwieyaritsie, heteewakaku yatini hehurakaku,

<sup>47</sup> xika xeime kwieyaritsie mehehapanieme, memiwarai'iwaxi wakwieyaritsie, xika mete'uhayewa ke'axamemite'uyuri, meta xika 'ahetsia me'u'axiani, xika 'ipai mete'uyunenewieni: “Tame 'axatepitemite'uyuri, mipai tepitehetima kwiniemieme 'axatepitemite'uyuri”,

<sup>48</sup> meta mana memiwaraye'unie memiwarehapa wakwieyaritsie paiti xika 'ahetsia yu'iyariki meyuyetuan meta kememiteyumateki, xika nenewieri memetsiheyetuirieni meta

kwie wa'ukiyarima pemiwayetuiri hepa xika  
 mehataneniereni meta kiekari pemenayexei  
 hepa meta tuki 'ahetsiemieme nemitawewi hepa,

<sup>49</sup> 'eki wanenewieri meta waikawameki  
 kememimetewawirieka keneu'eni muyuawitsie  
 paiti, hakewa pemeyeika, hiki kememite'anuyehu  
 wahatsie keneutanua.

<sup>50</sup> Ketiniwareuyehiwiri 'ateiterima, 'ax-  
 amemite'uyuri 'ahepaitsita, ketiniwareuyehiwiri  
 naime titaki memimatehiweritiakai.  
 Yaketineuyuri memiwaraye'unie  
 memiwatinenimayataki,

<sup>51</sup> 'ateiterimatsi mekanihikitini 'ix-  
 aheritsixi, 'ahetsia mekanimiemetetini,  
 'eki 'Ekipitu pemiwarayewiti kwinimieme  
 mete'uximatariiekaku huxunuta memayeteni  
 hepai meteyumaikaku.

<sup>52</sup> »Keneu'eni nenenewieri waikawa  
 kenemimatiwawirie meta 'ateiterima  
 'ixaheritsixi keniwa'enieka. Tsepa kepauka  
 memimatsihahiaweni keniwa'enieka.

<sup>53</sup> 'Eki pepiwaranayexei yunaime  
 kwiepa memitama watsata, 'ahetsia  
 miemete memihikitiniki. Mipai pepititaxatia  
 matsiparewiwame Muitsexi teiteri mipai  
 mitiwataxatianiki, kepauka 'eki, Yawé Kakaïyari,  
 'Ekipitu ta'ukiyarima pemiwarayewiti».

<sup>54</sup> Tsarumuni mawari taiyame Yawé  
 hetsiemieme hixie pititunumawekai teiki  
 hemeti. Kepauka mitiutahayewaxi yunenewieti  
 waikawameki mipai Yawé tiwawirietí,  
 kananukukeni,

<sup>55</sup> hiki 'a'utakeka, Kakaïyari kaniutawawirieni  
 'ixaheritsixi memiyuxeirikai 'aixia

miwayurieniki, mipai 'utaiti karima:

<sup>56</sup> «'Aixia kerahiawariwani Yawé, yemeki kemutayi pitatsi'uka'uxipitia yuteiterima 'ixa-heritsixi. Nixeime pikahayewa witsikemutayi heye'atiwati Muiťsexi kemitiutahiawixi mikita yamitatiutahiawixi.

<sup>57</sup> Yawé takakaiyari tahamatia ke'uyeikani meripaiti ta'ukiyarima wahepai, hatsuaku pikatatsiku'eirieni pikatatsinutuitani.

<sup>58</sup> Yaketatiu'iyaritiani hetsiena mieme xeikia yatemitakahuniki, temiweiyaniki huyeya, yatemitakahuniki 'aitsikayatsie meripaiti ta'ukiyarima miwayetuiritsie.

<sup>59</sup> Tukariki tikariki Yawé yakere'eriwani naime kenemititawawiri, nehetsie munuakaki 'iparewiwameya nemihikiki meta xeme teiterimama 'ixaheritsixi, xexuime tukaritsie kemireuyeweka.

<sup>60</sup> 'Ana mipai yunaiti teiteri kwiepa memitama mepitemaika kename Yawé Kakaiyari hiki, kename tawari xewiti 'umawe.

<sup>61</sup> Hikiri xekenayexeiyaniki yuxewime Yawé takakaiyari xeyunaiti, yaxeketenekahuni naime 'aitsikateyatsie yaxeketeneu'uwani hiki kexemitayurie yaxekia».

### *Tuki 'ixiarariyari*

*(1Te 8:62-66 - 2Kem 7:1-10)*

<sup>62</sup> Hiki ti'aitame, yunaime 'ixaheritsixi wahamatia, mawarite kaniuwewieni Yawé hixie.

<sup>63</sup> Tsarumuni kayuwati memexeiyaniki mawariyari kaniuwewieni, xetewiyari heimana huta miriyari tuurutsixi meta xeitsienituyari heimana xetewiyari miriyari muxatsi

kaniwarutimawa Yawé hetsiemieme. Mipai ti'aitame meta yunaiti 'ixaheritsixi tuki Yawé hetsiemieme 'ixiarariyari mekateniuwewieni.

<sup>64</sup> Miki tukaritsieta ti'aitame takwa hixiapatsie mieme patsiekame kanayeitiani, Yawé tukieya hixie mukuma, meta mana mawari taiyariyari kaniuwewieni meta hatsite mawariyari meta wiiya kayuwati memexeianiki mawariyari hetsiemieme, mawari taiyame wurunitseki miwewiya Yawé hixie muwekai 'etsipupekai, 'iki mawarite pimiirekai mana pikatinakekai.

<sup>65</sup> Hiki mipai, Yawé hixie, Tsarumuni meta yunaiti 'ixaheritsixi 'ixiarari mekateniuwewieni 'atahuta tukari, meta tawarita 'atahuta tukari 'akuxi mekaniuyurieni: naitiri tamamata heimana nauka tukari 'ixiarari patia. Miki 'ixiararitsie naitarie teiteri mepayeixia, Rewu-Kamati mirakutewatsie meye'atikaiti 'atsita 'Ekipitu hatuxameyaritsie meye'atikaiti, yemeki meyumireti mepuyukuxeri.

<sup>66</sup> 'Imatirieka, Tsarumuni kaniwaruta-teutiani teiteri, miki Kakaiyari mekani-utawawirieni ti'aitame 'aixia miyurieniki hiki mekanakunuaxiani yukiekaritetsie, meyutemamawieti waikawa yemeki Yawé naime hepaitisita 'aixia mitiuyuriki tiyu'uximayatsiriwame Rawiri hetsiemieme meta yuteiterima 'ixaheritsixi.

## 9

*Kakaiyari tiratu kemituwwewi Tsarumuni hamatia*  
(1Te 9:1-9 - 2Kem 7:11-22)



<sup>1</sup> Kepauka Tsarumuni mini 'iwewieneti tuki Yawé hetsiemieme meta paratsiyu 'amupa, mipai pireye'atia kemitiku'eriwakai meta kemitiyikihiawekai,

<sup>2</sup> Yawé hutarieka kaniuyuhekiata hixiena kemitiuyuhekiataxi Kawahuni mirakutewatsie,

<sup>3</sup> mipai katinitahiawe Yawé:

«'Anenewieri nepu'eni meta waikawameki kepeminetiutawawiri. Patsiekame nepayetiiani miki tuki pemitawewi muwa nemayekaniki yuheyemeki. Nepixeiiani meta ne'iyariki nepinaki'erieka yuheyemeki.

<sup>4</sup> »Ekita, xika 'ape'uyeikani nehixie 'aixia 'anemeki, 'aiyari heitseriekaku, mitikamiekai hepai 'apaapa Rawiri, xika yapetikayani naimetsie kenemimatita'aitiani meta xika pe'eye'atiani ne'aitsikate meta ne'iniari niukiyari,

<sup>5</sup> 'ana ne yanepitiyurieni yuheyemeki 'a'uweni 'amuweniki xemite'aitaniki 'Ixaheri kwieyaritsie, 'apaapa Rawiri kenemitiutahiawixi, mipai nerehiaweti: "Hatsuaku pikaheuyeweka 'anuiwaritsie miemetiti miti'aitani 'Ixaheri kwieyaritsie".

<sup>6</sup> »Peru xika xeme yatini xeniwema mete'uhayewa mekaheye'atiani ne'iniari niukiyari meta ne'aitsikate nemixeyetui, xika menetsi'uku'eirieni hipame pita kakaiyarixi memitewa'uximayatsiriekaki meta memiwarayexeianiki,

<sup>7</sup> ne 'ixaheritsixi nepiwarakumaweriya kwie nemiwayetuiritsie meta tuki nepitixani'erieni patsiekame nemayetiia nehetsiemieme. Hiki

'ana 'Ixaheri 'atsieriwame payani yunaime teiteri wahetsiemieme.

<sup>8</sup> Tsepa hiki 'iki tuki mīmariwe, paye'ani tukari kepauka yunaiti kemi'ane hixiena muyeyani pitimani, meta nanaimarikaki mipai katinita'iwaumiki: “¿Titayari Yawé miya tiwaruyuri 'iki teiteri meta 'iki tuki?”

<sup>9</sup> Mipai pitita'eiyarieni: “Yawé memuku'eiriki yukakaiyari, 'Ekipitu miwarayewiti wa'ukiyarima meripaiti 'ixaheritsixi, hipame pita kakaiyarixi mepiwaranukuwei, mepiwarayexeiyakai meta mepitewa'uximayatsiriekai. 'Ayumieme Yawé 'uximatarika pupitia waikawa wahetsie”.

*Tawari tita mitiutiwewi Tsarumuni  
(1Te 9:10-28 - 2Kem 8:1-18)*

<sup>10</sup> Ti'aitame Tsarumuni xeitewiyari wiyari kaniuyurieni kii hutame wewieneti 'amipapa, tatsiari, Yawé tukieya meta paratsiyu 'amupa,

<sup>11</sup> 'arikeke Tsarumuni Hiram Tiru kwieyaritsie ti'aitame katiniyetuirieni, xeitewiyari kiekarite Karereya kwieyaritsie miemete, Hiram miparewiki kariuxa kiyeyariki meta huku kiyeyariki metatsiere huru kepaimeme meuyehiakai.

<sup>12</sup> Peru kepauka Hiram mayetia Tiru kwieyaritsie, heixeyamieka kiekarite Tsarumuni miyetuiriekai, miki pika'inakixia.

<sup>13</sup> Hiram mipai kaniutayini: «Neuxei ne'iwa, 'iki kiekarite peminsiyetui tixaiti pikatiyunaki'erie». 'Ayumieme mana Kawuri\* katiniuteriwa, hiki 'akuxi yaxaikia

---

\* **9:13 9:13** Kawuri. Tixaiti mikatiyunaki'erie panuyine, Tiru kiekatari waniukiki.

katinakutewaka.

<sup>14</sup> Matsi Hirami peini'akai huru Tsarumuni hetsia haika miriyari heimana 'atanauka tsienituyari heimana haika tewiyari (3.960) kiruyari.

<sup>15</sup> 'Uximayatsika waikawa mahete hetsiemieme, ti'aitame Tsarumuni kaniwarukuxeirieni te'uximayatamete para tuki memitawewieniki Yawé hetsiemieme, meta paratsiyuya, meta kwieki tehiniyamete, meta Kerutsareme kuraruyari hetsiemiemete, meta kiekari Katsuxi 'aixia memiyurieni, Mekiru meta Ketsehexi kiekariyari.

<sup>16</sup> Parahuni ti'aitame 'Ekipitu kiekame, Ketsehexi kiekariyaritsie nuaka puwarutakwi pe'iwaxi, hiki pitataiyaxi meta puwarukwi kiekatari kananeutsixi. Hiki miki kiekari, 'imikieri neikiyapa mieme kanayeitiani, yuniwe kaniumini 'utiwikieku, Tsarumuni mitiwiti.

<sup>17</sup> 'Ayumieme Tsarumuni 'aixia kanitiyurieni kiekarite Ketsehexi mieme, Weti-Kuruni watipaiti mukuma,

<sup>18</sup> Warati kiekariyari meta Tamuxi, makumawetsie mukumanekai miki kwieyaritsie,

<sup>19</sup> metatsiere naime hakewa memiteheuta'utanikekai, meta kaxetate kuyaxa miemete hakewa meti'utani meta kawayutsiximama wahetsiemieme, meta tita mireuwewimikikai Kerutsareme pitiutiwewi, meta Riwanu mirakutewatsie meta naitсарie keyeumetsie miti'aitakai.

<sup>20-21</sup> Nuiwarite teiteri memika'ixaheritsixi (tatsiari, 'amuxeutsixi, hetitsixi, peretseutsixi, heweutsixi meta kewutseutsixi, miki teiteri memuyuhayewaxi miki kwieyaritsie 'ixaheritsixi

memikawarukwi), Tsarumuni wairiyarika wapitiati katiniwaruta'aitiani 'uximayatsika maheteki, hiki 'akuxi yaxeikia mekateniyurieka.

<sup>22</sup> Peru Tsarumuni 'ixaheritsixi wairiyarika te'uximayatamete pikawarayeitia, matsi kuyax-imama mepihikitikai, hurawa 'iparewiwamete, kuyaxi tewa'aitiwamete, kaxetate kuyaxa mieme ni'awamete meta hipati kuyaxi kawayutsixi wahetsie memutei mepihiritiariekai.

<sup>23</sup> Metatsiere Tsarumuni puwarexeiyakai 'auxiwime tsienituyari heimana huta tewiyari heimana tamamata (550) mira'uximayatsietsie te'aitamete, te'uximayatamete mepiwaxeiyakai.

<sup>24</sup> Kwie mutihiniyarie Kerutsareme putiwewiya 'arike kepauka ti'aitame Parahuni niweya 'uka mayetia Rawiri kiekariena, paratsiyu Tsarumuni mitawewirita meutayatsie pita.

<sup>25</sup> Xeiwiyaritsie Tsarumuni haikakia mawari taiyariyari putiwewiwakai meta kayuwati memexeianiki mawariyari mawari taiyametsie mitawewiekaisie Yawé hetsiemieme, metatsiere 'ana 'ikwa putitaiyakai hixiena. Mipai tiyurieneti piraye'atiwakai kemireuyewekai tukita.

<sup>26</sup> Ti'aitame Tsarumuni pitawewita xeime kanuwa 'amupa 'Etsihuni-Kewexi mitiukutewatsie, 'Erati 'aurie 'Erumi kwieyaritsie, Haramara Mixeta hatetsitayaritsie.

<sup>27</sup> Ti'aitame Hiramhi hipame kaniwareni'ani yuteiterima, yemeki haramara hepaitsita temaikate mepihikitikai, memiwaparewieniki Tsarumuni teiterimama kanuwatsie,

<sup>28</sup> hiki miki haramaratsie menekine 'Upixi reyetewakaku meneye'axiani, muwa

menenetiani huru tamamata heima nauka miriyari (14.000) kiruyari, ti'aitame Tsarumuni mekaniyetuirieni.

## 10

*Ti'aitame 'uka Tsawa Tsarumuni  
kemireku'iwataxi  
(1Te 10:1-13 - 2Kem 9:1-12)*

<sup>1</sup> Merikitsi ti'aitame 'uka Tsawa kiekame Tsarumuni kaniutamarieni kemitikuxaxatsiwakai, mikiki Tsarumuni Yawé hepaitsita 'aixia kanainekaitini, hiki ti'aitame 'uka kaneyani para mita'iniataki mikwaniwetikaki miti'iwawiyaki.

<sup>2</sup> Kaninuani Kerutsareme paiti yumireme yuteiterima warawititi. Kameyutsiximama witsimitiu'iatika mepite'itikikai meta huru waikawame metatsiere tetexi witsimi'anene. Kepauka Tsarumuni hetsia miye'a, miki naimeki katiniti'iwawiya kemitiku'eriwakai,

<sup>3</sup> mikita katinitaxatiani naime ketitaki mititi'iwawiyaxi. Nitixatikiki pikatiu'iyiri ti'aitame, tsepa kemitikwaniwetikatei.

<sup>4-5</sup> Ti'aitame 'uka Tsawa kiekame kanihiyiyakaitini 'ixeyati kemitimaiwekai Tsarumuni meta paratsiyuya mitawewi xeyati, mexayatsie mirapinirikekai, hetsiana memite'uximaya 'iparewiwamete wa'ipari, kemiti'uximayatsiyariekai meta paratsiyuta te'uximayatamete wakemarite, winu 'uitiwamete, meta mawari taiyariyari Yawé tukita mitiwewiwakai xeyati.

<sup>6</sup> Hiki mipai ti'aitame katiniutahiawe: «Tita nemiretamari nekwieyaritsie paiti 'ahepaitsita meta kepemitimaiwe kaniyuritini.

<sup>7</sup> Ne yuri nepikare'eriekai 'iki 'atsita nepeyetia, hikiri nehixiki nepunierixi. Matsi xiari 'etsiwa xeikia nepiremariekai. Kwinimieme pepitimaiwe kwinie pepitixiku, waikawa matsi pepirexeiya keyuri tita nemire'eni.

<sup>8</sup> 'Aixia meke'itiarieka 'ateiterima. 'Aixia meke'itiarieka memimete'uximayatsirie 'ahamatia yamemite'u'uwa me'i'enieti kepemitimaiwe.

<sup>9</sup> Meta 'aixia kerahiawariwani Yawé 'akakaiyari, muyutemawie 'ahetsiemieme meta ti'aitame mimetsi'ayeitia 'Ixaheri kwieyaritsie. Yuheyemeki 'Ixaheri naki'erieti, Yawé ti'aitame kamanayeitiani pemitita'aitaki kehapai 'aixia mi'ane meta kemitiheitserie».

<sup>10</sup> Hiki ti'aitame 'uka, Tsarumuni katiniye-tuirieni 'imikieri haika miriyari heimana 'atanauka tsienituyari heimana haika tewiyari (3.960) kiruyari huru, tetexi witsimi'anene, meta waikawa witsimitiu'iatika. Hatsuaku waikawa pika'atiarie 'Ixaheritsie witsimu'iatika ti'aitame 'uka Tsawa kiekame Tsarumuni mumi hepai paimeti.

<sup>11</sup> Hiramí kanuwateya 'amupapa katini'atiani 'Upixi 'aneka, huru meta waikawa tsanitaru kiyeyari meta tetexi witsimi'anene.

<sup>12</sup> Miki kiyeyariki, ti'aitame kanitiwewieni Yawé tukieyata mieme 'imimii 'amatayeyeu mana memutikikaniki, meta paratsiyuta mieme, metatsiere 'aripa kaniutiwewieni meta xawerite teyuitiwamete wahetsiemieme. 'Anatiti, tawari hatsuaku pika'atiariewe meta pikaxeiyariewe, waikawa tsanitaru kiyeyari 'ana hepai.

13 Mikita ti'aitame Tsarumuni, katinimini naime tita ti'aitame 'uka Tsawa kiekame mitiutuhiwe'eri mititawawiri, tsepa meripaitiri mitimikairi yikimana. Hiki 'arike, kanakunuani ti'aitame 'uka yukwiewaritsiepai yunaime memiparewie wahamatia.

*Tsarumuni kemirexeiyakai meta  
kemitimaiwekai*

*(1Te 10:14-29 - 2Kem 1:14-17, 9:13-28)*

14 Tsarumuni xeiwiyari 'anuyeyeikakaku xeitewiyari heimana huta miriyari kiruyari huru pi'atiiriyariwakai,

15 tetuayamete memiteyukutuaya ka'iniairiti, meta yunaiti 'arawetsixi te'aitamete metatsiere kuwexinaruritsixi 'Ixaheri kwiewaritsie memu'uitiariiekai.

16 Hiki ti'aitame Tsarumuni kaniutiwewieni huta tsienituyari yuheima nunuwame 'apapame huruki wewiyatikaime tsunarietikaime, xexuiti 'etsiwatikaku 'atahuta kiruyari huru kaniuyini.

17 Metatsiere kanitiwewieni haika tsienituyari yuheima nunuwame yaki yeyeume, yaxeikia huruki wewiyatikaime tsunarietikaime, xexuiti 'etsiwatikaku huta kiruyari huru kaniuyini. Miki yuheima nunuwame ti'aitame yuparatsiyuta piti'utaxi «Riwanu Makukariuxaya» mititewata.

18 Metatsiere ti'aitame xeime 'uweni 'apame kaniutawewieni 'erepanite 'awateyaki, herie huru 'aixia mi'ane pikawiriyariekai.

19 'Uweni yuhetia peixeiyakai 'imimii 'amatayewa 'ataxewimexia panukuhetei mana mutiyeikaniki, 'ipari warieya xikiraiyeti peumakai, hutakia pamamatikatei, xexuime

mamateya 'aurie mayetsi meputi'utikatei  
yuxexuiti,

<sup>20</sup> meta 'imimiitsie 'ataxewimexia manukuhet-  
sie mepa'utikatei mayetsi tamamata heimana  
huta meyupaimeti me'anuyutaxeiyatikaiti.  
Tawari xeime kwieyaritsie hepaina ti'aneti  
pikatiwawewiyawekai.

<sup>21</sup> Naiti Tsarumuni tekixiteya meta naiti  
xakiriteya paratsiyutana mitiyepikai, «Riwanu  
Makukariuxaya» mititewata, miki naiti huru  
'aixia mi'aneki pitiwewiyatikatei. Xewiti tima  
pirataki pikatiwewiyakai, 'ana Tsarumuni  
muyeikakaitsie pirata raye'akame pika'eriwakai.

<sup>22</sup> Haika wiyari 'anuyeyeikakaku, ti'aitame  
Tsarumuni kanuwaya 'amupa meixeyakai  
haramaratsie meta Hiram kanuwaya 'amupa  
matia, miki Taritsi kananeikakaitini huru 'atiti,  
pirata meta maripixi tatsiari 'erepanite 'awateya,  
hutseri meta 'aruxi witsimemi'anene.

<sup>23</sup> Ti'aitame Tsarumuni waikawa matsi  
pitimaiwekai meta waikawa matsi pixikutikai  
keyuri hipati te'aitamete kwiepa memitamakai.

<sup>24</sup> Teiteri naitsarie kiekatari  
mekani'iwatatiwekaitini me'i'eniekuti  
kemitimaiwekai Kaka'yari 'ipitiaku,

<sup>25</sup> xeiwiyari 'anuyeyeikakaku  
mekateni'atiriwakaitini 'imikieri: piinite  
huruki mitiwewiyatika meta pirataki, kemarite,  
'ixiparate meta witsimitiu'iatika, kawayutsixi  
meta muratsixi.

<sup>26</sup> Kaxetate kuyaxa miemete Tsarumuni  
waikawa warexeiyati patia meta kawayutsixi:  
xeimiri'yari heimana nauka tsienituyari (1.400)  
paimeme kaxetate kuyaxa mieme piwarexeiyakai



meta kawayutsixi tamamata heimana huta miriyari (12.000) mepiyupaimekai, miki pitiwamikwakai kuraruta waye'inati metatsiere Kerutsareme paiti yuparatsiyu 'aurie.

<sup>27</sup> Kerutsareme kiekariyaritsie ti'aitame pirata waikawa pexeyakai tetexi yamiti'ane hepai, meta kariuxa kiyeyari waikawa pexeyakai pini makuweri mieme hepai.

<sup>28</sup> Tsarumuni kawayutsiximama 'Ekipitu kwieyaritsie mepinanaiyakatetikai meta Kuha, mana paiti ti'aitame tetuayametemama mepiwatinawekai.

<sup>29</sup> 'Ekipitu kwieyaritsie kaxeta kuyaxa mieme mepitinawekai 'ataxewime tsienituyari pirata tuminiyariki, meta kawayutsixi mepiwananekai xeitsienituyari heimana huta tewiyari heimana tamamata pirata tuminiyariki, 'ariketa te'aitamete hetitsixi meta tsiriyutsixi mepiwatuiriekai.

## 11

### *Tsarumuni 'iitamama*

<sup>1</sup> Merikite Tsarumuni yimiireme 'ukari waruxeyaka kaniwarutihiwe'erieni. Parahuni niweya 'utiwitikatiti, yuwaikawa hipame kaniwarutiwitinita, muhawitsixi, 'amunitsixi, 'erumitsixi, Tsiruniyu kiekatari meta hetitsixi teiteriyari, miki 'ukari yunaiti 'ateewa kiekatari mepihikitikai,

<sup>2</sup> hipame nuiwarite waniwema mepihikitikai Yawé wahetsiemieme mipai putayikai, mipai tiwarahiaweti 'ixaheritsixi: «Xepikawawititiweni meta miki mepikaxewititiweni, ne yuriki

mipai nekanaineni xika xewarutiwitini miki mepixeheuyexirieni xe'iyaritsie para xemiwarayexeianiki hipame pita kakaiyarixi». Miki 'ukari Tsarumuni kaniwarutiwitini meta kaniwarutihiwe'erieni.

<sup>3</sup> 'Atahuta tsienituyari mepiyupaimekai 'iitamama miki te'aitamete waniwema mepihikitikai, haika tsienituyari mepituxexerimamatikai, miki 'ukari yunaiti 'axamekaniyurieni 'iyarieyatsie.

<sup>4</sup> Mipai katiniiyini, kepauka Tsarumuni 'ukiratsi matia, 'iitamama 'iyarieya mekaneuyehiani, hipame kakaiyarixi pita warayexeyati kanayani, Yawé yukakaiyari hetsia yapikatikatia yuheyemeki paapaya Rawiri kemitikatia.

<sup>5</sup> Matsi pita, Tsarumuni 'Atsitaruti titewakame kanayexeyakaitini tsiruniyutsixi wakakaiyaritime meta Muruki titewakame 'axami'ane 'amunitsixi wakakaiyari.

<sup>6</sup> Miyatitiri Tsarumuni Yawé kemikatinake katiniuyurieni, heitseriemeki yapikatikamiekai hetsiena mieme, paapaya Rawiri kemitikatia.

<sup>7</sup> Miki tukaritsie pitiyurienekai Tsarumuni kepauka, Kerutsareme tau manatineika hepatsie xeime yemuritsie mitawewi tuki muhawitsixi wakakaiyari 'axami'ane Kemuxi hetsiemieme, xeimeta tsiere kaniutawewieni 'amunitsixi wakakaiyari 'axami'ane Muruki hetsiemieme.

<sup>8</sup> Yaxeikiata katiniuyurieni yu'itama 'atewa memikiekataritikai wahetsiemieme, miki 'ikwa memiwatairietiweniki meta memitewamawirietiweniki yukakaiyarixi.

<sup>9</sup> Hiki Yawé, 'Ixaheri Kakaiyarieya,

kaniuyeha'ani Tsarumuni hepaitsita 'iyarieya hetsiena mieme mikayukihiawekaikiri, tsepaneti hutakia Tsarumuni hixie muyuhekiatakai,

10 'iku'imaiyati hipame kakaiyarixi mikawaranukuweweyaniki. Tsarumuni miki Yawé 'aitsikaya mikahaye'atiaki,

11 Yawé mipai katinitahiawe: «Miya pemitikamieki, netiratu meta ne'aitsikate pemikahaye'atiaki nemimatsiyetuiri, mipai ketinemaika nepimatsinawairieni hakewa pemire'aita, xeime pita nepiyetuiri ni meti'uximayatsiriwame.

12 Peru, 'apaapa neminaki'erieki Rawiri, mipai nepikatiyurieni pe'ayeyurikaku, matsi 'aniwe ti'aitakakuke nepinawairieni.

13 Meta miki, tsiere 'a'ukiyari Rawiri neminaki'erieki meta Kerutsareme, naime nepika'inawairieni, matsi xeinuiwari nepihayewirieni, hikiri 'ari nekanenayexeiyi».

### *Tsarumuni memaye'uniekai*

14 Hiki 'ayumieme, Yawé xeime kaniuyuitiani Harari titewakame 'erumi tewiyari, 'Erumi kwieyaritisie te'aitamete waniwe, Tsarumuni 'aye'uniekame kanayeitiani.

15 Hiki, meripaiti Rawiri 'erumitsixi muwakwinekaitsie, kuyaxi tiwa'aitiwame Kuhawi, kaneyakaitini warekateukuke 'ixaheritsixi memekwi'iwakai meheyukwitiweti, hiki mexi mana me'u'uwakai mepiwarukwi yunaime 'ukitsi 'Erumi kiekatari.

16 Kuhawi meta kuyaxi 'ixaheritsixi hamatiana memu'uwakai mana mekaniyuhayewa 'ataxewi

metseriyari, kepaukake memiwarukwi yunaime 'ukitsi 'Erumi kiekatari.

<sup>17</sup> Peru Harari, 'ana 'akuxi temaiki hikiti, kaniutayuni 'Ekipitu paiti hipame paratsiyuta te'uximayatamete 'erumitsixi warawititi paapaya memiparewieka.

<sup>18</sup> Miki Mariyani mekaniyekine hiki Parani paiti mekaniu'axiani, mana hipati teiteri mekaniwarutinini mana kiekatari. Mana memiyeki mekanekine 'Ekipitu paiti, hiki mana Parahuni hetsia mekaniyutaxata, miki kwieyaritsie ti'aitame hetsia, miki kii Harari kaniumini meta puyuhiritia mitiwamikwaniki metatsiere kwie kaniwaruxatiani.

<sup>19</sup> Parahuni Harari 'aixia katiniuxeiya, hiki 'iyaya mayaniki kaniwititiani yukwe, yi'iya Tapenetsi 'iwaya.

<sup>20</sup> Tapenetsi 'iwaya xeime nunutsi kanayex-eiya, miki Kenuwati katiniteriwa, hiki Tapenetsi paratsiyuta katiniti'ikitiani. Miyatitiri Kenuwati Parahuni niwemama wahamatia kaniutawere.

<sup>21</sup> Harari 'Ekipitu 'uyeikati katiniutamarieni ke-name hemikairi Rawiri meta Kuhawi, kuyaxi mitiwa'aitiwametikai. Hiki Harari Parahuni mipai katiniutahiawe:

—Keneneupitia nemakunuaniki nekwieyaritsie.

<sup>22</sup> Parahuni mipai katinita'iwwiya:

—¿Ketitayarikuta 'akwieyaritsie per-akunuanikeyu? ¿'Ena kuta tixaiti mereuyehiwa?

Harari mipaita katinita'eiya:

—Hawaiki, peru keneneupitia nemiyemieki.

<sup>23</sup> Yaxeikia Kakaiyari, Xetsuni 'Erihara nu'aya kaniupitiani Tsarumuni maye'unie mayaniki.

Xetsuni, puyuta'unakai Harari-'Etsexi Tsuwa kwieyaritsie ti'aitame ti'uximayatsirietì,

<sup>24</sup> miki kaniwarukuxeirieni 'axamete'u'iyarime, miki wa'ukiyari kanayuyeitiani. Kepauka Rawiri tsiriyutsixi miwara'i waxi, miki 'axamemite'u'iyari mekanekine Ramatsiku paiti, mana miki mete'aitati mekanakine.

<sup>25</sup> Mipai 'uyika Xetsuni ti'aitame kanayani Tsiriyia kwieyaritsie. Kepauka Tsarumuni 'amuyeikakai, Xetsuni 'Ixaheri naye'uxiwe'eriekaitini miki meye'unie kanayani, mipai meteyurietì kwinimieme mekatenikwinitiani Harari yunaiti.

*Keruwuhani Tsarumuni kemitiu yehexi*

<sup>26</sup> Metatsiere Keruwuhani Nawati nu'aya, ti'aitame Tsarumuni 'aye'unietì kanayani ti'uximayatsirietiti. Miki Keruwuhani 'Epirahini nuiwarieya hetsie pumiemetikai, Tserera kiekariyaritsie kiekame, maamaya pititewakai Tseruha meta piwiuratikai.

<sup>27</sup> Kepauka Keruwuhani Tsarumuni 'aye'unietì matia pituiyi Tsarumuni Rawiri kiekariena ti'uximayakaku kwie heukawiwawati hakuweriritakaku, paapaya Rawiri kiekariena kuraruyatsie miranunaniki.

<sup>28</sup> Keruwuhani yunaiti 'aixia metenix-eiyakaitini, merikite kepauka Tsarumuni mixei 'aixia ti'uximayakame kanihiritiani raheteme memite'uximaya miwaxeiiyaniki mipai mekateni'uximayakaitini Kutse nuiwarimama.

<sup>29</sup> Heiwa Keruwuhani Kerutsareme kiekariyaritsie 'ayeyaku, huyeta Kakaiyari niukameya 'Ahiyaxi Tsiru kiekame kanenukunake, miki

mata hekwame newawiekaitini. Yuxaita yuhutati yeuta meni'iakaitini.

<sup>30</sup> Hiki 'Ahiyaxi mata mewawiekai 'enutihurieka, kanititsanaxiani tamamata heimana hutame kanayexirieni,

<sup>31</sup> mipai Keruwuhani katiniutahiawe: «'Eki kenanuhuri 'ahetsiemieme tamamata paimeme, mipaiti Yawé 'Ixaheri Kakakaiyarieya kanaineni: "Hikiri Tsarumuni nekaninawairiemiki mira'aitatsie, 'eki pita nekamenipitiamiki tamamata nuiwariyari.

<sup>32</sup> Miki xeinuiwari xeikia nepihayewirieni, neti'uximayatsiriwame Rawiri neminaki'erieki meta Kerutsareme, miki kiekari pihiki nemenayexei yunaime 'Ixaheri nuiwarimama watsata.

<sup>33</sup> Mipai nepitiyurieni miki minetsi'uku'eiriki, 'Atsitaruti mayexeiyaki tsiruniyutsixi wakakaiyari meta Kemuxi muhawitsixi wakakaiyari, metatsiere Muruki 'amunitsixi wakakaiyari. Tsarumuni nehuyeta pika'umie, yapikatiyuriwe keminetinake, pikaraye'atia ne'aitsikatsie ne'iniari niukiyaritsie, yupaapa Rawiri hepai pikatikatia.

<sup>34</sup> »"Peru, naime nepika'inawairieni mira'aitatsie Tsarumuni, matsi nepihayewa mitita'aitaki 'ayeyuriti kemireutere, neti'uximayatsiriwame Rawiri neminaki'erieki, nemenayexei meta yamitikatiaki ne'iniari niukiyaritsie meta ne'aitsikatetsie.

<sup>35</sup> Nu'aya pita nepinawairieni, 'ekita nepimatsiyetuirieni tamamata nuiwarite.

<sup>36</sup> Peru nu'aya xeime hikiname nepiyetuirieni

xeikia, Rawiri nuiwarimama memiyeweyaniki mete'aitati, kixeme hepai memihēkariwiekaki Kerutsaremtsie, kiekari nemenayexeitsie mana nemukaniki.

<sup>37</sup> 'Ekita, ti'aitame nepimatsihayeitiani 'Ixaheri kwieyaritsie, kemimatinake mana pemitita'aitaki naitsarie.

<sup>38</sup> Xika naimetsie yapetikamieni kenemati'aitia meta xika nehuyeta pe'umieni, yapetiurieneti keminetinake meta peraye'atīwati ne'aitsikatsie meta ne'iniari niukiyaritsie, netsiparewiwame Rawiri mireye'atia hepai, ne 'ana 'ahamatia nekaniuyeikamiki. Ne nepimatsipitiani 'anuiwari yuheyemeki te'aitamete memihikitiniki Rawiri kenemitiupitia, 'Ixaheri kwieyari nepimatsiyetuirieni.

<sup>39</sup> Ne nepiwa'uximatiani Rawiri nuiwarimama, peru yuheyemeki pikatixai”».

<sup>40</sup> Hiki Tsarumuni, mipai 'ayumieme Keruwuhani pimiemikikai, peru miki kaniyuta'una 'Ekipitu paiti hiki mana kaniyuhayewa, ti'aitame Tsitsaki 'iparewiekaku, mana puyuhayewaxi kepaukake Tsarumuni mumi.

*Tsarumuni kemitiūmi*  
(1Te 11:41-43 - 2Kem 9:29-31)

<sup>41</sup> Hipatita kemitiūyi Tsarumuni ti'aitakaku, meta kemitiūmaiwekai metatsiere naime kemitiūyuri, miki katinaka'utiarieni kemitiūyi xapayaritsie Tsarumuni xapayatsie,

<sup>42</sup> miki huta tewiyari wiyari Kerutsareme 'ukaiti katiniuta'aita naitsarie 'Ixaheri kwieyaritsie.

43 Kepauka mumi, kaniukateukieni Rawiri kiekariena, mipaapayatikai, hiki nu'aya Xuwuhani kanitsutiani ti'aitati 'utimana.

## 12

*Hixiapa kememiteyutsanaxi 'ixaheritsixi  
(1Te 12:1-24 - 2Kem 10:1-11:4)*

1 Hiki Xuwuhani kaneyani Tsikeni paiti, mana yunaiti 'ixaheritsixi memeyuxeiriekai ti'aitame memeyeitianiki.

2 Hiki miki hepaitsita Keruwuhani Nawati nu'aya katiniutamarieni, meripaiti ti'aitame Tsarumuni 'ayemakati 'Ekipitu meyakai meta mana 'akuxi pukatei.

3 Kepauka 'ixaheritsixi kimana memite'utani'a mi'atiarie, hiki miki meta yunaiti memiyuxeiriekai 'ixaheritsixi mekanekine Xuwuhani hetsia mipai mekateneitahiawe:

4 —'Apaapa kwinimieme raheteme yuku pitatsi'utititia teka'ikemakame. Hikiri 'eki ha'exanime ketaneutititia te'ikemakame, keyuri 'apaapa mitatsi'utititia, hiki 'ana tepimateta'uximayatsirieni.

5 Xuwuhani mipai katiniwarutahiawe:

—Xekeneuhuni hiki, peru xekenayenexia haika tukari 'anukayayu.

Hiki kepauka teiteri memeki,

6 ti'aitame Xuwuhani kaniwaruta'iwawiya 'uki-rawetsixi paapaya Tsarumuni mayeyurikaitsie memiparewiekai. Mipai katiniwaruta'iwawiya:

—¿Kexehaitika xeme, kenetiwata'eiya 'iki teiteri?

7 Miki mipai mekaniutiyuani:



—Xika 'eki ti'aitame hiki 'iki teiteri  
 tiwa'uximayatsiriwame pe'ayani, xika  
 kemitiwanake pewaru'enieni, xika  
 pewaruta'eiya pewanaki'erieti, miki  
 mepimateta'uximayatsirieni yuheyemeki.

<sup>8</sup> Peru Xuwuhani 'ukirawetsixi wa'ixatsi  
 pika'anu'eni kememite'itahiawixi, matsi  
 temari pitata kaniwaruta'iwawiya hamatiana  
 memutiwawerixi meta'anari memiparewiekai.

<sup>9</sup> Mipai katiniwaruta'iwawiya:

—ǂKexehaitika xeme, kenetiwata'eiya 'iki  
 teiteri mipai meminetekihawe: “Ha'exanime  
 kenayeitia'apaapa kwinimieme raheteme yuku  
 mitatsi'utititia teka'ikemakame”?

<sup>10</sup> Miki temari, hamatiana memutiwawerixi,  
 mipai mekatenita'eiya:

—'Iki teiteri 'ipai memimetehahawe ti'aitame:  
 “Apaapa kwinimieme raheteme yuku  
 pitatsi'utititia, 'ekiri ha'exanime kenayeitia”.  
 Neuxei, 'ipai ketiniwaruta'eiya: “Xika nepaapa  
 waikawa tixe'uta'uximayatsitiani, ne matsi tawari  
 waikawa nepitixeta'uximayatsitiani.

<sup>11</sup> Xika miki yuku haheteme xe'utititiani, neta  
 matsi waikawa nepixeti'ikatiani. Xika miki xeti-  
 wayakaitini kiyeki, ne kawayutsixi wawayameki  
 tepia manuyatsatikaki nepixetiwani”.

<sup>12</sup> Merikite hairieka tukari 'aye'aku, kemu-  
 tayikai ti'aitame Xuwuhani, hixiena Keruwuhani  
 kaninuani yunaima teiteri wahamatia.

<sup>13</sup> Peru ti'aitame kaniwaruta'eiya  
 tiyukananaimakameki: 'ukirawetsixi 'ixatsi  
 memipitiakai pika'anu'eni,

14 matsi temari wa'ixatsi pita kaniu'enieni. Mipai katiniwarutahiawe: «Xika nepaapa yuku haheteme xe'utititiani, neta matsi waikawa nepixeti'ikatiani. Xika miki xetiwayakaitini kiyeki, ne kawayutsixi wawayameki tepia manuyatsatikaki nepixetiwani».

15 Hiki ti'aitame teiteri pikawaru'eni. Mipai pitiiyi Yawé yahainekaku, maye'atarieniki 'ari Keruwuhani Nawati nu'aya kemitiutahiawekai, Kakaïyari niukameya 'Ahiyaxi Tsiuru kiekame Keruwuhani yapitiutahiawekairi.

16 Kepauka memitehetima kename ti'aitame 'ari kawaru'eni, yunaiti 'ixaheritsixi mipai mekatenuhiwakaitini meyuxewiti:

«'Ixaheritsixi teiteriyari, yunaiti yukie xekeneutayeixia.

'Ekita, Rawiri, 'ahetsia miemete xeikia keniwarayexeyani.

Tamari Rawiri hetsia tixaiti tepikatehayexeyia.

Tixaitikuta pikatatiyetuirieni 'Itsahi nu'aya». Hiki mekaneutayeixiani, yuxexuiti yukie.

17 Peru miyatiti, Xuwuhani piyeweiyakai ti'aitati 'ixaheritsixi wahetsie Kura kiekariteyaritsie memutetikatei.

18 Hiki 'arিকে, ti'aitame Xuwuhani 'Arunirani kaneni'ani waiiyarika memite'uximaya mihiritiariakai minierimieki, peru yunaiti 'ixaheritsixi tetexiki mekaneitituaxixiani mekanimieni. Hiki mexiwa ti'aitame 'anutiyerika yukaxetatsie kaniyuta'una Kerutsareme paiti.

19 Hiki mipai tiyiku 'anatiti 'ixaheritsixi Rawiri nuiwarimama mepiwaruku'eiri, hiki yaxeikia

mepi'ane.

<sup>20</sup> 'Ixaheritsixi kepauka memite'utamari kename Keruwuhani hakunuakai, miki mekanitakwewieni yunaiti 'ixaheritsixi, hiki mekanenukakeni ti'aitame mayaniki naime 'Ixaheri kwieyaritsie miemeki. Nixewiti Rawiri niwemama wanaki'erietu pikahatia, Kura nuiwarimama xeikia.

<sup>21</sup> Xuwuhani Tsarumuni nu'aya Kerutsareme nuaka kaniwarukuxeirieni yunaime Kura nuiwarimama meta Wenikamini nuiwarimama, xeitsienituyari heimana nauka tewiyari miriyari (180.000) kuyaxi mekanakine yunaiti, miwatakwiniki 'ixaheritsixi hiki mipai tiyurieme yunaime wahetsie mitita'aitaki.

<sup>22</sup> Peru Kakaïyari niukieya kaninuani Tsemahiyaxi hetsia, miki tewi Kakaïyari payexeiyakai, mipai'aneme niuki kaniupitiarieni:

<sup>23</sup> «Mipai ketineutahiawi Xuwuhani Tsarumuni nu'aya miti'aitame Kura kwieyaritsie, yunaime Kura tãriyamama meta Wenikamini nuiwarimama metatsiere yunaime teiteri,

<sup>24</sup> mipai kanaineni Yawé: “Hawaiki xepikawakwitiweni yu'iwama 'ixaheritsixi. Yuxexuiti yukie xekeneutayeixia, kariki ne yanehainekaku miya pitiiyi”». Hiki miki mekanenu'enieni Yawé niukieya, mekaniukunuaxiani, Yawé kemutayikai.

*Keruwuhani tsikerutsixi kakaïyarixiyari kemitiwarutiwewi*

<sup>25</sup> Keruwuhani Tsikeni kiekariyari 'aixia kaniuyurieni 'Epirahini hãriyaritsie mukumakai, hiki mana kaniuyuhayewa. 'Arike Tsikeni

'uku'eirieka, Peniheri kiekariyari 'aixia kaniuyurieni.

<sup>26</sup> Hiki mipaita pitiyuti'iyaritia: «Nikahirixiata Rawiri niwemama mete'aitati mehakine naimet-sie.

<sup>27</sup> Xika teiteri Kerutsareme meheta'axeni memitehetimawaki Yawé tukita, mipai meyiati mepanuaxiani ti'aitame Xuwuhani hetsia Kura kwieyaritsie miti'aita. Hiki 'ana mepinetsimieni, 'imatirieka miki pita mepitinini».

<sup>28</sup> Hiki 'uti'iwauka kemitiyurieni, ti'aitame yuhutame tsikerutsixi kaniwarutiwewieni huruki, hiki mipai katiniwarutahiawe teiteri: «'Ixaheritsixi, pikaheuyewetse xemeta'axeni 'akuxi Kerutsareme. 'Ena mekaniti'uka xekakaiyarixima, 'Ekipitu memixe'ayewiti».

<sup>29</sup> Hiki yuxeime tsikeru Weteri kiekariyaritsie kaniutakeni, xeimeta Rani kiekariyaritsie.

<sup>30</sup> Merikite mikiki kwinimieme 'axamekate-niuyurieni 'ixaheritsixi, hipati 'atsita Rani kiekariyaritsie paiti mekaneta'axekaitini memite'itimawirieniki tsikeru mana miyewekai.

<sup>31</sup> Keruwuhani kanitiwewienita kakaiyarixi watuki hiritetsie, meta kaniwarutihawe mawari wewiwamete muwa memite'uximayakaki hipame teiteri, tsepa Rewi xiyyarieya mikahiki kaniwaranuka'uitiani.

<sup>32</sup> 'Aitsika kaniunetiani 'ixiarari hepaitsita mieme 'atahaika metseriyaritsie tamamata heimana 'auxiwi tukariyaritsie memetinenetiwaniki, 'ixiarari Kura kwieyaritsie matineikakai hepai 'aneme. Weteri kiekariyaritsie mawari taiyametsie tsikerutsixi katiniwarutimawirieni miwarutiwewi, meta

mawari wewiwamete kaniwarutihawe  
kakaiyarixi watuki mana mutiwewiekaita  
memite'uximayakaki.

<sup>33</sup> Merikite 'aye'aku, tamamata heimana 'auxiwi  
tukaritsie 'atahaika metseritsie, Keruwuhani  
miratimawatire kaneyani mitawewitsie  
Weteri kiekariyaritsie, mana 'ikwa taiyariyari  
kaniuwewiweni. Miki tukaritsie mepuhiritiari  
meme'eriwaniki yuheyemek 'ixiarari tukariyari  
mihikitiniki 'ixaheritsixi wahetsiemieme.

## 13

### *Tewi Kakaiyari niukameya Kura meyetia*

<sup>1</sup> Merikitsi xewiti tewi Kakaiyari hetsia mieme  
Kura kwieyaritsie yeyaka peta'a Weteri paiti Yawé  
mipai mirehiawekaiki. Kepauka mana mawari  
taiyame Keruwuhani 'ikwa taiyakaku,

<sup>2</sup> tewi Kakaiyari hetsia mieme, Yawé  
yarehiawekaku, mipai katiniuhiwa karima:  
«Mawari taiyame, miratimawatire 'aku. Yawé  
mipai kanaineni: “Rawiri nuiwarieyatsie kanit-  
inuiwamiki xewiti Kutsiyaxi titewati, miki 'ahetsie  
kaniwatimawamiki 'iki mawari wewiwamete  
kakaiyarixi watukita memite'uximaya 'ena  
'ikwa memutitaiya. 'Ahetsie teiteri wa'umete  
pititaiyarieni”».

<sup>3</sup> Miki tukaritsie kwitiwa miki tewi Kakaiyari  
hetsia mieme 'iniari kaniutaxata: «'iki 'iniari  
kanihikitini Yawé mixeyetuirie: Mawari taiyame  
kanika'unimiki, meta naxiyari kanita'enixiamiki».

<sup>4</sup> Ti'aitame Keruwuhani 'u'enaka  
kemitikuxatakai miratimawatire Weteri  
muwekai hepaitisita tewi Kakaiyari hetsia  
mieme, mawari taiyametsie 'akaweti yumama

heutatseraka, mipai kaniutayini: «Xekeneuwiya». Peru mamaya kimana tewi mu'itiiyakai kaniu'auni, kayuaweti kanayani.

<sup>5</sup> 'Anari kwitiwa miratimawatire kaniuka'une, naxiyari kaneuta'enixiani, 'iniari kemainekai paye'atiarie, tewi Kakaiyari hetsia mieme kemutayikai, Yawé yarehiawekaku.

<sup>6</sup> Hiki ti'aitame tewi Kakaiyari hetsia mieme mipai katiniutahiawe:

—Yawé 'akakaiyari keneutahiawi. Nehet-siemieme keneutawawiri, 'aixia miyinihi nemama.

Hiki tewi Kakaiyari hetsia mieme Yawé kani-utawawirieni, hiki ti'aitame mamaya 'axia kaniuyini, meripaiti kemi'anekai.

<sup>7</sup> Kwitiwata ti'aitame mipai tewi Kakaiyari hetsia mieme katiniutahiawe:

—Hikimi nekie tepuhu, pepirekwani meta tixaiti nepimereyetuirieni 'imikieri.

<sup>8</sup> Peru tewi Kakaiyari hetsia mieme, mipai ti'aitame katiniuta'eiya:

—Tsepa 'apiinite hixiata ti'akame peminetiyetui, nepikaheuyeawe 'akie. Ne 'ena paa nepikatakwan meta nepika'anuhareni,

<sup>9</sup> Yawé mipai mineretahiawixiki: “Paa pepikahekwaka meta pepikahehareka, metatsiere kemi'ane huye'utia pemetia miki 'utia pepika'akununuwani”.

<sup>10</sup> Hiki xeime pita huye'utia kaneyani, kemi'ane 'utia 'umieti mikanua Weteri.

<sup>11</sup> 'Anatsie xewiti mana Weteri pukatei Kakaiyari niukameyatiti 'ukiratsititiri. Niwemama mekatentaxatiani naime miki tewi

Kakaiyari hetsia mieme kemitiuyuriekai miki tukaritsie, meta ti'aitame kemitiutahiawekai.

<sup>12</sup> Wapaapa mipai katiniwaruta'iwawiya:

—¿Kereumiekai?

Niwemama mekatenitaxatiani tewi kemireumiekai Kura yeyaka mana munuakai,

<sup>13</sup> hiki wapaapa mipai katiniwaruta'aitiani:

—Puxu xekenenetixiratiiri, nemanuyerini.

Kepauka puxu manutixiratiarie, Kakaiyari niukameya 'ukiratsi kananutiyerini,

<sup>14</sup> hiki kaneyani tewi Kakaiyari hetsia mieme 'utia. Kaneitaxeiya xiu hetia hetikaime, hiki mipai katinita'iwawiya:

—¿Eki petihiki tewi Kakaiyari hetsia mieme, Kura kwieyaritsie pemeyetia?

Miki mipai kaniutayini:

—Huu, ne nepihiki.

<sup>15</sup> Hiki Kakaiyari niukameya 'ukiratsi mipai katinitahiawe:

—Hikimi nekie tepitehekwani.

<sup>16</sup> Tewi Kakaiyari hetsia mieme mipai katinitahiawe:

—Hawaiki nepikayiwe nemakunuani 'a'utima, meta nepikayiwe paa nemetakwani meta haa nemanuhareni 'ena 'ahamatia,

<sup>17</sup> Yawé mipai pinerahiawekai: “Paa pepikahekwaka meta mana pepikahehareka, meta kemi'ane huyeta pemiymie miki 'utia pepikahakununuwani”.

<sup>18</sup> 'Ukiratsi tawari mipai katinitahiawe:

—Netatsiere Kakaiyari niukameya nekanihikitini 'ahapai. Neuxei xewiti niuki tuayame Yawé heiyeni'aku, mipai

pineretahiawixi: “Akie kenanuwitiki  
mirekwaniki meta manuhareniki”.

Mipai piti'itai,

<sup>19</sup> tewi Kakaiyari hetsia mieme kaniukunuani  
hamatiana kaneyani, kiena katiniukwani meta  
kananuhareni.

<sup>20</sup> Mana 'akuxi me'utitekaku mexatsie, Yawé  
niukieya kaninuani Kakaiyari niukameya 'uki-  
ratsi hetsie mikunuitiatsie.

<sup>21</sup> Hiki Kakaiyari niukameya tewi Kakaiyari  
hetsia mieme katiniutaxatiani Kura kwieyaritsie  
meyeyakai:

—Yawé mipai kanaineni: “Yawé niukieya  
pepika'anu'eni, pepikaraye'atia Yawé 'akakaiyari  
kemimatiutahiawixi.

<sup>22</sup> Pekaniukunuani pemitikwaniki pemanuti-  
hareniki hakewa miki matsihemaiwe'erikatsitia.  
'Ayumieme, pikakateukieni 'akaxari,  
'a'ukiyarima memuyehetsie”.

<sup>23</sup> Kepauka tewi Kakaiyari hetsia mieme  
mitiutahayewaxi tikwati 'anuhareka, 'ukiratsi  
Kakaiyari niukameya puxu kanitixiratiirieni,

<sup>24</sup> hiki kaneyani tewi Kakaiyari hetsia mieme  
huyeta. Perutsi maye kanenukunake kanimieni  
huyeta kanihiani. Matsi puxuya meta maye 'au-  
riena mekaniyuhayewa kaxarieya 'aurie.

<sup>25</sup> Mana kaxarieya me'uxeiyaka meta maye  
'ihikame, mana memuyekikakai kiekaritsie  
mekateniutaxata 'ukiratsi Kakaiyari niukameya  
manukatei.

<sup>26</sup> Kepauka Kakaiyari niukameya mitiutamari  
mikunuitia huyeta, mipai kaniutayini: «Miki  
tewi Kakaiyari hetsia mieme Yawé niukieya  
mika'anu'eni kanihikitini, 'ayumieme Yawé



kaniyetuani maye mitaxutsiniki meta mimieniki, mipai katinaye'ani Yawé kemititahiawixi».

<sup>27</sup> Hiki Kakaiyari niukameya mipai katiniwarutahiawe yuniwema: «Nepuxu xekenetixiratia». Kepauka memikuha'aritia,

<sup>28</sup> Kakaiyari niukameya kaneyani, hiki kaneitaxeiya kaxari huyeta hekaikame, puxuya 'auriena meta maye 'auriena. Maye pika'itakwaiwekai kaxari meta puxu 'atsipika'uyuri.

<sup>29</sup> Hiki 'ukiratsi Kakaiyari niukameya, tewi Kakaiyari hetsia mieme kaxarieya kananukukweni, puxutsie heitihika kanei'ikata tawari kiekaritsie paiti, manapaiti hiwerika memiwewieniki hetsiena mieme meta memikateukuki.

<sup>30</sup> Hiki 'arike kanika'awieta yuteukiyapa, meta hiwerika mepuwewi hetsiena mieme, mipai mete'uhiwati: «Xia'ui, ta'iwatikai».

<sup>31</sup> 'Arikeke me'ikateukuka, Kakaiyari niukameya yuniwema mipai katiniwarutahiawe: «Neta kepauka nemukumawere, hakewa temeikate tewi Kakaiyari hetsia mieme muwatsiere xepinetsiheukatani, ne'umeyari muwatsiere xepeukatvani hamatiana.

<sup>32</sup> Kariki yuriki kanaye'atiariemiki niukieya, Yawé niukieya 'enieti kemutayi, miratimawatire Weteri mieme hepaitsita meta yaxeikia naitserie kakaiyarixi watukite muwetika hirtsie Tsamariya kiekariteyaritsie wahetsiemieme».

<sup>33</sup> Miyatiuyikutiti, Keruwuhani pikatiuhayewaxi 'axatiyurieneti, matsi

pita tawari mawari wewiwamete kani-  
 waranuka'uitiani tsepa kemi'ane tewi kakaiyarixi  
 memite'atimawiyariwa miemete memakineki.  
 Kemi'ane mawari wewiwame meuyeimikikai  
 miki tukiteta, miki piwaranuka'uitiwakai.

<sup>34</sup> Miki Keruwuhani miyatiyurienekaku yunaiti  
 tiiriyamama 'axametyurieti mepaki, meta miki  
 tiuyurieku yunaiti mekaniukwini, nixewiti  
 pika'uyuhayewaxi 'ena kwiepa.

## 14

### *'Ahiyaxi kemutayi Keruwuhani hepaitisa*

<sup>1</sup> Merikitsi 'ana mitiyehanetsie 'Awiya katini-  
 utakwine Keruwuhani nu'aya,

<sup>2</sup> hiki yi'ia mipai katiniutahiawe: «Yiki  
 ketineuyuketiaka nixewiti mikametsihetimaniki  
 kename ne'ia peiane. Hiki kenemie Tsiru,  
 hakewa 'Ahiyaxi meka, miki Kakaiyari  
 niukameya kaneniutahekiatiani ti'aitame  
 kename nehayanikekai 'iki teiteri wahetsie.

<sup>3</sup> Tamamata paa kena'iti meta yapaimeme  
 tsuira metatsiere xeikixauriyari xiete. Kepauka  
 pemeta'ani miki yakamatinetahiawimiki kemiyini  
 taniwe».

<sup>4</sup> Hiki Keruwuhani 'iyaya kaneyani Tsiru paiti,  
 'Ahiyaxi kie kaniye'ani.

'Ahiyaxi waikawa wiyari mexeyakaikiri  
 pikaheunierekairi.

<sup>5</sup> Peru Yawé mipai 'Ahiyaxi pitiutahiawekairi:  
 «Keruwuhani 'iyaya xewiti pita 'ayuyeitiwati,  
 punuani matsita'iwawiyake yuniwe hepaitisa,  
 hiki mirekuye. Hiki kenemimerahiawe mipai  
 pekatinitaxatiamiki».

6 Hiki kepauka 'Ahiyaxi hurawa 'amiekaku mi'eni, kitenie kaneuenyeniere mipai kaniutayini: «Keruwuhani 'iyaya, ʔketitayari xewiti pera'ayeitiwa? Keniwataye'a ne 'ahetsiemieme niuki nepexeiya mikamatsinakire.

7 Kenakunua Keruwuhani hetsia, mipai ketinetaxatia kename Yawé 'ixaheritsixi takakaiyari mipai haine: “Ne nekamenanayex-eiya neteiterima 'ixaheritsixi watsata, meta tiwa'aitiwame nekamanayeitiani.

8 Nekaniwarunawairieni Rawiri t̄iriyamama hakewa memitehe'aitakai 'eki p̄ita nekamaniye-tuirieni. Peru 'eki Rawiri netsiparewiwame hepai pep̄ika'ane, miki yap̄itikatia ne'aitsikatsie, naimeki yuwairiyati yu'iyariki, yap̄itiyurienekai kem̄inetinake.

9 Matsi 'eki kwinimieme 'axapep̄itiuyuri, keyuri meripai mem̄u'uwakai, 'eki hipame pep̄iwarutiwewi kakaiyarixi tep̄iaki, miki pin̄etsihaxiatia, pep̄inetsi'uku'eiri.

10 »"Ayumieme nepenuni'ani 'uximatiarika Keruwuhani t̄iriyamama wahetsie. Nuiwari-mama 'ukitsi 'Ixaheri kwieyaritsie yunaime nekaniwarakuxitiamiki, nixeime nep̄ikahayewa. Yunaime Keruwuhani nuiwarimama xatsi hepai nekaneku'itimiki kepaukake tixaiti mikatiyuhayewa.

11 Kemi'ane kiekaritsie mem̄kwini ts̄ilik̄iri mep̄iwat̄ikwani, kemi'aneta yeuta hiritsie mem̄kwini wirik̄ixi mep̄iwat̄ikwani. Yawé mipai kaniutayini”.

12 »'Ek̄ita, kenakunua 'akie, kepauka kiekaritsie pemeutahani, kanem̄imiki nunutsi.

13 Hiki yunaiti 'ixaheritsixi hiwerika mepiwewieni hetsiena mieme meta mepika-teuku. Keruwuhani niwemamatsie miki xeikia pikateukieni, miki xeikia Yawé, 'ixaheritsixi takakaiyari, hetsiemieme 'aixia mitikamiekaiki.

14 »Yawé xeime ti'aitame panukakeni 'Ixaheri kwieyaritsie, Keruwuhani nuiwarimama miwareuyehiani. Hikiri mitiyehane.

15 Yawé kaniwatihurikamiki 'ixaheritsixi, haa tirikaiyeti tupiriya mititihurika hepai. 'Iki kwie 'aixia mi'anetsie piwataweiya meripaiti wa'ukiyarima memiyetuiyarietsie, 'Eupirate hatuxameyari 'anutauepai puwatixirieni, 'Atserá kakaiyarixiyari memiyutiwewiriki, mipai 'ayumieme Yawé mekaniuyehaxiatiani.

16 Yawé 'ixaheritsixi kaniwaku'eirimiki Keruwuhani ke'axamitiuyuriki meta 'ixaheritsixi 'axameteuryiekame muwarayeitiaki».

17 Hiki Keruwuhani 'iyaya kaneyani yu'itima kanakunuani Tiritsa paiti. Kepauka yukitenie meutahatsie, nunutsi kaniumi.

18 Hiki mekanikateuku, meta yunaiti 'ixaheritsixi hiwerika mekaniuwewieni hetsiena mieme, kanaye'atarieni Yawé niukieya niukameya 'Ahiyaxi kemititahekiataxi.

19 Hipatita kemitiuyi Keruwuhani ti'aitakaku, kemirayu'iwaxi yumieneti meta kemitiuta'aitaxi, miki naiti katinaka'utarieni kemitiuyi xapayaritsie 'Ixaheri kwieyaritsie te'aitamete waxapatsie.

20 Keruwuhani katini'aitametikaitini huta tewiyari heimana huta wiyari. Kepauka mumi, nu'aya Narawi 'utimana ti'aitame kanayani.

*Kura kwieyaritsie kemitiuta'ai Xuwuhani  
(1Te 14:21, 25-31 - 2Kem 12:9-16)*

<sup>21</sup> Tsarumuni nu'aya Xuwuhani ti'aitame kanayani Kura kwieyaritsie. Huta tewiyari heimana xewi wiyari pihikai kepauka manukake, tamamata heimana 'atahuta wiyari katiniuta'aita Kerutsareme kiekariyaritsie, 'Ixaheri nuiwarimama watsata, miki kiekari panayexeiyakai Yawé mana mikiekaki. Xuwuhani maamaya 'amuni tewiyari pihikitikai, Nuhamapititewakai.

<sup>22</sup> Kura kwieyaritsie kiekatari 'axamekateni-uyurieni Yawé hixie, hiki 'axamemite'uyuriki Yawé mekaniuyehaxiatiani matsi waikawa wa'ukiyarima kememikate'uyuri.

<sup>23</sup> Naitsarie hiritetsie meta kiyexi 'amipapa mi'e'eti hetia kakaiyarixi memite'atimawiyariwa mekaniutiwewieni, tetexi 'amekaniti'uitiani, meta kakaiyari 'uka 'Atserá 'ikiyari.

<sup>24</sup> Meta miki kwieyaritsie mepuxuawekai kakaiyarixi mewarayexeiyati yuhamatia memukahipiteikai tuminiki. 'Ixaheritsixi naime yamepityuriekai hipati nuiwarite ke'axamemite'uhukai Yawé muwarayeweiyakai 'ixaheritsixi wakwieyaritsie.

<sup>25</sup> Ti'aitame Tsitsaki 'ekipitutanaka, Kerutsareme kaniutamieni kaneutahani 'auxiwiriekai wiyari ti'aitakaku Xuwuhani,

<sup>26</sup> hiki katiniwayetini piinite miraye'atika Yawé tukieyata timieme meta paratsiyu 'amipata timieme. Naime katinetini, metatsiere yuheima nunuwame huruki miwewiyatikatei Tsarumuni miti'aitakai.

27 Hiki miki hetsiemieme Xuwuhani kaniti'aita hepaina 'aneneme peru wurunitse tepiyariki wewiyatikaima, hiki kaniwaruhiritiani kuyaxi wa'ukiyarima paratsiyu 'amipa kitenieyaritsie memitehikai.

28 Kepauka ti'aitame meta'axekai Yawé tukita, kuyaximama mekaniti'iwekaitini yuheima nunuwame, kepaukata memakununuwakai, tawarita kitenie tehewemete wakiita mepiti'utakai.

29 Hipatita kemitiuyi ti'aitame Xuwuhani ti'aitakaku, meta kemitiuyuri naiti, kati-naka'utiarieni kemitiuyi xapayaritsie Kura kwieyaritsie te'aitamete waxapatsie.

30 Kepauka miti'aitametikai miki, Keruwuhani matia yamepityekwitiwekai.

31 Kepauka mumi Xuwuhani, maamaya Nuhami mititewakai 'Amuni tewiyari, kaniukateukieni Rawiri kiekariena 'ukiyarimama memakuhetsie, hiki nu'aya 'Awiyaxi kanitsutiani 'utimana ti'aitati.

## 15

*'Awiyaxi Kura kwieyaritsie ti'aitame kemiratia  
(1Te 15:1-2, 6-8 - 2Kem 13:1-2, 22-14:1)*

1 Merikitsi tamamata heimana 'atahaika wiyari ti'aitakaku Keruwuhani Nawati nu'aya, 'Awiyaxi ti'aitame kanayani Kura kwieyaritsie,

2 hiki Kerutsareme 'ukaiti katiniuta'aita haika wiyari. Maamaya Mahaka pititewakai 'Awit-saruni niweyati.

<sup>3</sup> 'Awiyaŋi yaŋeikia 'axakatiniuyurieni, yupaapa hepai, yuheyemekŋ Yawé yukakaiyari 'ayexeiyati pika'atia, wapaapa Rawiri mitikatia hepai.

<sup>4</sup> Matsi, waikawa Rawiri naki'erieti, Yawé Kakaiyari, puwarupitia Rawiri nuiwarimama memite'aitaniki Kerutsareme kiekariyaritsie, kixeme hepai mihekariwiekaki 'akuxi mana, 'Awiyaŋi kaniupitiani nunutsi mayexeiyaki miki mitita'aitaki 'utimana, para Kerutsareme mipai mititatarikariyaki.

<sup>5</sup> Rawiri Yawé kemitinake mitikatiaki, kepauka muyeikakaitsie hatsuaku Yawé 'aitsikaya pika'uhayewaxi, xeimieme xeia 'axakatiniuyurieni mitiuta'aitaxiki mimierieniki 'Uriyaŋi heti tewiyari.

<sup>6</sup> Kepauka muyeikakai 'Awiyaŋi, mepiyukwitiwekai Xuwuhani matia Keruwuhani.

<sup>7</sup> Tawarita kemitiuyi 'Awiyaŋi ti'aitame hikitikaku, meta naime kemitiuyuri, katinaka'utarieni kemitiuyi xapayaritsie Kura kwieyaritsie te'aitamete waxapatsie. Metatsiere mekaniyukwitiwekaitini 'Awiyaŋi Keruwuhani matia.

<sup>8</sup> 'Awiyaŋi kaniumini, hiki kaniukateukieni Rawiri kiekariena. Hiki nu'aya 'Atsa kanitsutiani yu'ukiyari 'utima ti'aitati.

*'Atsa Kura kwieyaritsie ti'aitame kemiratia  
(1Te 15:9-24 - 2Kem 14:2-3, 15:16-16:6, 16:11-17:1)*

<sup>9</sup> Merikitsi Keruwuhani xetewiyari wiyari ti'aitakaku 'Ixaheri kwieyaritsie, 'Atsa ti'aitame kanayani Kura kwieyaritsie,

10 hiki huta tewiyari heimana xeiwiyari katini-uta'aíta Kerutsareme kiekariyaritsie. Kutsieya Mahaka pihikitikai 'Awitsaruni nu'aya.

11 'Atsá yapitiuyuri Yawé kemitinake, meripaiti tutsieya Rawiri kemitikatia hepai.

12 Kaniwarutaweiya miki kwieyaritsie kakaiyarixi mewarayexeyati yuhamatia memukahipitekai tuminiki, meta meripaiti 'ukiyarimama memiwarutiwewiekai kakaiyarixi kaniwarukumaweriya.

13 Meta paiti yukutsi Mahaka 'ukaratsititi kemiti'aitametikai kanita'imaiya, miki 'Atserá kakaiyariyari yuhetsiemieme mutawewiekaiki 'axa'aneme. 'Atsá miki kakaiyari kaniutatara meta kanitataiya Kiruni 'akiyaritsie paiti.

14 Tsepa 'Atsá kakaiyarixi memite'atimawiyariwa mika'uti'unaxi, 'Atsá Yawé kemitinake yuheyemeki pituyeikakai.

15 Metatsiere, Yawé tukita huru meta pirata kani'atiani metatsiere piinite yupaapa matia Kakaiyari memiteyetuiriekai.

16 Kepauka miti'aitametikai 'Atsá Kura kwieyaritsie meta Watsaha 'Ixaheri kwieyaritsie, miki mekaniyutikwini.

17 Watsaha, 'Ixaheri kwieyaritsie ti'aitame, Kura kiekatari kaniwarutakwini, hiki kiekari Xama kuraruyari 'akanatitewarita, mana 'Atsá Kuratsie ti'aitame mika'utayeikaniki.

18 Hiki 'Atsá naime kaniwayetini huru meta pirata muyuhayewanekai Yawé tukieyata meta yuparatsiyuta mieme, kaniwarutitiani kemi'ane hurawa memiparewiekai Weni-'Arari memanutikirieniki, Tawurimuni nu'aya meta



Hetsihuni teukarieya Tsiriya kwieyaritsie ti'aitame, 'ana Ramatsiku mikatei. Meta 'ipai 'aneme niuki kaneini'airieni:

19 «Ne 'eki matia tiratu tepiwewieni, meripaiti 'apaapa meta nepaapa wahepai. Ne nepimatsiheni'airiwa 'imikieri huru meta pirata. Tiratu kepemirexeiya Watsaha 'Ixaheri kwieyaritsie ti'aitame hamatia ketineuhayewa, 'ena minetsihayewaki netsimieneti».

20 Weni-'Arari yapitiutanaki'eri 'Atsa kemainekai, hiki kaniwareni'ani yukuyaxima wa'ukiyarima 'Ixaheri kiekariteyaritsie memitahaxianiki memiwatakwiniki. 'Ana mipai katiniwara'iwa 'Iyuni kiekariyari, Rani, 'Aweri-Wetimaka meta naime Kinereti kiekariteyari metatsiere Nepitahari kiekariteyari.

21 Kepauka Watsaha mipai miretima, Xama kiekariyari kuraruyari 'amatitewa wewieneti kanihayewa, kaneyani Tiritsa paiti.

22 Hiki ti'aitame 'Atsa yunaima kaniwaruta'inieni Kura kwieyaritsie kiekatari, nihipame kawahayewati, hiki naime mekatenetini Xama mititipikai, tetexite meta kiyexite Watsaha kimana kiekari kuraruyari 'amatitewaritakai. Mikikita ti'aitame 'Atsa Kehewa kiekariyari Wenikamini kwieyaritsie mieme kuraruyari 'akanatitewarita, meta Mitsipa kiekariyari.

23 Tawarita kemitiuyi 'Atsa ti'aitametikaku, meta naime kemitixikutikai meta naime kemitiuyuri metatsiere kiekarite kemi'ane mutiwewi, miki piraka'utiarie kemitiuyi xapayaritsie Kura kwieyaritsie te'aitamete

waxapatsie. Peru, kepauka 'ukiratsi matia katiniutakwine yu'ikatetsie.

<sup>24</sup> Hiki 'Atsá kaniumini, kaniukateukieni yu'ukiyarima wahamatia Rawiri kiekariena. Hiki nu'aya Kutsapati kanitsutiani 'utimana ti'aitati.

*Narawi 'Ixaheri kwieyaritsie ti'aitame kemiratia*

<sup>25</sup> Huta wiyari 'Atsá ti'aitakaku Kura kwieyaritsie, Keruwuhani nu'aya Narawi kananukakeni 'Ixaheri kwieyaritsie, miki huta wiyari mana katiniuta'aia.

<sup>26</sup> Narawi Yawé kemikatinake katiniuyurieni, yaxeikia paapaya kemituiyuri mipai katinikayani, paapaya 'ixaheritsixi ke'axameteyuriekame miwarayeitia hepai.

<sup>27</sup> Watsaha 'Ahiyaxi nu'aya, 'Itsakaxi nuiwarieya, Narawi kaniumieni kepauka Kiwetuni pirtsiteutsixi wakiekari yunaiti memukunakai meta yunaiti 'ixaheritsixi.

<sup>28</sup> Hairieka wiyari ti'aitakaku 'Atsá Kura kwieyaritsie, Watsaha Narawi kaniumieni, hiki miki pita hetsiena mieme katiniuta'aia.

<sup>29</sup> Yapauka 'amiranukake ti'aitati, Watsaha yunaime kaniwarukwini Keruwuhani tii'riyamama. Nixeimetima pika'uhayewaxi, yunaime kaniwarakuxitiani, miki paye'atiarie Yawé kemititahiawixi yuparewiwame 'Ahiyaxi Tsi'ru kiekame.

<sup>30</sup> Miya katiniuyini meripaiti 'axamitiuyuriekai'ki Keruwuhani meta 'ixaheritsixi 'axameteyuriekame miwarayeitiaki, mikiki Yawé kaniuyehaxiatiani, 'Ixaheri Kakaiyarieya.

<sup>31</sup> Hipatita kemitiuyi Narawi ti'aitakaku meta kemitiuyuri naiti katinaka'utarieni kemitiuyi xapayaritsie 'Ixaheri kwieyaritsie te'aitamete waxapatsie.

<sup>32</sup> Kepauka memite'aitakai 'Atsá Kura kwieyaritsie meta Watsaha 'Ixaheri kwieyaritsie, mikita yuhutati mepuyutikwi.

### *Watsaha, ti'aitame 'Ixaheri kwieyaritsie*

<sup>33</sup> Haika wiyari 'Atsá ti'aitakaku Kura kwieyaritsie, 'Ahiyaxi nu'aya Watsaha ti'aitame kanayani, xeitewiyari heimana nauka wiyari Tiritisa 'ukaiti naime 'Ixaheri kwieyaritsie katiniuta'aita.

<sup>34</sup> Watsaha Yawé kemikatinake pituyuri, Keruwuhani kananukuweiya, yaxeikia katiniuyurieni miki 'ixaheritsixi ke'axameteyuriekame miwarayeitia hepai.

## 16

<sup>1</sup> Merikitsi Yawé niukieya kaninuani Kehu Kananihi nu'aya hetsia, mipai katinitahiawe Watsaha hepaitsita mieme:

<sup>2</sup> «Haweri pe'aneme nepimatsi'anayexei, hiki ti'aitame nekamanayeitiani neteiterima wahetsie 'ixaheritsixi, peru 'eki yaxeikia petiyurieneti pekanayani Keruwuhani hepai, 'ixaheritsixi 'axamemiteyurieniki yapepituyuri, hiki mipai pepinetiuyehaxiatia.

<sup>3</sup> 'Ayumieme hiki ne nepimatsimieni meta 'atiriyama yunaima nepuwakwini yaxeikia nepuwayurieni Keruwuhani Nawati nu'aya tiriyamama kenemiwaruyuri.

4 Kemi'ane kiekaritsie memikwini tsiikiri mepiwatikwani, kemi'aneta yeuta memikwini wirikixi mepiwatikwani».

5 Hipatita kemitiuyi Watsaha ti'aitame hikitikaku meta tita mitiuta'aitaxi, miki naiti katinaka'utiarieni kemitiuyi xapayaritsie 'Ixaheri kwieyaritsie te'aitamete waxapatsie.

6 Watsaha kaniumini, kaniukateukieni Tiritsa paiti. Nu'aya 'Eraha kanitsutiani ti'aitati 'utimana.

7 Meta, Kakaiyari niukameya Kehu Kananihi nu'aya hetsia Yawé niukieya kaninuani, Watsaha meta tiriyamama wahepaitsita mieme, miki Yawé hixie 'axamitiyurienekaiki, hiki mipai katiniye-haxiatiani. Tsepa muwarukwikai Keruwuhani niwemama, miki hepaia tiyurieneti kanayani.

*'Eraha 'Ixaheri kwieyaritsie ti'aitame kemiratia*

8 'Atsá kepauka miti'aitakai Kura kwieyaritsie xeitewiyari heimana 'ataxewi wiyari, 'Eraha kanitsutiani ti'aitati 'Ixaheri kwieyaritsie yu'ukiyari Watsaha 'utima, huta wiyari katiniuta'aita Tiritsa kiekariyaritsie.

9 Peru Tsimiri titewati ti'uximayatsiriwametiti 'eye'unieti kanayani, kaxetate kuyaxa miemete mihiritiariakai hixiapa me'akame 'Eraha tipiinieya. Tiritsa kiekariyaritsie 'Eraha kaniuyeikakaitini xeime 'Aritsa titewakame kiita kani'ienekaitini, paratsiyuyata miti'aita hetsia.

10 Hiki 'ana kaneutahani Tsimiri kanimieni, 'anata miki kanitsutiani ti'aitati hetsiena mieme. Xeitewiyari heimana 'atahuta wiyari ti'aitakaku Kura kwieyaritsie 'Atsá katiniuyini.

11 Miki Tsimiri 'amiranukake kwitiwa yapauka kaniwarukwini yunaime Watsaha tiriyamama.

Yemekì 'atsita 'imatiriekà mieme 'uki kaniumièni, meta maremama yatini hamikumama.

<sup>12</sup> Mipai katiniwarukwini Watsaha tìriyamama, kanaye'atarieni Yawé niukieya Watsaha hetsiemieme kemutayikai niukameya Kehu ya'utainekaku.

<sup>13</sup> 'Iki naiti miya katiniuyini Watsaha 'axamitiuyuriki meta nu'aya 'Eraha, meta 'axameteyuriekame 'ixaheritsixi memiwarayeitiaki, meta yukakaiyarixiki Yawé mekaniuyehaxiatiani, 'Ixaheri Kakaiyarieya.

<sup>14</sup> Hipatita 'Eraha ti'aitakaku kemitiuyi meta naime kemitiuyuri, katinaka'utarieni kemitiuyi xapayaritsie 'Ixaheri kwieyaritsie te'aitamete waxapatsie.

*Tsimiri, ti'aitame 'Ixaheri kwieyaritsie*

<sup>15</sup> Xeitewiyari heimana 'atahuta wiyari ti'aitakaku 'Atsá Kura kwieyaritsie. Mexi kuyaxi 'ixaheritsixi piritsiteu kiekariyari Kiwetuni mekunakai, Tsimiri Tiritsa kiekariyaritsie 'atahuta tukari katiniuta'aita.

<sup>16</sup> Kepauka kuyaxi memite'utamari kename Tsimiri ti'aitame 'aye'unieti hayaka heimiekai, miki tukaritsie kwitiwa mematiteitsie kuyaxi 'ixaheritsixi yunaiti 'Umiri ti'aitame mekanayeitiani, kuyaxi wa'ukiyari mihikitikai.

<sup>17</sup> Hiki 'Umiri meta yunaiti 'ixaheritsixi hamatiana memu'uwakai mekanekine Kiwetuni me'uku'eirieka, Tiritsa kiekariyari pita mekaniukunani memiyutakwiniki.

<sup>18</sup> Hiki kepauka Tsimiri miretima kename kiekari ka'unarieximekai, hiki tuxiyu 'amutewita

kaneutihani paratsiyuta, kanitataiya. Mipai katiniumini

<sup>19</sup> 'axamitiuyuriki, Yawé kemikatinake katiniyurienekaitini, Keruwuhani puweiyakai ke'axamitiuyuri, 'ixaheritsixi 'axameteyuriekame muwarayeitia.

<sup>20</sup> Tawarita hipati kemitiuyi Tsimiri ti'aitame hikitikaku, meta ti'aitame 'aye'unieti kemiratia, kanaka'utarieni kemitiuyi xapayaritsie 'Ixaheri kwieyaritsie te'aitamete waxapatsie.

*'Umiri, 'Ixaheri kwieyaritsie ti'aitame*

<sup>21</sup> Hiki 'ana 'ixaheritsixi teiteriyari, me'ayehutati mekanakine: hixiata me'ati Tiwini Kinati nu'aya mepiparewiekai ti'aitame mayaniki, hipatita 'Umiri mepiparewiekai.

<sup>22</sup> Perutsi 'Umiri hetsia miemete mekan-wara'iwa Tiwini teiterimama, miki 'ana kaniumierieni meyukwitiweti. Hiki mipai 'Umiri ti'aitame katinayani.

<sup>23</sup> 'Atsá ti'aitakaku xeitewiyari heimana tamamata heimana xewi wiyari Kura kwieyaritsie, 'ana 'Umiri ti'aitame kanayani 'Ixaheri kwieyaritsie, katiniuta'aita tamamata heimana huta wiyari, yuniti 'ataxewi wiyari muyuriekai ti'aitati Tiritsa kiekariyaritsie.

<sup>24</sup> Merikitsi 'Umiri, xeime Tsemexi titewakame Tsamariya hiri-yari kaniunanairieni, haika tewiyari heimana 'ataxewi kiruyariki pirata, hiki mana kiekari kaniutawewieni. Tsemexi het-siemieme meripaiti miki hiri mitipiinieyatikaiki Tsamariya katiniteriwa.

25 Peru 'Umiri Yawé kemikatinake katini-uyurieni, kwinimieme matsi 'axakatiniuyurieni keyuri meripaiti memanuka'ui te'aitamete.

26 Keruwuhani Nawati nu'aya hepai katini-uyurieni, yaxeikia tiyurieneti miki 'ixaheritsixi kemitiwareuyexiri, yukakaiyarixiki Yawé mekaniuyehaxiatiani, 'Ixaheri Kakaiyarieya.

27 Tinaiti kemitiyi meta kemitiuyuri ti'aitame 'Umiri, katinaka'utarieni kemitiyi xapayaritsie 'Ixaheri kwieyaritsie te'aitamete waxapatsie.

28 'Umiri kaniumini, kaniukateukieni Tsamariya kiekariyaritsie. Nu'aya 'Akawi kanitsutiani ti'aitati 'itimana.

*'Akawi, ti'aitame 'Ixaheri kwieyaritsie*

29 Xeitewiyari heimana tamamata heimana 'atahaika wiyari 'Atsá ti'aitakaku Kura kwieyaritsie, 'Akawi 'Umiri nu'aya kanitsutiani ti'aitati, 'Ixaheri kwieyaritsie Tsamariya kiekariyaritsie katiniuta'aita xeitewiyari heimana huta wiyari.

30 'Akawi 'Umiri nu'aya, mikita yaxeikia katini-uyurieni Yawé kemikatinake, matsi te'aitamete meripai kiekatari wareuyeta katiniuyurieni.

31 Kwinimieme matsi 'axapitiuyuri Keruwuhani Nawati nu'aya kemikatiuyuri, Ketsaweri kaniutiwitini 'Eti-Wahari nu'aya tsiruniyutsixi tiwa'aitiwame, hiki kanitsutiani Wahari ti'uximayatsiriet meta 'eyexeiyati.

32 Tsamariya kiekariyaritsie tuki kanitawewirieni meta mawari taiyame hetsiena mieme,

33 metatsiere 'Akawi xeime 'Atserá 'uka kakaiyariyari kaniutawewieni. Hiki matsi mikiki

Yawé waikawa kaniuyehaxiatiani, 'Ixaheri Kakaiyarieya, kememikate'uyuri te'aitamete meripai miemete.

<sup>34</sup> Kepauka 'Akawi ti'aitame hikitikaku, Kiheri Weteri kiekametiti, Keriku kiekariyari muka'unariekai kananukuketiani. Kepauka tenariyari mutsutia kaniumini nu'aya mexiakame 'Awirani titewati, kepauka 'itupari meuwitaxia kaniumini nu'aya 'imatirieka mieme Tsekuwi titewati, Yawé Kutsuhexi Nuni nu'aya kemitiutahiawekai paye'atiarie.

## 17

### *'Eriyaxi kwatsari kememite'imikwakai*

<sup>1</sup> Merikitsita 'Eriyaxi, Titsiwe kiekame Karaha kwieyaritsie, kanekuyeixiani 'Akawi hetsia, mipai katinitahiawe: «Yuriki mipai nekanaineni Yawé hixie, 'ixaheritsixi takakaiyari, ne nemeyexeiya, mipai nepimerahiawe tawari pikakuhaitsiyata meta pikakawiye yapaimexia wiyari 'ena makahutsie, kepaukake ne yanemitayini».

<sup>2</sup> Hiki Yawé 'Eriyaxi mipai katiniutahiawe:

<sup>3</sup> «Kenemie tau manatineika hepatsie, Keriti 'akiyaritsie keneyuti'awieta, Kurutani 'anutaiye tau manatineika hepatsie.

<sup>4</sup> Miki 'akitsie pepehareka, ne kwatsari nepiwata'aitiani memimetehemikwaniki muwa».

<sup>5</sup> Hiki 'Eriyaxi kaneyani Keriti 'akiyaritsie paiti, Kurutani 'anutaiye, muwa kaniuyuhayewa, Yawé kemitiutahiawixi.

<sup>6</sup> Miki kwatsari ximeri taikai mekateni'atiriwakaitini paa meta wai, meta miki 'akitsie kaniharekaitini.



*Wiura Tsarepita kiekame*

<sup>7</sup> Peru miixa tukari 'anukayaku, miki 'akiyaritsie haa kaniukawani, miixari mikakawiyewekaiki miki kwieyaritsie.

<sup>8</sup> Hiki Yawé 'Eriyaxi mipai katiniutahiawe:

<sup>9</sup> «Hikita kenemie Tsareta paiti Tsiruni kwieyaritsie mana kenekani. Mana xeime wiura nepitiuta'aitia mimetimikwaniki».

<sup>10</sup> 'Ayumieme 'Eriyaxi kaneyani Tsareta paiti. Kepauka mana miye'a, kiekari kitenie xeime wiura kaniutaxeiya kiyexi teixineme. 'Itahiaweka mipai katinitahiawe:

—Ximixi, tekixita 'etsiwa haa kenehanemie nemanuhareniki.

<sup>11</sup> Hiki 'ari 'ayeyaku haa heuhanimiekaku, tawarita mipai katinitahiawe:

—Meta ximixi, paa 'etsiyeume kenena'iri.

<sup>12</sup> Peru wiura mipai katinita'eiya:

—Yuriki mipai nekanaineni Yawé hixie 'akakaiyari, paa 'etsiyeume tima nepikahexeiya, 'etsiwa xeikia xarita harina nepexeiya meta 'etsiwa hatseiti peyema. 'Ayumieme kiyexi nepiteixineikai nemenu'iniki nekie, 'ikwai nemekawewieniki neniwe hetsiemieme meta nehetsiemieme. Mikiri 'imatiriekka mieme ta'ikwai payani, 'anari tekanikwikuni haakaki.

<sup>13</sup> Hiki 'Eriyaxi mipai katinitahiawe:

—Pepikaheumaka. Kenemie 'akita mipai ketineyuri kepemiti'akuhiawekai. Peru nemeri kenenetawewiri xeime paa harina pemeixeyaki, meta kenenatuiriemie, 'ariketa kenetawewi 'ahetsiemieme meta 'aniwe hetsiemieme.

14 Mīpaitsi kanaineni Yawé 'ixaheritsixi takakaiyari: “Miki harina hawaiki pika'uyexini xarita miyeka, meta hatseiti xaritsie miyema, kepaukake Yawé wiyeri mani'ani 'ena kwiepa”.

15 Miki heyaka mipai katinikayani, 'Eriyaxi kemirehiawekai, hiki kanixuawekaitini 'ikwai wiura hetsiemieme meta niweya hetsiemieme metatsiere 'Eriyaxi hetsiemieme.

16 Yemekī Yawé niukieya kemainekai 'Eriyaxi niukameyatikaku, harina pika'uyexi xari 'aminenata meta hatseiti xaritsie miyemakai.

17 Merikitsi 'arikeke katiniutakwine wiura nu'aya, kwinie kaniuyini hiki kaniumini.

18 Hiki miki 'ukaratsi 'Eriyaxi kaniutatieni:

—ǂKetita perayexeiya nehetsia, tewi Kakaiyari hetsia mieme? Pepunua 'axakenemitiuyuri penet-sihaye'eritianike, 'anari neniwe miminiki.

19 'Eriyaxi mipai katinita'eiya:

—Kena 'aniwe.

Hiki 'inawairieka mamayatsie, kanenutikweni wapaiti muyehupukaitsie, muwa yu'utatsie kanikateni.

20 Hiki mipai kaniutayini: «Yawé peminekakaiyari, ǂyaxeikiata 'iki wiura, hetsiana nemunua, 'eki tiuka'eniwame perayeitiani nu'aya pe'imi'irieka?»

21 Hiki haikakia heimana kanahuni temaiki hetsie, meta mipai katiniuhiwa: «Yawé peminekakaiyari, 'iki temaiki tukarieya kenanuitiri».

22 Yawé 'Eriyaxi hiwarieya kaniu'enieni, hiki temaiki kananutaniere.

23 'Eriyaxi 'enukukweka muwayekatsie kaniwayekweni, kanenukakweni. Maamaya kaniye-tuirieni mipai katinitahiawe:

—'Aniwe kanayeyurini. Kami kenanukwekari.

24 Hiki miki 'ukaratsi, 'Eriyaxi mipai katiniutahiawe:

—Hiki matsi mipai nepitimate, 'eki tewi Kakaiyari hetsia mieme pepihiki, ketita pemitikuxata yuriki Yawé kaniniukieyatini.

## 18

### *'Eriyaxi meta 'Awiriyaxi*

1 Merikitsi miixa tukari 'anukayaku, hairieka wiyaritsie Yawé 'Eriyaxi mipai katiniutahiawe: «Kenemie 'Akawi hetsia, 'ari wiyeri nekananuni'amiki kwiepa».

2 Hiki 'Eriyaxi kanayeyani 'Akawi hetsia heyaka.

Mana Tsamariya kiekariyaritsie waikawa kanihaakaxatikaitini.

3 Miki tukaritsie, 'Akawi xeime yuparewiwame mexeiyakai 'Awiriyaxi titewakame, kimana katiniutani'ani, miki paratsiyuyata piti'aitakai, metatsiere Yawé hetsiemieme yapitikamiekai miki.

4 Ketsaweri Yawé niukametemama muwakwikaiki, 'Awiriyaxi xeitsienituyari piwaruti'awietakai huta teriyarita, huta tewiyari heimana tamamata xeime terita, yaxekia meyupaimemeta xeimeta, miki pitiwamikwakai piwaharitiakai meta.

5 'Akawi mipai katinitahiawe 'Awiriyaxi: «Naitsarie 'iki kwieyaritsie kenekunieri haixa pekuwauneti meta 'aki haa 'uhapaneme.

Heiwati muwa xaitsie 'ixa tehekaxeiya kawayutsixi muratsixi memayeyuyuriniki, mipai memikakwiniki tatewama».

<sup>6</sup> Hiki kwie hixiata mekaniyu'iniatsirieni mikitsie yuxexuiti memukuniereki. 'Akawi xeitapari kaneyani, 'Awiriyaxi meta xeitapari.

<sup>7</sup> Hiki 'Awiriyaxi huyeta 'umieti 'Eriyaxi kananukunake. 'Awiriyaxi heitimaika, 'anakatutsireka kwiepa, mipai katinita'iwawiya:

—'Eriyaxi neti'aitiwame, ¿yuriki 'eki petiyiane?

<sup>8</sup> 'Eriyaxi mipai katinita'eiya:

—Huu, ne nepihiki. Kenemie 'akutsiyari ketine-taxatia, kename 'ena ne'uyeika.

<sup>9</sup> 'Awiriyaxi mipai katinita'iwawiya:

—¿Ke'axa kuta netiuyuri ne titayari penetiyetuni 'Akawi hetsia, miki minetsimieniki?

<sup>10</sup> Yuriki mipai nekanaineni Yawé hixie 'akakaiyari, naitsarie nuiwarite watsata meta yunaime te'aitamete wahetsia neti'aitiwame katiniutani'ani 'aheki. Hiki kemi'ane memikametsi'utaxei, yuriki puwaku'iwawiyakai yamemitiyuaniki kename mekametsi'ukaxei.

<sup>11</sup> ¿Hikita 'eki peminetsini'a kename nekereitaxatiani neti'aitiwame kename 'eki 'ena pe'uyeika?

<sup>12</sup> Ne kenetimate hakewa mimatsi'anuwitini Yawé 'iyarieya, xika mipai nereitahiawe 'Akawi kename 'eki 'ena pe'uyeika, xikata miki kamatsi'utaxeiya pinetsimieni. 'Eki matsi mipai ketinemaika ne nunutsiyari paititi yanepitikamie Yawé hetsiemieme.

<sup>13</sup> 'Eki xiari mipai pepikatitaxatariewe neti'aitiwame, mipai nepitiuyuri kepauka

Ketsaweri miwakwinekai Yawé niukametemama, ne xeitsienituyari nepiwaruti'awietaxi Yawé niukametemama, huta teriyarita nepuwareuta'inaxi, huta tewiyari heimana tamamata xeimeta, yaxeikiata meyupaimeme xeimeta, ne nepitiwamikwa paa meta nepuwaharitia.

<sup>14</sup> Hikita 'eki pem̄netsini'a nem̄ireitaxatiani miki nekutsiyari kename 'eki 'ena pe'uyeika. Miki matsi kanenemiemiki.

<sup>15</sup> 'Eriyaxi mipai kaniutayini:

—Yuriki mipai nekanaineni Yawé Naimekimitirikaie hixie, kemi'ane nem̄iti'uximayatsirie, mipai nekametinahiaweni hiki ne 'Akawi hetsia nekanimieni.

*'Eriyaxi Kaximeru h̄riyaritsie*

<sup>16</sup> Hiki 'Awiriyaxi 'Akawi kanikuwauni, katinitaxatiani 'Eriyaxi hepaitsita, hiki mikita kaneyani 'Eriyaxi kanikuwauni

<sup>17</sup> hiki 'Akawi kepauka 'Eriyaxi muxei, mipai katinitahiawe:

—ǂ'Eki petihiki pem̄wa'uximatia 'Ixaheri kwieyaritsie kiekatari?

<sup>18</sup> 'Eriyaxi mipai katinita'eiya:

—Ne hawaiki nepikahiki 'Ixaheri kwieyaritsie kiekatari 'uximatiarika nem̄iwawiwirie. Kemi'ane 'uximatiarika mem̄iwawiwirie 'eki pekanihikitini meta 'a'iwama, Yawé 'aitsikaya xemuku'eiriki, Wahari kakaiyarixiyari xem̄iwarayexeyaki pitari.

<sup>19</sup> Hiki ketiniwarutaxatia teiteri naitsarie 'Ixaheri kwieyaritsie kiekatari, memeyukuxeirieniki nehamatia Kaximeru h̄riyaritsie paiti nauka

tsienituyari heimana huta tewiyari heimana tamamata Wahari niukametemama wahamatia, meta nauka tsienituyari 'Atserá niukametemama Ketsaweri mexayatsie memutiyaxike.

<sup>20</sup> Hiki 'Akawi yunaima kaniwarutakwewieni 'ixaheritsixi meta kakaiyarixi waniukametema Kaximeru hīriyaritsie paiti.

<sup>21</sup> 'Eriyaxi miki teiteri wahixie kaninuani, mipai katiniwarutahiawe:

—¿Kepaukari 'aixia xepitiyuani xeime hikame xepanukuweiya? Xika Yawé yuriki Kakaiyari hikitini, kaneuyeweka miki xemayexeiyani, xikata Wahari yuri kakaiyari hikitini miki xekeneuweiyani.

'Ana teiteri nixeiniuki 'atsimepika'utiyua.

<sup>22</sup> Hiki 'ayumieme 'Eriyaxi tawarita mipai kani-utayini:

—Ne xeikiari nekaniyuhayewaneni Yawé niukameya, peru matsi, Wahari kaniwarexeiyani nauka tsienituyari heimana huta tewiyari heimana tamamata niukamete.

<sup>23</sup> Yuhutame tuurutsixi xekeniwarahapani. Miki xeime meke'anayexeiya, meke'itaxiteni kiyexitsie mekeheyatsa waiyarieya peru meka'enutataiyati. Neta xeime tuuru nepukuha'aritanani neta kiyexitsie nekaneyat-samiki waiyarieya, peru nepika'enuta'iriya.

<sup>24</sup> Hiki miki yukakaiyari mekanitahiawikuni, neta Yawé nekanitahiawimiki. Kemi'ane tai makani'ani miki yuri Kakaiyari kanihikitini.

Yunaiti teiteri yamekatenuatanaki'erieni mipai mitiyiniki.

25 Hiki mipai katiniwarutahiawe 'Eriyaxi Wahari niukametemama:

—Xeme xemiyuwaikawaki, xeime tuuru xekenanayehanaka xeme meri xekeneutaxiteki. Hiki yukakaiyari xekeneutahiawi tai mani'aniki, peru xeme xepika'enutataiyani.

26 Wahari niukametemama xeime tuuru mekananayehana memi'atiiriyarie mekanitixitexiani, hiki yukakaiyari mekanahiawekaitini ximeri memutayua tuka kanayani miyame'utiyuanekaku.

Mawari taiyame memutawewi warita mehat-sunatikikati, mipai meniutiyuanekaitini:

—Wahari 'aku, ketaneuta'eiya.

Peru nitixaiti pikatiu'enierie, nitixaiti pikatiwaruta'ei.

27 Tuka 'aye'aku 'Eriyaxi kani-wananaimakaitini, mipai katiniwakihawekaitini:

—Karima matsi xekeneutihiwani, yuriki xiari kanikakaiyaritini, peru xiari kaneyu'iyaritiaka, yatini pire'uximayatane, yatini 'ateewa paiti kaneyeikani. Xiari matsi pekutsu, xekenanutahitia.

28 Hiki matsi waikawa mekaniutihiwatikine, kememite'uhukai, nawaxaki mepiyutixitekekai naiti mepeuxuxurekai xeikia.

29 Tuka kananukayani, miki yaxeikia meni yakaitini memika'u'iyarini wahapai, hiki kanaye'ani mawari taikai mieme hurayari. Peru nitixaiti pikatiu'enierie, nixewiti mikawaru'eniki nixewiti pikawaruta'ei.

30 Hiki 'Eriyaxi yunaime teiteri mipai katini-warutahiawe:

—'Ahurawa xekenakini.

Miki 'ahurawa mekaniukine. Mawari taiyame Yawé hetsiemieme mu'unikaiki 'Eriyaxi 'aixia kaniyurieni.

<sup>31</sup> Miki tetexi kaniukuteixi tamamata heimana hutame, yuxexuime nuiwarite wahetsiemieme Kakuwu niwemama, miki Yawé 'Ixaheri mititeriwaxi.

<sup>32</sup> Miki tetexiki mawari wewiwame kaniutawewieni Yawé hetsiemieme, waritanata kana'inetiyani, tamamata heimana 'auxiwime rituruyari reukanakeme hatsite.

<sup>33</sup> Kiyexi 'aixia katiniutuani, tuuru kaniutixi-texiani, waiyari kananuyatsatiyani,

<sup>34</sup> hiki mipai kaniutayini:

—Xekeneutihiniya naukame xarite haki, xekeneutiyeuriexia mawari taiyariyari heima meta kiyexitsie.

Hutariekata mipai kaniutayini:

—Tawarita mipai xeketeneuyuri.

Hiki mipai mekatenuyurieni.

Hairieka mipai katiniwaruta'aitiani:

—Tawarita mipai xeketeneuyuri.

Hairieka xarite mana mekaniutiyeuriexiani.

<sup>35</sup> Haa kaniuhapanekaitini mawari taiyame waritatsie, meta ma'inetiyakaitsie kaniutahine.

<sup>36</sup> Kepauka maye'a mawari taikai mieme hurayari, Kakaïyari niukameya 'Eriyaxi xeikayari yekeka mipai katiniuyunenewieni: «Yawé, 'Apirahami Kakaïyarieya meta 'Itsahaki metatsiere 'Ixaheri, hiki 'ena yunaiti mipai meketehetimani 'eki Kakaïyari pemihiki 'Ixaheri kwieyaritsie, meta kename ne



neti'a'uximayatsiriwame nehiki, meta  
meketehetimani 'iki miya nemitiyuriene  
yapeneti'aitiakaku xeikia netiyuriene.

<sup>37</sup> Yawé keneneuta'eiya, 'iki teiteri  
yamemitehetimaniki, kename Yawé, Kakaiyari  
pehiki, meta pemiwa'inie 'ahetsie yuri  
memite'eriekaki».

<sup>38</sup> 'Ana kwitiwa Yawé tai muyuawitsie mieme  
kaneyeni'ani, miki wai mawari taiyariyari het-  
siemieme kaniutitaiya, kiyexi naime, tetexi, meta  
kwie, 'atsita haa kanakuwatsiixa ma'inierietikata  
miyemakai.

<sup>39</sup> Kepauka teiteri yunaiti mipai  
memite'unenierixi, mekaniukatunuma'uni, mipai  
mekaniutiyuani: «Yawé Kakaiyari kanihikitiini,  
yemeki yuri Kakaiyari».

<sup>40</sup> Hiki 'ana 'Eriyaxi mipai katiniuta'aita:

—Xekeniwaretiwiya Wahari niukametemama,  
nixewiti pikaheyuta'unani.

Kepauka memiwarutiwi, 'Eriyaxi katiniuta'aita  
Kitsuni 'akiyaritsie memanuhapanieniki, muwa  
kaniwarukwini.

<sup>41</sup> Hiki 'Eriyaxi 'Akawi mipai katiniutahiawe:

—Keneumieni, ketinekwaka, kene'ieka, 'ari wiy-  
eri muwa kanayuaximeni tirikaiyeti waikawa.

<sup>42</sup> 'Akawi kaneyani mirekwakaki me'iekaki,  
peru 'Eriyaxi Kaximeru hiriyaritsie kaneutiyune,  
mana kananakatutsire kwiepa, yuhixie 'utitunuti  
katiniuyerini.

<sup>43</sup> Hiki tiyu'uximayatame mipai katiniutahiawe:

—Kenemie haramaratsie keneukanieri.

'Iparewiwameya heyaka heukaniereka mipai  
kaniutayini:

—Nitixaiti nepikatiyeia.

'Eriyaxi miki 'atahutamexia kaniutani'ani mana meukaneniereniki,

<sup>44</sup> 'atahutarieka ti'uximayatameya mipai katinitaxatiani:

—Haramaratsie 'atineka hai mana kanatimieni. 'Etsikanipeni mama hepai.

Hiki 'ayumieme 'Eriyaxi mipai katinitahiawe:

—Kenemie 'Akawi mipai ketinetahiawi: “Kaxeta keneukuha'aritiaka kenanutiyerika kenemieri, wiyeri nika metsi'ukunuitiani”.

<sup>45</sup> Haiwitiriki muyuawitsie kaniukiye, hiki waikawa kaniuku'eka, kaniukawiye tirikaiyeti. Peru 'Akawi kaneyani kaxetatsie Ketsireri 'erieti.

<sup>46</sup> Hiki Yawé tirukariyaya kaninuani 'Eriyaxi hetsie, yuhiiyameki 'anayuhiaka kaniutanautsa, Ketsireri paiti kaniuta'ani 'Akawi 'akuxi kata'awekaku.

## 19

### *'Eriyaxi kemitiuyuta'unaxi*

<sup>1</sup> Hiki 'Akawi 'uka Ketsaweri katiniutaxatiani naima 'Eriyaxi kemireyuri, kemitiwarukwikai yunaima Wahari niukametemama 'ixiparaki.

<sup>2</sup> Hiki Ketsaweri xeime kaneni'ani 'Eriyaxi hetsia, mipai mititahiaweki: «Kakaiyarixi mekenetsi'u'uximatiani mekanetsinenimayati xika 'uxa'a 'epauka 'akuxi nekametsimieweni kepemitiwarukwi 'iya».

<sup>3</sup> 'Ana 'Eriyaxi kaniutimani kaniuyuta'una mikamierieniki. Kepauka Weritsewa meta'a Kura kwieyaritsie, mana yuparewiwame kaniuku'eirieni,

4 hiki kaneyani makumawetsie xeitukari kaniumiekaitini. Kepauka 'umieti 'itsi hetia kaninuani, miki 'etiriyayatia kaniutayerini 'ari heumimiti, mana mipai kaniutayini: «Yawé 'aku, 'ari nepu'uxeri. Netukari keneneunawairi, ne'ukiyarima ke'aixia memite'u'iyarikai mipaikuta nepikatiuka'iyari».

5 Hiki 'itsitia kaniukahuni 'ana kaneukuni.

Yapaukata, niuki tuayame kanimayiani mipai katinitahiawe: «Kenanukukexi, ketineukwa'i».

6 'Eriyaxi 'anukukeka kananieretiyani, hiki manutimu'utsie paa kaniuxeiya xikeke kwaxiyariekame titsie meta haa xeitekixiyari. Katiniukwani meta kananuhareni, hiki tawarita kaniukahuni.

7 Hutarieka niuki tuayame Yawé hetsia mieme kaninuani, 'ikuyuitiwati, mipai katinitahiawe: «Kenanukukexi, ketineukwa'i, tewa pekaniyemieni».

8 'Eriyaxi kananukukeni, katiniukwani meta kananuhareni. Miki 'ikwaiki 'utatirikaxiaka, huta tewiyari tukari huta tewiyari tikari kaniumiekaitini 'anake kaneta'ani Huré paiti, hiri Kaka'iyari hetsia mimieme hetsie paiti.

9 Mana 'ana tikariki terita kanayekateitini.

*Yawé 'Eriyaxi hixie kemitiyuhekiataxi*

'Arikeke, Yawé kanitahiawe, mipai katinita'iwawiya:

—¿'Eriyaxi, kepetiyuriene 'ena?

10 Mipai katinitahiawe 'Eriyaxi:

—Ne nepimatsinaki'erie waikawa yemeki, Yawé Kaka'iyari Naimekimitirikaiye pemihiki. 'Ixaheritsixi mekaniku'eirieni 'atiratu, mawari

taiyame 'ahetsia mieme mekaniuti'una, meta 'ahetsia miemete 'aniukamete mekaniwarukwini 'ixiparaki. Ne xeikiari nekaniuyeikani nexaitame, hikita ne mekaneniwautiweni menetsimienike.

<sup>11</sup> Yawé mipai katinitahiawe:

—Kenwayeye'a kenemie yemuritsie mana nehixie keneweni, 'ari kanaye'aximeni mana nemuyeyaniki.

Hiki Yawé ni'arieya hepai 'anuyekaiti meri kananuyeyani 'eka kwi tirikaiyeti, naiti hiri kaniutayuanekaitini, 'ai kaneukutarikekaitini, peru Yawé 'ekatsie pika'uyeikakai 'akuxi. Hiki 'eka 'anuyeyaku kwie kaniutayuan, peru mikitsieta Yawé pika'uyeikakai.

<sup>12</sup> Kwie 'utayuaku miki 'utimata kananuyeyani tai, peru yaxeikiata miki tai hetsie Yawé pikayewekai. Tawarita miki tai 'utima kaninuani 'etsiwa yuariya kayuwati 'umakakaku.

<sup>13</sup> Kepauka 'Eriyaxi mi'eni, kaneuyukunani yuhixie yumataki, wayeyaka teri hixie kaniutakeni.

Hiki niuki kaniu'enieni mipai rehiaweme:

—¿Kepetiyuriene 'Eriyaxi 'ena paiti?

<sup>14</sup> Mipai katinita'eiya 'Eriyaxi:

—Ne nepimatsinaki'erie waikawa yemeki, Yawé Kakaiyari Naimekimitirikaiye pemihiki. 'Ixaheritsixi mekaniuku'eirieni 'atiratu, mawari taiyame 'ahetsia mieme mekaniuti'una, meta 'ahetsia miemete 'aniukamete mekaniwarukwini 'ixiparaki. Ne xeikiari nekaniuyeikani nexaitame, hikita ne mekaneniwautiweni menetsimienike.

<sup>15</sup> Yawé mipai katinitahiawe:

—Kenakunua 'a'utima 'ahuyeta kepemirane, kenemie Ramatsiku makumawetsie. Kepauka

pemeta'ani mana, Katsaheri pepanayexeiya ti'aitame mayaniki Tsiriya kwieyaritsie,

<sup>16</sup> meta Kehú Nimitsi nu'aya, ti'aitame mayaniki 'Ixaheri kwieyaritsie, metatsiere 'Eritseu Tsapati nu'aya, 'Aweri-Mekura kiekame kenanayexeiya 'a'utia 'ahetsiemieme neniukame mayaniki.

<sup>17</sup> Kehú kaniwakwimiki kemi'ane muyuta'una Katsaheri hetsia, 'Eritseu kaniwakwimiki kemi'ane muyuta'una Kehú hetsia.

<sup>18</sup> Matsi, ne nepiwa'iwiyani 'atahuta miriyari 'ixaheritsixi memikakatunuma'uiwawe Wahari hixie meta memika'i'itsiwawe.

### *'Eritseu kemiranayexeyarie*

<sup>19</sup> 'Eriyaxi mana kaniyeyani, hiki 'Eritseu kaniukaxeiya Tsapati nu'aya, kanikwiet-sananekaitini. Mana menikwietsanatiwekaitini tamamata heimana huta paritsiyari tuurutsixi, miki wa'utia miemete pahanakai. 'Eriyaxi 'auriena 'uyeyaka yumata 'amiyewa kaneitawiwirieni hetsiena.

<sup>20</sup> Hiki 'Eritseu waruku'eirieka yutuurutsixi 'Eriyaxi 'utima kaniutanautsa. Mipai katinitahiawe:

—Keneneupitia 'eki, nepaapa nemaama nemiwatateutianiki 'itsiyaki, hiki 'anake nepimatsi'anuweiya.

'Eriyaxi mipai katinita'eiya:

—Kenemiekakuta. Ne nepikamatsita'imaiya.

<sup>21</sup> 'Eritseu mana kaniku'eirieni peru kaninu-anita. Yutuurutsixi memuyuhuta kwietsanamete kaniwarukwini mawari kaniwarayeitiani. Yuku kiyé kwietsaname 'utataiyaka, wai kaniutiwarika

hiki te'iteri kaniwarumini, mikita mekatenuk-wani. Hiki 'ana kaneyani 'Eriyaxi mukuweiyaneniki 'iparewiwameya kanayani.

## 20

### *Ti'aitame Weni-'Arari Tsamariya kemitiutami*

<sup>1</sup> Hiki Weni-'Arari Tsiriya kwieyaritsie ti'aitame, yunaime yukuyaxi kaniwarukuxe'rieni, kanayeyani Tsamariya tamienike hiki kiekari warie menayaxetikine meta mepeweyiakai hipati te'aitamete xeitewiyari heimana tamamata heimana huta meyupaimeti, kawayutsixi mepiwaruhapakai meta kaxetate kuyaxa miemete.

<sup>2</sup> Tsamariya kiekariyaritsie hipame kaniwarutani'ani niuki tuayamete mipai memiteheitahiawe'ki 'Akawi m'iti'aitame 'Ixaheri kwieyaritsie: «Mipai kanaineni Weni-'Arari:

<sup>3</sup> “Ahuru meta 'apirata katininepinitini, meta yaxeikia 'a'itama metatsiere 'aniwema temari”».

<sup>4</sup> 'Ixaheri kwieyaritsie ti'aitame niuki mipai 'aneme kaneni'ani: «Kepemaine, nekutsiyari meta neti'aitiwame, ne 'ahetsia nekanimiemetini, meta naimetita nemirexeiya».

<sup>5</sup> Tawarita niuki tuayamete mekanieu'axiani 'Akawi hetsia, mipai mekatenuitahiawe: «Mipai kanaineni Weni-'Arari: “Mipai nepireni'a pekenetsiyetuirieni 'ahuru 'apirata, 'a'itama meta 'aniwema.

<sup>6</sup> 'Ayumieme, 'uxa'a 'epauka nepi'waranuni'ani nete'uximayatsiriwamete 'aparatsiyuta memeu-tahaxianiki meta te'a'uximayatsiriwamete waki-ita, miki naime mepitewayetini tita waikawa miraye'atika, miki mepite'anutini"».

<sup>7</sup> 'Ixaheri kwieyaritsie ti'aitame yunaime katini-warutani'airieni 'ukirawetsixi, mipai katiniwarutahiawe:

—Neuxei 'iki waikawa 'uximatiarika piwiwiene temiyeha'aniki. Kepauka miki mireyeni'a, kename neke'iyetuirieni, ne'itama meta neniwema nepirata meta nehuru, nepimatiyetuirieni nepirehiawekai.

<sup>8</sup> 'Ukirawetsixi meta yunaiti kiekatari mipai mekanutiuyuani:

—Ti'aitame. Hawaiki pepika'i'enieka meta pepikatikupitiwani tita mimitiwawirie.

<sup>9</sup> 'Ayumieme 'Akawi mipai katiniwarutahiawe Weni-'Arari ni'arimama:

—Mipai xeketenetahiawi neti'aitiwame: “Ne, mati'uximayatsiriwame nemihiki, tinaime nepimatiyetuirieni ketita pemitutawau matiani paiti, peru hikiri hekwameki peminetiawawirie nepikayiwe nemimatiyetuirieni”.

Miki mekanakunuaxiani Weni-'Arari hetsia mipai mete'utahiawarieka.

<sup>10</sup> Hiki Weni-'Arari tawari niuki 'Akawi kaneni'airieni: «Mekenetsi'u'uximati'ani kakaiyarixi, xika Tsamariyatsie 'etsiwa tumuanari 'uyuhayewa, xika nekuyaxima meyiawaweni xetituiyari memanutuniki».

<sup>11</sup> Peru 'Ixaheri kwieyaritsie ti'aitame mipai katiniuta'ani: «Mipai xeketenetahiawi mipai pikarekwikani 'akuxi karayu'iawaweti».

12 Kepauka Weni-'Arari, 'iki niuki  
 mi'atiiriyarie, kani'iekaitini hipame  
 te'aitamete wahamatia mematitekaitsie.  
 Yapauka miki mipai katiniwaruta'aitiani  
 yukuyaxima: «Xekeneuyukuha'aritia». Hiki  
 miki mekaniyukuha'aritia miki kiekari  
 memitamieniki.

*'Akawi Weni-'Arari kemira'iwaxi*

13 Merikite 'ipai katiniuyini, 'Ixaheri kwieyarit-  
 sie ti'aitame 'Akawi hixie kaninuani xewiti tewi  
 Kakaiyari niukameya, mipai katinitahiawe:

—Yawé mipai kanaineni: “¿Petiwaxeiya miki  
 kuyaxi memiyumiire? Hiki nekaniwayetuamiki  
 'ahetsia pemiwara'iwaki, hiki 'ana mipai  
 pepiretimani kename ne Yawé nehiki”.

14 'Akawi mipai katiniuta'iwauni:

—¿Kemi'ane waheki pitiyurieni?

Mipai kaniutayini Kakaiyari niukameya:

—Mipai kanaineni Yawé: “Mipai nepitiyurieni  
 kuyaxi temari waheki, miki me'anuyetekaku”.

'Akawi tawari mipai katiniuta'iwauni:

—¿Kemi'ane meri pitikatsutiani?

Kakaiyari niukameya mipai kaniutayini:

—'Ekititi.

15 Hiki 'Akawi kaniwarukuha'aritia kuyaxi  
 temari, miki huta tsienituyari heimana  
 xeitewiyari heimana tamamata heimana huta  
 (232) mekaniyupaimekaitini. Meta hipame  
 kuyaxi 'ixaheritsixi kaniwarukuha'aritia: miki  
 yunaiti mekaniyupaimekaitini 'atahuta miriyari  
 (7.000).

16 Hiki tuka 'ayaku mekanayekine, mexi Weni-  
 'Arari meta xeitewiyari heimana tamamata



heimana huta te'aitamete miwara'inieka yunaiti mehetariwekai mematiteitsie.

<sup>17</sup> Kuyaxi temari mekananuyetekaitini. Kepauka nenieremete Weni-'Arari muwani'akai mipai memite'itaxatia kename hipati kuyaxi 'ahurawa mehahukai Tsamariya mehayenexiaka,

<sup>18</sup> mipai katiniuta'aita Weni-'Arari: «Xekeni-waretiwiya xepikawarekukukuyani, tsepa 'aixia 'iyari memikiya yatsepa memitatsikukwitiwe».

<sup>19</sup> Kuyaxi temari kiekaritsie mekanayekine kuyaxi wahixie me'anuyeteti.

<sup>20</sup> Kuyaxi yuxexuiti yuxexuime mekani-warukwini memiwaraye'unie, hiki 'ana tsiriyatari mekaniyuta'una. 'Ixaheritsixi mekaniwaranukuweiya, matsi Weni-'Arari Tsiriya kwieyaritsie ti'aitame kaniuyuta'una hipame kawayutsixi wahetsie memutekai wahamatia.

<sup>21</sup> 'Ixaheri kwieyaritsie ti'aitame kaniyemiekaitini wakwineti, kawayutsixi wahetsie memutekai kaniwarukwini, meta kaxetate yuhetsiemieme kanayeitiani, yemeki waikawa tsiriyutsixi mekaneuyehiiyani.

<sup>22</sup> 'Arikeketa, kaninuani Kaka'iyari niukameya 'Ixaheri kwieyaritsie ti'aitame hetsia, mipai katinitahiawe: «Kayuwati xeikia pepikatikani pemirayu'i waxiki, keneyu'iyaritiaka matsi kehepai pemitiyurieni, kariki yurikata kaninuamiki ti'aitame Tsiriya kiekame».

<sup>23</sup> Merikitsi, Tsiriya kwieyaritsie ti'aitame parewiwamete mipai mepite'eyemari'itia: «'Ixaheritsixi wakaka'iyarixi hiritisie miemete mekanihikitiini. 'Ayumieme waikawa

mekanitirikawini tahetsiemieme. Xika  
tewarutakwini makuweritsie mana hirixia  
tekaniwara'iwawaweni.

<sup>24</sup> 'Eki 'ipai ketineuyuri: Yunaime te'aitamete  
keniwarutipata hipame pita keniwaranuka'uitia  
'ahetsia memite'uximaya.

<sup>25</sup> Meta keniwarukuha'aritia kuyaxi meripaiti  
pemiwarexeiyakai hepai meyupaimeme,  
kawayutsixi meta kaxetate kuyaxa miemete  
yaxeikia paime, temiwatakwiniki  
'ixaheritsixi makuweritsie. Kanahekiaka  
tekaniwara'iwakuni».

Ti'aitame Weni-'Arari yakatiniutanaki'erieni,  
mipai katiniuyurieni.

<sup>26</sup> Xeiwiwari 'anuyeyaku, yukuyaxima  
kaniwarukuha'aritiani, mekanekine 'Apeki  
mirakutewatsie mana memiwatakwiniki  
'ixaheritsixi.

<sup>27</sup> Meta ti'aitame 'Akawi yaxeikia yukuyaxima  
kaniwarukuha'aritiani meta 'ikwai katiniwaye-  
tuirieni kepaime memiteheuyehiakai. Hiki  
mikita mekanayekine wahapa memiwatakwiniki  
tsiriyutsixi, yatewa mekanikuyaxe wahixie.  
'Ixaheritsixi 'etsimepiyupaimakai, tsipuri  
xeitewayari 'etsimemiyupaima wahapai  
mepiteyuxexiyakai, peru tsiriyutsixi  
mepakutsekai makuweritsie.

<sup>28</sup> Tewi Kakaiwari hetsia mieme kaninuani  
'ixaheritsixi tiwa'aitiwame hetsia mipai  
katinitahiawe: «Yawé mipai kanaineni:  
“Tsiriyutsixi mipai memiteku'eriwaki kename  
Yawé kakaiwari hiritsie mieme hiki peru  
makuweritsie katixai. Ne nepiwayetuan

miki memiyumiire kuyaxi 'ahetsia, mipai pemiretimaniki kename ne Yawé nehiki”».

29 'Atahuta tukari mekaniuyurieni yuhixie metiteti, 'ana 'atahutarieka tukaritsie mekanitsutiani meyukwitiweti. Xeimieme 'ixaheritsixi xeitukaritsie mekaniwarukwini xeitsienituyari miriyari kuyaxi tsiriyutsixi yu'ikama memu'uwakai.

30 Hipati kuyaxi mekaniyuta'unaxiani 'Apeki kiekariyaritsie, peru mana kiekari kuraruyari wahetsie kaniu'une kaniwarukwini xeitewiyari heimana 'atahuta miriyari.

Weni-'Arari meta muyuta'unakai, mana kaniyu'awietanekaitini xeikia kiekaritsie.

31 Hiki 'iparewiwamete mipai mekatentahiaawe: «Mipai tepitemarie kename te'aitamete 'ixaheritsixi meteyukanenimaya. Hikimi 'Ixaheri kwieyaritsie ti'aitame hetsia tepitayetuani, tepeitawawirieni mitareuyehiwirieniki. Heiwati tiyime mereuyehiwirieni kametsi'umieni».

32 Hiki 'Ixaheri kwieyaritsie ti'aitame hixie mekaniyuyetuani, mipai mekatenitawawirieni:

—Weni-'Arari matsiparewiwame mipai paine: “Neuxei kwieri nepimatsiwawirie, pepikanetsikumemiwani”.

Ti'aitame mipai kaniutayini:

—ǵ'Akuxi rayeniere? Kariki miki kanine'iwatini.

33 Hiki miki teiteri ti'aitame niukieya me'u'enieka 'aixia mainekaiki, mipai mekaniutiyuani:

—Huu tsikarikite, Weni-'Arari kani'a'iwatini.

Ti'aitame mipai katiniwarutahiaawe:

—Xekenewitiyu miki.

Kepauka Weni-'Arari munua 'Akawi hetsia, miki kanenutiyeni yukaxetatsie kuyaxa miemetsie. Hiki Weni-'Arari mipai katinixatiani:

<sup>34</sup> —Ne nepimatsiyetuirieni kiekarite nepaapa 'apaapa munawairiekai. Meta 'eki pepiyiwe Ramatsiku kiekariyaritsie pemika'uitiani hakewa miretuiyaka 'ahetsiemieme, nepaapa kemitiyurienekai Tsamariya kiekariyaritsie.

'Akawi mipai katinitahiawe:

—Neta hiki miya pemaineki, nekamenitat-uamiki pemiymieki.

Mipai tiratu katiniuwewieni hamatiana, hiki 'ana kanitatuani kanipitiani miyemieki.

*Tewi Kakaiyari niukameya 'Akawi kemitiutahiawixi*

<sup>35</sup> Xewiti tewi Kakaiyari niukametemama wanuiwaritsie miemetiti, Yawé yarehiawekaku, xeime yu'iwa mipai katiniutahiawe:

—Keneneutiwaxia.

Peru 'iwaya pika'uyuwaitiriyaxi kemirehiawekai.

<sup>36</sup> Hiki 'ayumieme Kakaiyari niukameya mipai katinitahiawe:

—Yawé niukieya pemikahanu'eniki, hiki kwitiwa pemiymietsie maye kamenetakwaimiki.

Hiki mipai katiniyini, yapauka miki Kakaiyari niukameya metiatsie, muwa maye hayeneka kan-itakwani.

<sup>37</sup> Hiki 'arike miki tewi Kakaiyari niukameya xeime pitata hanukunakeka tewi mipai katinitahiawe: «Keneneutiwaxia» Yapauka miki tewi kaneitiwaxiani katinikwinitiani.

<sup>38</sup> Hiki 'ana miki Kakaiyari niukameya kaneyani huyeta mana ti'aitame hekwewienike, kaneuyukunakaitini yuhixie 'ixurikiki.

<sup>39</sup> Kepauka ti'aitame mana muyemiekai, Kakaiyari niukameya mipai katiniuhiwa hixiena:

—Ti'aitame. Ne kuyaxa maxuawe yemeki nepeyeikakai. Mana xewiti nehetsia kanenuani xeime tewi 'ahanati memitatsikwitiwe, hiki mipai kanetinetahiawe: “Iki tewi kene'iwiyani. Xika metsi'utawikweiya hetsiena mieme 'eki nekamenimimiki, mexikatini haika miriyari pirata tuminiyari pekaniyetuamiki”.

<sup>40</sup> Neuxe ti'aitame, ne mexi 'akuxi xaitsie neheyeikakai, miki tewi kanetayuni.

'Ixaheri kwieyaritsie Ti'aitame mipai katinitahiawe:

—Mikitsiri 'ahetsie katinahiiyamiki kepemaine.

<sup>41</sup> Hiki 'ana, Kakaiyari niukameya meuyukuhikai kaneuyukixina, 'anake 'Ixaheri kwieyaritsie ti'aitame Kakaiyari niukameya kanetimani.

<sup>42</sup> Hiki ti'aitame mipai katiniutahiawe:

—Yawé mipai kanaineni: “Xeime tewi pekaniutatuani ne nemita'aitakai mumierieniki. Hikiri 'ayumieme, 'eki pitari pekanimieriemiki hetsiena mieme, meta 'ateiterima miki teiterimama wahetsiememe”.

<sup>43</sup> Hiki 'Ixaheri kwieyaritsie ti'aitame, nutuixiet meta ha'ati kanakunuani Tsamariya paiti yuparatsiyuta.

## 21

*Nawuhuti harawerieya*

<sup>1</sup> Merikitsi yapaimexia tukari 'anukayaku mipai katiniuyini: Nawuhuti titewati Ketsireri kiekame, yukaxie haraweriyari kanexeiyakaitini miki kiekariyaritsie, ti'aitame 'Akawi paratsiyuya 'aurie, Tsamariya miti'aitametikai.

<sup>2</sup> Hiki 'Akawi miki Nawuhuti mipai katiniutahiawe:

—'Akaxie haraweriyari keneneutuiri muwa ne nemitineka'etsirieniki, puhurawa neparatsiyu manuwe 'ayumieme nepaine. Nepimatsipatsirieni xeime 'aixia 'anekameki matsi, yatini nematinanairieni kemiraye'axe.

<sup>3</sup> Peru Nawuhuti mipai katinita'eiya:

—Neti'aitiwame, Yawé yapikatinaki'erie nemimatsituirieni, tita ne'ukiyarima memineteyetui.

<sup>4</sup> Hiki 'Akawi kaneyani yukie nutuixieti meta ha'ati Nawuhuti Ketsireri kiekame mipai mititahiawixiki: «Nepikayawe nemimatiyetuirieni neti'aitiwame, tita ne'ukiyarima meminete'uku'eiriri». 'Ayumieme mikiki yukiita kaniukahuni 'ixumeritsie heuniereti, meta katikwaimiti kanayani.

<sup>5</sup> 'Iyaya Ketsaweri kiitana heutahaka mipai katinita'iwawiya:

—¿Ketitayari kwinimieme peti'ahiwerie yemeki pekatikwaimiki?

<sup>6</sup> —Nawuhuti mipai nepirahiawekai Ketsireri kiekame yuharaweri kenetsi'utuirienike, xikata ka'inakenike, nepitipatsirienikekai xeimeki pita, peru miki yapikatiutanaki'eri.

<sup>7</sup> Miki hepaitsita 'iyaya Ketsaweri mipai katinitahiawe:

—¿Tami 'eki pekatihiki 'Ixaheri kwieyaritsie pemiti'aita? Neuxei, kenanukukexi ketineukwa'i, 'aixia pekatineka'erietiyemiki. Ne nekameniku-niukiriemiki miki xeniu Nawuhuti harawerieya.

<sup>8</sup> Miki yapauka xapa puti'utia kename 'Akawi niukieya, mana ti'aitame tseyuya kaneumanaxiani, hiki kanitani'axiani 'ukirawetsixi wahetsia meta kiekari hetsiemieme memanuyetei wahetsia Nawuhuti kie kiekatari.

<sup>9</sup> Miki xapatsie mipai katine'ukaitini:

«Mipai xeketeneta'aita teiteri meke'uyuhakieni xeitukari, hiki teiteri xekeniwarukuxeiri, miki yunaime wahixie Nawuhuti xekenayetsa.

<sup>10</sup> Miki hetsiemiemeta yuhutame 'auriena xekeniwarutiyatsa kemi'ane memika'uyukatetewiya, mipai memitiyuaniki kename miki Kakaiyari hepaitsita 'axa'utaine meta ti'aitame hepaitsita. 'Anari xekaniwayehanikuni tetexiki xekanitituaxixiakuni xekanimiekuni».

<sup>11</sup> 'Ukirawetsixi meta kiekari hetsiemieme memanuyetei yamepitekaki Ketsaweri kemiraka'utia xapatsie.

<sup>12</sup> Yamepite'uta'aitaxi xeitukari teiteri memuyuhakieniki meta Nawuhuti mekaniutakwewieni yunaime teiteri wahixie mekaneyeni.

<sup>13</sup> Hiki mekaniu'axiani memuyuhuta memika'uyukatetewiya, hixiena me'ayaxeka hetsiena mekatenahiani teiteri wahixie, mipai mekaniutiyuani: «'Iki Nawuhuti Kakaiyari hepaitsita 'axakaniutaineni meta ti'aitame hepaitsita». Hiki 'ayumieme, teiteri mekaneihana kiekari warita paiti, mana tetexiki me'itituaxati

mekanimieni.

<sup>14</sup> Hiki Ketsaweri mipai katiniutahiawarieni:  
«Nawuhuti 'ariri kanetituaxiexiani kanemini».

<sup>15</sup> Kepauka Ketsaweri mipai mitiumari kename  
Nawuhuti hemi hetituaxiexiaka, mipai 'Akawi  
katiniutahiawe: «Hikiriari. 'Apiini kenayeitia  
Nawuhuti Ketsireri kiekame harawerieya  
mikamatsituriemikikai. Hikiri 'apika'uyeika,  
kaniuminiri».

<sup>16</sup> Kepauka 'Akawi mipai miretima kename  
Nawuhuti 'ari 'umikai, miki haraweri yupiini  
kanayeitiani.

<sup>17</sup> Merikitsi Yawé 'Eriyaxi Titsiwe kiekame  
mipai katiniutahiawe:

<sup>18</sup> «Kenemie 'Akawi hetsia, 'Ixaheri kwieyarit-  
sie miti'aitame, Tsamariya miti'aita. Miki hiki  
Nawuhuti harawerita kaniyeyeikani, hikiri miki  
yupiini kanayeitiwani.

<sup>19</sup> Mipai ketinetahiawi: “Mipai kanaineni  
Yawé: Pekanimimiki, Nawuhuti pemumiki  
meta harawerieya 'apiini pemayeitiaki”.  
Tawarita mipai ketinetahiawi: “Yawé mipai  
kanaineni: Hakewa Nawuhuti xuriyaya  
tsikiri memekutsenaxi, manatatsiere 'axuriya  
mepukutsena”».

<sup>20</sup> 'Akawi mipai 'Eriyaxi katiniuta'eiya:

—Nemimatsi'aye'unie. ¿Kamitsi penetiukaxei?

'Eriyaxi mipai katinita'eiya:

—Huu, nekameniukaxeiya pemuyuyetuaki  
'axapemitiyurieniki Yawé kemikatinake,

<sup>21</sup> hiki miki mipai kamatinahiaweni:  
“Uximatiarika nekamenanuni'airiemiki.



Nekamenikumaweriyamiki, meta 'anui-warima 'Ixaheri kwieyaritsie meta mate'uximayatsiriwamete.

22 Yaxeikia nekatiniyurimiki 'atiriyama wahetsie, Keruwuhani Nawati nu'aya tiriyamama wahetsie nemitiuyuri hepai, meta Watsaha 'Ahiyaxi nu'aya tiriyamama wahetsie, peminetsi'uyehaxiatiaki meta yapemitiuyuriki 'ixaheritsixi 'axamemiteyurieniki”.

23 Ketsaweri hetsiememeta Yawé mipai kanaineni: “Tsikiri mekanitakwaikuni mana Ketsireri kuraruyari hetia”.

24 Yaxeikiata 'Akawi tiriyamama, miki memikwini kiekaritsie mekaniwatikwaikuni tsikiri, kemi'aneta yeuta memikwini mekaniwatikwaikuni wirikixi.

25 Xewiti tawari mipai pika'iyi 'Akawi hepai, 'iyaya Ketsaweri 'imatiakaku ti'ikitiakaku, 'axakatiniryienekaitini Yawé kemikatinake.

26 Kemitiuyeikakai yemeki kwinimieme 'axapitiuyuri, hipame kakaiyarixi puwarayex-eiyakai, 'amuxeutsixi kememiteyuriekai, Yawé muwarayewei 'ixaheritsixi wahixie.

27 Kepauka 'Akawi 'iki niuki mu'eni, miki yukamixa kaneukatsana, hiwerika kamixayari kananakatini meta kaniyuhakieni. Mipai rekamixati kaniukahupukaitini meta nutuixieti kanikuyeikakaitini.

28 Hik Yawé 'Eriyaxi Titsiwe kiekame mipai katinitutahiawe:

29 «¿'Akawi petixeiya kehapai mitiuhayewaxi 'axatiyurieneti? Tixaiti mikarayuyeitiaki nehixie, 'ayumieme mipai nepikatiyurieni

nepika'i'uximatiani, 'atsitake kepauka nu'aya  
ti'aitame mayanitsie 'ana mipai nepitiyurieni».

## 22

*Mikahiyaxi kemutayi 'Akawi hepaitaita  
(1Te 22:1-28 - 2Kem 18:1-27)*

<sup>1</sup> Haika wiyari panuyetia tsiriyutsixi mekayuk-  
witiweti 'ixaheritsixi wahamatia.

<sup>2</sup> Peru haika wiyari 'anuyeyaku Kutsapati,  
Kura kwieyaritsie ti'aitame, kaneyani 'Ixaheri  
kwieyaritsie ti'aitame hetsia.

<sup>3</sup> 'Ixaheri kwieyaritsie ti'aitame mipai  
katiniwarutahiawe memiparewie: «¿Xeme  
xetematetiti Xamuti Karaha kwieyaritsie  
mukuma tahetsia mumieme? Tame  
'atsitepikateyuriwawe Tsiriya kwieyaritsie  
ti'aitame mitatsiyetuirieniki wairiyarika».

<sup>4</sup> Hiki mipai Kutsapati katiniuta'iwawiya:

—¿Nehamatia pereuyeawe, temiwatakwiniki Xa-  
muti Karaha kwieyaritsie kiekatari?

Kutsapati mipai 'Ixaheri kwieyaritsie ti'aitame  
katiniuta'eiya:

—'Ekitsi kepemitayini ne yanepitikayani, yax-  
eikia neteiterima meta nekawayutsixi.

<sup>5</sup> Peru mipaita kaniutayini:

—Peru mexi 'atsitekateyuriwawe, Yawé  
tepita'iwawiya.

<sup>6</sup> Hiki 'Ixaheri kwieyaritsie ti'aitame  
kaniwarukuxeirieni Kaka'yari niukame-  
temama, nauka tsienituyari 'etsiwatikaku  
mekaniyupaimekaitini, miki mipai katini-  
waruta'iwawiya:

—¿Netiyiwe nemiwatakwini Xamuti Karaha kwieyaritsie kiekatari, nutsuti hawaiki?

Miki mipai mekaniutiyuani:

—Ti'aitame kenemie, Yawé kameniparewimiki pekaniwara'iwamiki.

<sup>7</sup> Peru Kutsapati mipai kaniutayini:

—¿Xewiti 'ena katiuyeika Yawé niukameyatiti, miki 'akuxi teminiuta'iwawiya?

<sup>8</sup> 'Ixaheri kwieyaritsie ti'aitame mipai katinita'eiya:

—Xewiti 'akuxi 'apuyeika miyiwe miki Yawé mita'iwawiya tahetsiemieme, Mikahiyaxi katinitewaka 'Imira nu'aya. Peru miki ne nekani'uxiwe'erieka, hatsuaku 'aixia ti'aneme nehetsiemieme pikanetixaxatiwa, ke'axamitiyini xeikia pitixaxata.

Kutsapati mipai katinitahiawe:

—Mipai pepika'utaineni.

<sup>9</sup> Hiki 'Ixaheri kwieyaritsie ti'aitame xeime kaniuta'inieni yuparewiwame, mipai katinita'aitiani:

—Yapauka xekenene'atiri Mikahiyaxi 'Imira nu'aya.

<sup>10</sup> 'Ixaheri kwieyaritsie ti'aitame, meta Kutsapati Kura kwieyaritsie ti'aitame, te'aitamete wakamixate me'anakatitkaiti meta yu'uwenitetsie menatekaitini, teiteri memayukuxexeiriwatsie Tsamariya kiekariyari kitenieyaritsie, meta yunaiti Kakaiyari niukametemama memiyuxataakai wahixie memitekuxataakai.

<sup>11</sup> Tserekiyaxi Kenana nu'aya, miki tepia 'awayari 'uyutiwewirieka, mipai putayi:

«Yawé mipai kanaineni: “Iki 'awateki pekaniwatakwmiki tsiriyutsixi pepikawahayewa kepaukake pemiwakwini”».

<sup>12</sup> Hipatita Kakaiyari niukametemama meniparewiekaitini yaxeikia me'utiyuati, mipai mete'ikihaweti 'Akawi, «Ti'aitame, keniwarutakuya Xamuti Karaha kwieyaritsie kiekatari, pekaniwara'iwamiki Yawé kameniparewimiki».

<sup>13</sup> Hiki, Mikahiyaxi 'iniwame mipai katinitahiawe:

—Neuxei, yunaiti Kakaiyari niukametemama mipai meputiyuane, kename ti'aitame rayu'iwa. 'Ekita hetsiena mieme 'aixia ketinexata, 'aniuki meta miki waniuki meyutaxewireki.

<sup>14</sup> Peru Mikahiyaxi mipai kaniutayini:

—Yuriki mipai nekanaineni Yawé hixie, mipai ketina'eriwani ne ti'aitame yanepiretaxatiani Yawé keminerahiaweni.

<sup>15</sup> Kepauka munua ti'aitame hixie, mipai katinita'iwawiya:

—Mikahiyaxi, ʔteteyiwawe temiwatakwini Xamuti Karaha kwieyaritsie kiekatari, nutsuti hawaiki?

Mikahiyaxi mipai katinita'eiya:

—Ti'aitame, keniwarutakuya pekatinayu'iwamiki, kariki Yawé kameniparewimiki.

<sup>16</sup> Hiki ti'aitame mipai katinitahiawe:

—ʔKepaimexia wairiyarika nepimatsipitiaka, para yuriki xeikia peminetitaxatianiki, Yawé hetsiemieme?

<sup>17</sup> Hiki Mikahiyaxi mipai kaniutayini:

—Yunaime 'ixaheritsixi nekaniwaruxeiya metaxirietikaime hiritsie, muxatsi memikatehekakutsiyari wahapai. Hiki Yawé

mipai kaniutayini: “Iki teiteri yukutsiyari mepikahexeiya. Yuxexuiti mekeheutayeixiani, yukie kayuwati mehexeiyati”.

<sup>18</sup> 'Ixaheri kwieyaritsie ti'aitame mipai Kutsap-ati katiniutahiawe:

—Kami kenemainekai, 'iki hatsuaku 'aixia ti'aneme pikaneraxaxatiwani, ke'axamitiyini xeikia pinetixaxatiwa.

<sup>19</sup> Tawarita Mikahiyaxi mipai kaniutayini:

—Keneu'eni 'eki Yawé niukieya: Yawé nepuxei yu'uwenitsie 'akaime 'auriena yunaiti kuyaxi muyuawitsie miemete mepiti'ukai, tserietana meta 'utatana.

<sup>20</sup> Hiki Yawé mipai kaniutayini: “¿Kemi'ane 'Akawi pikemakaxiani, Xamuti Karaha kwieyaritsie mieme kiekari mitamieniki mana miminiki?” Yuxexuiti yiki metenikuxatakaitini kehapai memiteku'eriwakai.

<sup>21</sup> 'Arike 'imatirieka, xewiti 'iyari kaninuani, Yawé hixie kaniutakeni, mipai kaniutayini: “Ne nepikemakaxiani”.

<sup>22</sup> Yawé mipai katinitahiawe: “¿Kehapai petiyurieni?”. 'Iyari mipai kaniutayini: “Nepiyemie hiki 'iyari miti'itawa nepayani yunaime 'aniukametema 'Akawi hetsia memimiemete wahetsie”. Hiki Yawé mipai katinitani'ani: “Kenemie mipai ketinekaye'a, pepeyiwekaxiani pepeikemakaxiani”.

<sup>23</sup> Kenemaine, Yawé kaniwarupitiani 'iyari miti'itawa yunaime 'iki Kakaiyari niukametemama 'ahetsia miemete, Yawé 'ari yakaniutayini ke'axamimatsiyurieni.

24 Tserekiyaxi Kenana nu'aya mipai tiu'enaka kananukukeni hiki Mikahiyaxi 'auritapa kaneuti-wani.

Meta mipai katinita'iwwawiya:

—¿Titayari kename 'iyari Yawé hetsia mieme netsi'uku'eiri peraine, kename 'eki pita mere-taxatia?

25 Mikahiyaxi mipai katinita'eiya:

—Yapekatinetimaimiki kepauka peyu'awietaneti xeikia 'apemuyeikani.

26 Hiki 'Ixaheri kwieyaritsie ti'aitame mipai katiniuta'aita:

—Mikahiyaxi xekeneuwiwaka xekenanuhani 'Amuni kuwexinaruri 'ena mieme hetsia meta Kuhatsi neniwe hetsia.

27 Mipai xeketeniwaretahiawi kename mipai nehaine meke'enutahiani miki tewi, nitixaiti mepikateheimikwani paa xeikia meta haa, kepaukake ne nemakunuani 'aixia nereu'erieti.

28 Peru Mikahiyaxi mipai kaniutayini:

—Xika 'eki pehakunuani 'aixia pereu'erieti, mipai pitimatsiikini kename Yawé kanetiutaxatia. Xeme xeyunaiti xepikatehatitimaiani tinai me kenemutayi.

*'Akawi kemitiumi*

*(1Te 22:29-36 - 2Kem 18:28-34)*

29 'Ixaheri kwieyaritsie ti'aitame meta Kutsapati Kura kwieyaritsie ti'aitame, mekanekine yunaiti Xamuti Karaha kwieyaritsie kiekatari meware-takwinike.

30 Mana 'Ixaheri kwieyaritsie ti'aitame mipai Kutsapati katiniutahiawe: «Ne nekaniyutamimiki yiki nerekemariti, peru 'eki ti'aitame kamixateya ketinanakapiti».

Hiki 'Ixaheritsie ti'aitame yiki tiyukemaritiaka kaniyutamieni.

<sup>31</sup> Peru Tsiriya kwieyaritsie ti'aitame mipai katiniwaruta'aitiakaitini xeitewiyari heimana tamamata heimana huta meyupaimeme kaxetate kuyaxa miemete ni'awamete tewa'aitiwamete: «'Ixaheri kwieyaritsie ti'aitame xeikia xekenetami'a, nixeime tawari xepikahemietiweni».

<sup>32</sup> Kepauka kuyaxi kaxeta memuhapana tewa'aitiwamete Kutsapati memuxei, mipai mekateniu'erieni: «'Iki xiari 'Ixaheri kwieyaritsie ti'aitame piyiane». Hiki mekanenukuweiya me'itamienike, peru Kutsapati kaniutahiwa.

<sup>33</sup> Hiki kaxeta memuhapana tewa'aitiwamete mipai metenetimani kename 'Ixaheri kwieyaritsie ti'aitame kayianekai, hiki 'ana mekanihayewa me'iweiyati.

<sup>34</sup> Matsi, xewiti katiniutamini yutupiki hau'erieti hiki 'Ixaheri kwieyaritsie ti'aitame kaniu'axe katinikwinitiani, tepia kamixayari manakatikikaita kaneukakeni. Hiki ti'aitame kaxetaya mahanakai mipai katiniutahiawe: «Keneukunuitia, kenenetuamie hakewa mikarayukwinetsie, 'ariri nepu'axie».

<sup>35</sup> Tukariki waikawameki mekaniyuk-witiwekaitini, ti'aitame kaxetaya kayuwati katinikeriekaitini, tsiriyutsixi wahixie. Peru xuriyaya pikatihayewakai matamiiyatsie mieme puhanekai kaxetatsie, hiki miki taikaiyaritsie 'Akawi kaniumini.

<sup>36</sup> 'Ari 'akayunirimekaku tau, yunaiti kuyaxi mipai mekateniutahiawarieni: «Yuxexuiti

xekeneutayeixia yukie. Yunaiti yukwiepa xekenakunuaxia».

<sup>37</sup> Hiki ti'aitame kaniumini, kanetikieni Tsamariya paiti, mana kanekateukieni.

<sup>38</sup> Kaxetaya mekaniutahauxini putsu matinieretsie Tsamariya kiekariyaritsie, hakewa 'ukari tuminiki memiyuwitinia memati'iwakaitsie, hiki tsikiri xuriyaya mekaniukutsena, Yawé kemainekai 'ana kanaye'ani.

<sup>39</sup> Hipatita kemitiyi 'Akawi ti'aitakaku, meta naime kemitiuyuri, paratsiyu kemitiutawewi 'erepanite 'awateyaki meta kiekarite kemi'ane 'aixia mutiyuri, kanaye'uka kemitiuyi xapayaritsie 'Ixaheri kwieyaritsie te'aitamete waxapatsie.

<sup>40</sup> 'Akawi kaniumini, nu'aya kanitsutiani 'Ukut-siyaxi titewati 'utimana ti'aitati.

*Kutsapati, ti'aitame Kura kwieyaritsie*

*(1Te 22:41-50 - 2Kem 20:31-21:1)*

<sup>41</sup> Merikitsi Kutsapati 'Atsá nu'aya kanitsutiani Kura kwieyaritsie ti'aitati nauka wiyari ti'aitakakuri 'Akawi, 'Ixaheri kwieyaritsie ti'aitame.

<sup>42</sup> Kutsapati xeitewiyari heimana tamamata heimana 'auxiwi wiyari kanexeyakaitini kepauka mitsutia ti'aitati, Kerutsareme kiekariyaritsie pitiuta'aitaxi xeitewiyari heimana 'auxiwi wiyari. Maamaya pititewakai 'Atsuwa Tsiriki nu'aya.

<sup>43</sup> Yuheyemekí miki piweiyakai yupaapa 'Atsá ke'aixia mitiuyuri, hatsuaku pikatiuhayewaxi, matsi Yawé kemitinake pitiyurienekai. Peru



pika'iti'unaxi kakaiyarixi memite'atimawiyariwa,  
'ayumieme teiteri mepiyeweyakai mana  
metemawatiweti meta 'ikwa metaiyatiweti.

<sup>44</sup> Kutsapati meta kayuwati kanexeyakaitini  
'Ixaheri kwieyaritsie ti'aitame hamatia.

<sup>45</sup> Hipatita kemitiuyi Kutsapati ti'aitakaku,  
kemitiuyuri meta kuyaximama ke-  
memite'ayu'iwaxi, katinaka'utiarieni kemitiuyi  
xapayaritsie Kura kwieyaritsie te'aitamete  
waxapatsie.

<sup>46</sup> Kaniwarayeweiya miki kwieyaritsie  
kakaiyarixi mewarayexeyati yuhamatia  
memukahipite kai tuminiki, miki mana  
mekaniyuhayewatiwekaitini kepauka paapaya  
miti'aitakai 'Atsá.

<sup>47</sup> 'Ana 'akuxi 'Erumi kwieyaritsie ti'aitame ka-  
niumawekaitini, xewiti kuwexinaruri pita mana  
pukatei.

<sup>48</sup> Miki tukaritsie Kutsapati kanuwate  
'amupapa kaniutiwewieni tituayamete makineki,  
'Upixi reyetewakaku paiti memuhuki huru  
memitiyuki, peru hatsuaku mepikaheuye'axia,  
mekaniukayunixiani 'Etsihuni-Kewexi  
reyetewakaku.

<sup>49</sup> Hiki 'Ukutsiyaxi 'Akawi nu'aya Kutsapati  
mipai katiniutahiawe: «Keniwarupitia  
neteiterima 'ateiterima wahamatia nawiyaitsixi  
memiwani'atiweniki». Peru Kutsapati  
yapikatiutanaki'eri.

<sup>50</sup> Kutsapati kaniumini kaniukateukieni  
yu'ukiyarima wahamatia Rawiri kiekariena,  
'ukiyarieya. 'Utimanata nu'aya Kurani titewati  
kanitsutiani ti'aitati.

*'Ukutsiyaxi, 'Ixaheri kwieyaritsie ti'aitame*

<sup>51</sup> Merikitsi 'Ukutsiyaxi 'Akawi nu'aya kanit-sutiani 'Ixaheri kwieyaritsie ti'aitati Tsamariya kiekariyaritsie, tamamata heimana 'atahuta wi-yari ti'aitametikaku Kutsapati Kura kwieyarit-sie, 'Ukutsiyaxi huta wiyari katiniuta'aita 'ixaheri kwieyaritsie.

<sup>52</sup> Peru miki Yawé kemikatinake katiniuyurieni, paapaya kemitiuyuri mipai katiniyurienekaitini meta yumaama hepai, meta Keruwuhani Nawati nu'aya kemitiuyuri hepai, 'ixaheritsixi 'axam-eteyuriekame muwarayeitia.

<sup>53</sup> Wahari kakaiyariyari ka-tini'uximayatsiriekaitini meta kaneyex-eiyakaitini, hiki mipai Yawé katiniuyehaxiatiani, 'Ixaheri Kakaiyarieya, yemeki paapaya kemitiuyuri.

**KAKAFYARI NIUKIEYA XAPAYARI  
WIXARIKAKI**

**The Holy Bible in the in Huichol language of Mexico,  
2020 edition**

**La Santa Biblia en lengua huichol de México, edición  
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

**Copyright Information**

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Holy Bible**

in Huichol

**© 1988-2020, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

---

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3